

近代中國史料叢刊續編第二十九輯

沈雲龍主編

金陵兵事彙略

李圭著

文海出版社

有限公司
印行

金陵兵事彙畧

金

事

陵

彙

共

畧

光緒十三年丁亥冬

十月刊於甬上厲齋

序

金陵虎踞龍蟠之地控制長江襟帶淮海形勢壯麗甲天下
國初革明南京舊制置江甯府設總督兼轄今江蘇安徽江
西三行省承平歲久民物豐阜商旅輻輳號稱極盛咸豐二
年粵賊由桂林薄長沙襲武昌舳艫蔽江東下明年二月遂
陷江甯據爲僞都分黨四出輜名城以百數黎庶罹鋒鏑死
亡者無算生民之禍烈焉蓋以一隅震動海內爲天下安危
所繫云嘗試論之當道光之季綠營窳壞極矣一旦泰西諸
國挾其精卒利器颺迅雷發所在鼎沸糜爛莫之能禦遂乃

要款通商齊定和約非盡當日任事諸臣之咎亦兵力不足制敵使然也粵賊乘外患之殷睨制兵之弱伺間竊發天下塗炭元元無告亂極思治於是曾文正公奮起田間猛將勁兵四面雲集一洗營伍骹滑蕙懦之習東西征討劇寇巨憝次第削平以至往歲拒法蘭西之役喋血諒山鏖兵臺灣浙海間者皆楚淮將士文正所嘗訓練而倡始之者也天下晏安之氣旣振起於跳梁之輩而武備日新雖以大敵驟至猶能相持而角勝此可知天之重佑我

聖清而文正之功所以貽後世庶者尤不可沒也江甯李君

小池明習洋務著金陵兵事彙畧凡四卷既成而請序于余
因推廣其意書其簡端以歸之其著書體例具載自序中茲
不贅論

光緒十四年冬十二月布政使銜升授湖南按察使浙江分
巡甯紹台兵備道無錫薛福成序

序

語曰安不忘危又曰居安思危夫能不忘與思則必日圖所以久安而胡至阡於危也金陵自孫吳降及前明屢爲都會庶富繁麗幾雄宇內 皇朝撫臨華夏深仁厚澤化育涵濡者踰二百年無計吏橫征無酷吏濫刑井邑桑麻恬熙沃衍而士民之熏陶沐浴者既久且深又非明以前所得京也然而承平日久遂至習安忘危奚暇致其思哉噫夫天塹之稱固以江也而不知一旦有警猝弗及備亦江也是不忘之與思烏可一日泄泄也乎洪逆等之起西粵也鮮不謂去金陵

數千里禍奚能及我孰知其一入楚南是禍已在眉睫下矣
溯癸丑春賊自鄂皖順流下甫十日陷之踞爲老巢僭尊號
竊帝制首尾十有二年金陵之人死以數十萬計是豈曰危
直亙古未有之浩劫矣緣其致是之由甯非忘與不思也歟
同治甲子巨憝授首子遺之民出水火登衽席重覩昇平其
一郡七邑之陷於賊與夫官軍克復大功告成諸時日情形
載在諸家著述固旣備旣詳第諸家所載間未一轍卷帙浩
繁弗易萃諸書供几案旣萃矣又或苦不暇繙閱或繙閱仍
未必卽能省記故恆有欲道故土兵燹事而因歷年漸久無

從追憶或以紀載岐出莫衷一是或以卷帙浩繁又非專紀
金陵遂望洋中止凡若是者不一其人若不摺拾羣言彙成
專集用垂龜鑑而致不忘之與思再數十年百年而後幾不
復知有前此之蕩析離居仍耽溺安逸是之謂習安忘危尙
奚有於思顧可弗懼哉竊維平定粵匪紀略一書敘事雖涉
太簡其於各城隘失陷克復時日悉本邸抄與國史相表
裏爰取爲底本而兼及王氏之曾文正大事記錢氏之吳中
平寇記秦氏之平浙紀畧王氏之襄牖餘談諸書其當日所
耳聞目見膾炙故鄉人口者亦參列一二自咸豐壬子十月

江督陸制軍進防江皖起至同治甲子十一月改殮陸制軍遺骸止以年爲綱專錄江甯一郡而以賊之始末及各路軍務之關係最大者分年附記於下都爲四卷曰金陵兵事彙畧錄旣竣有譏爲簡陋者余曰誠然然諸家著述固在此特欲勉人之不忘與思庶幾日圖所以久安而不阡於危則互古之浩劫奚自而至者哉

光緒十二年丙戌冬十月江甯李圭謹識

目錄

卷一

咸豐二年壬子至咸豐四年甲寅

卷二

咸豐五年乙卯至咸豐九年己未

卷三

咸豐十年庚申至同治二年癸亥

卷四

同治三年甲子



弟開科盈之校字

一

金陵兵事彙畧卷一

江甯李圭小池

咸豐二年壬子粵賊洪秀全等自廣西竄湖南北裹脅數十萬眾掠舟萬餘水陸並下十月 上命兩江總督陸建瀛爲欽差大臣督兵進防江皖時兩江已先調撥官兵三千駐紮湖北廣濟縣屬武穴下之老鼠峽陸大臣募勇未集乃帶松江提標兵二千餘親兵數百由水路上駛

附記

先是道光三十年庚戌逆民洪秀全倡亂廣西潯州府

國編書局 欽差
大臣進防江皖

洪逆倡亂全
田村

桂平縣屬之金田村秀全者本鄭姓原籍廣東花縣生於嘉慶十七年壬申身癡肥畧識字父國游與母均早死遂冒洪姓素飲博無賴以演卜餬口偶遊省城見泰西教士羅孝全言願入教實欲藉教謀生也居羅外舍月餘困乏不得歸羅乃資之行且贈以教中各種書歸教其鄉人適廣東奸民朱九濤倡上帝會亦名三點會秀全及同邑人馮雲山往師之旋以秀全爲教主道光十六年秀全及雲山至廣西住桂平武宣二縣接壤之鵬化山中傳其教有桂平人曾玉珩者家素豐延秀全

訓蒙時秀全妹婿蕭朝貴武宣人亦家於桂平與原籍
廣東嘉應州人楊秀清比鄰遂更與秀清相結納又有
桂平人韋昌輝原籍廣東和平縣寄居貴縣人石達開
貴縣已革壯勇秦日昌貴縣游民林鳳祥等先後入教
昌輝原名正固富民以謬懸登仕郎額疊受訛詐因而
思亂者秀全病危甚旋愈詭言死去七日而甦能知未
來事謂舉世將有大災惟入會拜上帝可免拜上帝者
各納銀五兩爲香鐙資凡入會不稱師徒而曰兄弟遇
婦女則曰姊妹意不欲人自貶則易廣其傳故楊秀清

等皆兄事之秀全自知無術不足惑衆乃託名西洋教
彼教所崇爲耶穌秀全欲駕而上之謾天父名目謂天
父爲耶火華以耶穌爲長子秀全爲次子故稱耶穌爲
天兄復與馮雲山盧賢拔等造真言寶誥諸僞書密爲
傳布秀清尤狡獪因秀全捏造天父信者漸衆遂證其
說自作巫謂天父下凡附其身詞人陰私摘發之羣驚
爲神嘗託天父言挾制秀全令前跪受杖已有不韙亦
伏地令人杖不少貸二十七八年間廣西歲饑多盜巡
撫鄭祖琛嚴檄緝治不能戢各鄉遭肆擾謀結土團禦

之居民各自爲黨多不相能官吏尤貪橫新甯以李博平糶勒價二千文一石又以差役訛索雷再浩之妻黨故李沅發等於二十九年作亂三十年四月沅發就擒各邑土匪繼起秀全遂乘機潛煽其間桂平連界之武宣象州藤縣陸川博白各處人心浮動一時附之者如蟻聚又有湖南衡山縣人洪大全幼穎秀甫八歲能默誦十三經陰自負知秀全倡亂亦往依附六月秀全匿於平南縣花洲山人村胡以眈家秀清遣人迎之至金田集眾謀發難八月事聞於邑令馳兵往捕不獲拘其

妻孥繫獄秀全徧張貼謂三日內不釋當與官抗令
懼甚立釋還家時秀全聚黨已數千猝不可散遂以夜
入城戕官劫庫釋囚蓄髮起事是爲秀全倡亂之始其
蓄髮初僅秀全一人潛匿窮谷中人罕識其面至是則
凡脅從者悉禁薙髮防背逃故遠近目爲長毛亦曰長
髮賊以其黨喜纏紅巾又曰紅頭鄭巡撫出師督剿駐
平樂府疏入奉 旨調固原提督向榮爲廣西提督赴
粵會剿九月至桂林省城時慶遠思恩南甯諸府土匪
正熾向提督馳往剿辦洪秀全等益猖獗鄭巡撫復馳

林總督爲
欽差大臣

林大臣薨

李總督爲
欽差大臣

奏 上命前雲貴總督林則徐爲 欽差大臣馳赴廣

西與鄭巡撫向提督前雲南提督張必祿會剿旋以給

事中袁甲三奏參鄭巡撫欺飾彌縫各罪飭據兩廣總

督徐廣縉覆奏撫臣年老多病文武皆不畏服得 旨

革職著林大臣暫署廣西巡撫旋林大臣薨於廣甯途

次 諡文忠 公臨歿大呼星斗 張提督甫至潯州亦薨

南莫解所謂廣甯屬肇慶府 壯 諡武 奉 命令前兩江總督李星沅爲 欽差大臣赴

廣西督辦李大臣於十月抵桂林初賊聞林大臣往懼

甚擬縛渠請降及是大慰因作文遙祭之十一月官軍

欽定四庫全書

至金田剿賊失利十二月 上以廣西賊勢漸眾復

派前漕運總督周天爵赴粵會辦旋令署廣西巡撫時
金田賊裹脅日多附近各村紳富搜括靡遺周總督察
此股爲勁匪咨商向提督自橫州旋師專剿距金田數
十里有地曰大黃墟居大黃江口有劇盜專劫行旅擁
眾積資自雄官軍無如何秀全由金田出關經八崗水
至大黃江投之結生死交秀全不肯爲之下官兵至秀
全請盜留守老巢而悉眾出與官軍戰佯敗引去官軍
擣其巢焚之盜死秀全反攻官軍大勝之遂悉有其眾

咸豐元年辛亥正月秀全在大黃江僭偽號爲太平王
楊秀清爲左輔正軍師蕭朝貴爲右弼又正軍師馮雲
山韋昌輝秦日綱卽秦日昌石達開爲丞相旋又有廣
東股匪楊元清等衆來附而新投之廣東揭陽縣海盜
羅大綱尤猛鷲善撲旋將大黃墟縱火焚毀悉衆分擾
武宣平南等縣入象州境二月廣州副都統烏蘭泰奉
旨馳赴粵西幫辦軍務 上復眷念邊疆不安宵旰
特命大學士賽尙阿率都統巴清德副都統達洪阿
馳往楚粵之交駐紮調度並 諭李星沅等不得以特

派有人稍存觀望又命周天爵幫辦軍務廣西巡撫著藩司勞崇光暫行署理四月賽節相陞辭出都特賞邊必隆刀以壯其行奏帶侍衛開隆阿天津鎮總兵長瑞涼州鎮總兵長壽軍機章京戶部司員丁守存聯芳等十餘員火器營烏蘭都等京兵二百名部撥餉銀一百萬兩又由內務府廣儲司撥發內庫銀一百萬兩先是李大臣奏請專派總統期於事權歸一賽節相起程之前已密交諭旨令赴廣西軍營並傳知李星沅回湖南會辦防堵至是復諭賽節相馳赴廣西接

洪逆僭偽
欽差大臣

洪逆僭偽
欽差大臣

辦 欽差大臣事務並 授鄒鳴鶴爲廣西巡撫兼程

赴任李大臣旋以疾薨

諡文恭

六月秀全等由象州入紫

荆山竄回新墟八月復由新墟走平南籐縣竄永安州

閏八月初一日陷之遂僭偽國號曰太平天國洪秀全

改稱爲僞天王封楊秀清爲僞東王蕭朝貴爲僞西王

馮雲山爲僞南王韋昌輝爲僞北王石達開爲僞翼王

洪大全爲僞天德王秦日綱等爲僞丞相諸職在城創

設男女館界限甚嚴時有湖南新甯縣舉人浙江知縣

江忠源先由賽大臣調赴粵西佐烏都統戎幕至是同

楚募鄉勇五百人至粵西擊賊為楚勇出境剿賊之始
 十二月賽大臣親駐永安督諸軍攻剿烏都統軍營南
 路向提督軍營北路烏都統欲合圍俟其困可盡殲向
 提督泥古法必欲缺一門不圍俟其出而後擊之二年
 二月烏都統陣擒偽天德王洪大全檻送京師賊開北
 門竄收復州城烏都統以追賊中流礮死謚武壯當賊竄
 回新墟時男婦僅萬餘人合圍聚殲甚易為力踞永安
 時果能嚴密圍逼盡殲之亦尚可速於蕝事烏都統嘗
 力言之惜共事者意見不合何三月賊犯廣西省城以

向提督驅軍急救先賊至得不失而鄒巡撫奏稱已功
但以向榮亦至四字括其勞績向提督自是遂與文官
不相能嘗曰君輩但知掉筆頭殺賊耳賊旣去四月陷
全州南賊馮雲山中礮死五月陷湖南省城時湖南駱巡撫
陽州由永興茶陵醴陵直趨湖南省城時湖南駱巡撫
秉章在城新授張巡撫亮基自雲南來亦縋城入共籌
堵禦布政使潘鐸倡議動庫款犒士得固守洪逆營南
門外取玉造偽璽脅衆呼萬歲圍攻三閱月西賊蕭朝
貴授首不克乃去由甯鄉益陽掠民船數千出臨資口

渡洞庭十月陷岳州府十一月陷湖北漢陽府十二月

陷湖北省城常巡撫大瀆

謚文節

馮學政培元

謚文介

等死

之湖廣程總督喬采駐軍衡州至是褫職以湖南張巡撫代賊遂將俘獲男婦共約五十萬人船萬餘隻資糧軍火財帛與婦稚盡置舟中蔽江東下新舊賊分兩岸夾江以行經黃州武昌蘄水蘄州抵廣濟之武穴鎮從此遂如潰隄之河燎原之火弗易挽救矣

周文忠公致二南書曰二南老弟足下三十年闊別何由得訴我一生苦衷若見老弟我當大哭一場以一生

苦心不見信於天下非素知我之深者而又識治亂大體眞沒處開口試觀今之天下以僞飾姑息壞乎以除殘去暴壞乎平心論之得失明矣今之禍根不止一省也而粵西爲最如一江一潭其水先壞而焉有完魚卽如石芥廣皆粵東民也以西粵土廣民情而愚客民皆寄食其地良少莠多莠者結土匪而土匪資其凶餓以害土著之良土著之良不堪其虐且欲大逐客民之莠而客民且利良者之家室於是仇隙日深結黨互殺而黠桀出於其閒嘯聚成羣以千數以萬數者多矣沿劫

左右江數千里之間其始激於州縣不爲理其曲直而
下民怨嗟邪教見民冤抑之狀倡爲蠱惑之辭因好鬼
之說專爲鬼神之語而世風披靡矣而大吏鄭祖琛又
篤信佛教酷似梁武欲不殺一人以爲功德於是一省
鼎沸魚爛日餒矣蓋自丁未至今無月不損兵折將而
俱僞飾之於是一省文武亦無不魚爛日餒至去年學
臣無處可考欲入告而鄭乃發之內廷視爲小寇遂命
少穆孰意天喪元老而李石梧繼之其爲人力袒鄭夢
白一切查問生事之人皆出其手於是一省之貪劣皆

喜一省之士民皆懼而我成一贅疣而反冒巡撫之名
一言兵則省城僅有懦劣八九百名之兵一言餉則藩
庫撥來朝不繼夕之餉一言官則通省皆是求參不得
之官一言將則通省皆是石郎之將一言案牘則無一
不是被殺被焚之案牘嗚呼此席是何等造化得此於
是二月初一日出省帶兵一百名如駐馬鬼坡皆不願
走也路上募一百名又如石壕驛未走先哭乃於十二
日甫抵武宣而教匪偷越紫荆山而來如虎兕出柙先
鋒已到三里圩矣其大營在東鄉卽韓襄毅公所謂大

全明...
簾峽之後戶自昔爲韓雍陶魯以及王文成公用兵幾
千萬衆積年鏖兵之所其大戰場卽武宣之東面三里
圩方到時縣官一人一縣皆空而紛紛向西逃去渡口
船無歇處問知縣劉作肅有何禦備荅云只有一繩則
大哭我何等福氣亦統大兵二百名親履文成公杖鉞
之所湊拍之巧乃竟爾爾十三日留兵五十名勇五十
名守其一百名赴前紮營赴敵皆失色我云違我制者
斬其列隊時亦甚有膽力卽紮營於雲湖村之嶺與三
里圩人聲相聞十四我趨其地見營外村莊與官兵莫

不相屬孰知其不
彰鍾橋之西自竹
不怕死之張鎬風
日紮營賊果來望
戰於召村雲湖之
不意各勇先潰鎮
勇二百名自己兵
矣我催勇一百名
軍破陣而出我兵

之羊無一動者我手刃二人光准用箭射殺二人亦無
應者撼山易撼岳家軍難不意如此當是時賊皆聚擊
於我礮子如雨我仍吃烟點火者接不住烟窩而擡轎
者後二人起不來矣惜乎太平之民皆如此何怪其然
於是申明號令三月初二日復大戰於一軍之後置一
隊殺手斬退走者四路出兵置四隊殺手皆有將弁領
之一股劉守攻東陵一股張守攻召村之伏接應攻東
陵一股向提軍攻三里圩之西一股貴州泰鎮軍新至
之兵攻三里圩之北再由此而南抄賊之後而向提軍

恐我力戰太猛傷一巡撫我命沒矣哭勸我不可督兵
當是時自謂胸有成算矣孰意賊連夜調東鄉大巢之
賊悉師而來僅三十里耳而賊大元帥洪泉馮雲山皆
親身督戰南第一股劉守所領之大頭軍先至東嶺而
賊營寂無人聲發火箭數十枝燔其房屋賊始出數百
人兩下對礮戰方酣忽出二千餘賊將我兵圍裏東勇
係張守敬修所帶福勇係縣丞褚汝珩所帶共千餘名
急救之而賊又出兩倍之衆統圍三股向提軍欲統大
軍衝賊兩半不意賊又并麾軍圍之而貴州兵欲攻三

里圩之北者詎賊伏大林中其一股勁賊遮其前一股
大眾擊其後貴州兵擊死穿黃衣紅戰裙者孰意賊視
死如歸赤身赴敵立刻殺死黔兵二十四人傷八人黔
兵始大奔矣此戰我兵用命傷者七十餘人死者共三
十餘人自午逾申真血戰也奈我兵勇共六千餘人賊
三倍之又吃迷藥受創不知有已死而後已事將奈何
然而此戰賊當陣死者三百餘傷者太甚亦未嘗不寒
心聞其大股凌十八劉八帶領教匪萬餘所過州縣僅
枯粒朽誓來萃力於我報者紛紛三軍無不變色提軍

亦心動矣不得已創爲坐戰之法立一拒敵大營下設礮眼兩座彼日環攻我日環打賊一人無所見一礮不能傷我兵更番迭打一人不能走其一人不能走者四面皆厚牆深濠死卽同死生則俱生蓋師淮陰背水之遺意也無奈肝氣數動瘴氣太深食少事多三軍恃我爲長城我若一去奈國事何要之逆匪用兵全是洋人之法以洪泉係西洋人傳天竺教者此人爲軍師軍令死一隊長則一隊全斬又飲以藥水其剽忽不及闖獻而深沉過之綜觀所有大帥無與敵者嘻莫非氣數也

夫現諸大營在武宣北市交易軍無一敢擾民者僅此
一事可以上對古人凡擒來可疑之人奸細立誅可矜
可疑甯失不經此等時節天在頭上不忍妄殺一人持
此心亦可對我老弟也此信我無暇再寫可示光碧并
呈慈圃先生此大公祖我所折服恐怕他爲兩廣督臣
山東再望此等人物真無有矣一一俱出心腑之語不
盡二南不知何人是書
乃得自上海傳鈔

江忠烈公荅劉霞仙書曰忠源冒大不韙墨經從戎又
復戰陣無勇致賊擾及桑梓遂攻會垣深愧進退失據

乃承垂詢賊情不棄請不可與言之列聞命之下悚惶
萬端竊維逆匪自滋事以來蔓延兩省展轉兩年非賊
衆而我寡賊強而我弱也其弊在兵不用命將不知兵
兵與將不相習將與將又各不相下遂至潰爛不可收
拾至於如此去年六月賊至桂平新墟時忠源方在烏
都護幕中力主圍賊之議都護深韙其言因諸將各懷
意見其後遂有官村之敗自賊據永安以東路空虛爲
都護作書請兵十上而說不行遂有古東之敗至自桂
林竄出攻陷全州忠源先軍橋頭堵其西竄新甯之陸

路并釘塞河道斷其北竄零陵之水路請於河東紮營以爲合力攻剿之計時烏都護因傷不起向軍門臥病未來諸將無所統紀互相推諉賊果從河東小路竄出鏖戰兩晝夜奪獲賊船三百餘隻賊之精悍若無幾矣斯時吾楚若稍有防堵前後夾攻何難聚而殲旃乃自入永安境上土匪之迎賊會匪之入黨日以千計而地方文武又皆望風先逃一至道州勢遂復熾惟時和鎮軍初統諸軍忠源與之熟商冀其可以集事因諸將懦不用命以致江華永明相繼失守迨賊至七里江竄走

定議以萬一千攔頭九千人追尾無奈攔頭之師遲延不進而所過州縣又皆開門揖盜無能守住一二刻以待追兵之至者自嘉禾以至桂陽郴州賊皆入無人之境賊又知我兵之不能攔頭也而以後隊敵追兵以前隊攻城池由是而永興安仁攸澧一帶遂不保且漸漸逼近省垣矣然其首逆大隊尚在郴州也忠源以前無堵禦恐省城有失則爲禍愈烈遂請和鎮軍於九千人內挑千餘人并自帶楚勇五百名於初四日自郴起程是夜行至油榨墟接省中來信始知賊之前隊已於二

十八日逼攻省垣遂兼程前進於十三日申刻抵省軍於小吳門外次早縋城而入周歷各城防堵雖不盡如法然賊勢尙單逼攻不甚緊急十五日督兵進剿小挫兇鋒十六日賊遂不敢復出惟於周圍高築牆壘我兵進攻賊從牆眼施放鎗礮不能得手十七日遂移兵蔡公墳一帶逼攻賊壘晝夜用礮轟擊賊船鳳皇廳土兵移紮河西以堵賊匪西渡十九日向軍門自桂林起病來省父老留住城中省垣想無顧慮二十日我兵奮力進攻殲賊數十百人二十二日探報郴州賊匪竄到我

兵迎擊於仰天湖時賊衆我寡黔兵稍却勢甚危險忠源帶勇向前衝擊短兵相接霰受矛傷落馬軍士殊死戰將賊擊退扶救回營日來創口漸合惟尙不能行動耳見在賊之後隊一萬餘人已陸續到齊屯聚南門城外湘水在其西會垣在其北忠源與和統帥軍其東聞後路追兵日內卽可趕到再軍其南而該逆四面受敵可以一鼓成擒惟各路鎮將除和統帥外實乏可靠之人未必能如願以償也忠源常料賊之詭計總思北竄我之設備亦宜先防北竄貴邑既有湖水之陽封河又

有重兵似可無慮但恐擊敗之後四處分竄急何能擇耳然賊亦無他伎倆不過未到之先遣奸細以虛詞恐駭之將到之際遣前隊以甘言籠絡之既到則殺戮淫掠無所不至愚民至此雖知被給而已悔不可追矣至於賊衆雖稱萬人其實能打仗者不過二三千人且此二三千人亦非異常驍勇我前彼仍却我却彼乃前惜各營將備不能忍此須臾耳忠源身經數十戰所歷驗不爽者務望宣示鄉勇俾臨陣得有把握又駐劄地方必須先築營盤深溝高壘賊初來時但在營中用鎗礮

轟擊俟賊勢威旣竭然後出而擊之靡不勝矣屬選擇
曉暢軍務熟悉地形者刻下實難其人但於賊勢緩急
必當隨時奉聞也伏維原鑒不盡

霞仙
名蓉

洪逆祭林文忠公文曰嗚呼日望公來公不來耶公來
我輩尙得復爲良民公不來我輩不得復爲良民矣天
乎天乎公竟不來乎尙饗

三年癸丑正月十一日陸大臣兵抵廣濟縣之龍坪派壽春
鎮總兵恩長爲翼長督隊至老鼠峽會合前兵共籌堵禦舟
師未及登岸賊驟至恩總兵督戰陣亡

諡武
壯

遂大潰陸大臣

陸大臣復自來而
梁山起四金陵

退回於十九日抵金陵九江原未設防先失陷旋又陷安徽
省城雖復統帶新調廣艇並兩江原設舳板船進防蕪湖下
游之東西梁山仍不戰而退倉皇回城閉關而守曾無布置
是徒守也駐防將軍祥厚布政使祁宿藻力勸結營城外拒
賊陸大臣不之許祥將軍祁布政聯銜奏參之二十五日夜
間賊船由太平府順流下二十六日辰刻福山鎮總兵陳勝
元逆戰沉賊船二隻戍刻賊眾水陸至陳總兵中礮落水死
諡剛 賊遂麕至二十七夜焚板橋二十八日卯刻抵城外紮
賊壘二十有四賊船自新洲大勝關起泊至七里洲止晝夜

攻城聚寶門外米商自團練勇殺賊賊幾敗城頭施礮助威
適傷練勇數人乃駭散祁布政在城目擊憤甚嘔血死是時
城頭施礮我軍必傷傷必驚潰此奚待知兵者而後解也二
月初十日儀鳳門外地道發賊驟登第二道又發賊自樊干
餘官兵乘勝擊之競割耳記首級赴局報功領賞守陴兵力
轉薄賊大隊擁至急調各城防兵北向堵禦另隊賊已由水
西門即三山門越城而入省城遂陷維時陸大臣適自將軍署乘
輿回署行至十廟地方遇賊被戕前廣西巡撫鄒鳴鶴獲咎
後奉調隨辦防務爲賊自公所拽至大功坊大街戕殺節諡壯

署布政使巡道涂文鈞在上元縣署被害糧道陳克讓殉難

於本署諡忠節上元縣知縣劉同纓公服坐大堂罵賊賊棄去

步至龍王廟側投池死江甯縣知縣張行澍自上元縣署乘

馬回至四象橋躍河死前浙江副將湯貽汾僑寓城內賊絕

命詩從容就義諡貞愍紳民死於水死於火或自經服毒多有

闔門以殉者獨江甯府知府魏亨達不知下落或謂已潛回

原籍矣祥將軍諡忠勇及副都統霍隆武諡果毅率駐防兵守內

城盡驅婦女登陴殺賊相持兩晝夜力竭城陷殉節其男婦

被殺害尤慘酷其未殺盡者驅之出城悉沉於河陸大臣死

後朝議照死難例贈卹御史方俊具疏力爭略謂陸建瀛爲奉命督兵大員總兵恩長戰歿不行救援反自小孤山遁回金陵糧餉軍械盡以委賊遂使安慶迅陷直犯金陵又挾將軍祥厚參劾之嫌守城事宜在在爲難因是旬日間金陵亦陷其被殺於十廟地方是已逃而終不能逃非陣亡自盡者不可同城亡與亡者比若加恩贈卹國家刑賞何以示天下卽祥厚恩長等忠魂亦恥與同列於是收回成命止給還總督銜嗚呼使祥將軍郝布政議行築壘城外扼要守禦未嘗不可多延十餘日待援軍至而會合解圍賊又烏得開

掘地道壹志攻城耶蓋亦天也雖然駐防兵丁跬步不離內
城是豈設駐防遺意耶當陸大臣進防江皖時 上並命江
蘇巡撫楊文定江南提督福珠洪阿移守金陵一無展布迨
陸大臣回城楊巡撫以顧蘇爲言匆遽而返復自蘇折回紮
於無錫金陵陷福提督亦死諡壯敏楊巡撫由無錫赴江陰江
陰官紳不納仍回蘇兼署兩江總督鎮揚繼陷自請守瓜州
蔽入蘇道至八月奉 旨逮問尋遣戍賊旣入城詭言不殺
人有以土物入獻者給以貢單無相擾人多信之爭饋銀米
牲畜菜蔬取僞貢單榜於門詎賊見單益搜索以其不爲備

私藏必多也。初猶未排戶入搜，懼有官兵伏匿，惟遇人於路必殺。至十二日，見人則逼使昇屍棄諸河，不從殺之。如是者數日，忽出偽示，逼民如常貿易。其時店鋪百貨掠幾空，無有應者。忽又以查人爲名，比室搜括，令壯男子聽驅使，胸背以黃布寫賊銜，謂之招衣。攜幼童使爲小儀，俾持旗傘隨其行。男子毋許歸家，歸則謂與婦女私。干天條罪，應誅。於是立男館，搜其家有私藏金銀者，立寘重典。驅婦女出於外，不使家居。襁幼稚，負行李倉皇道路，慘不可言。或得閒自投江河，或投子女於河。賊旣驅而之東，又復驅而之西。有啼哭者，目爲

妖鞭箠交下夜則露宿簷下越日乃立女館是時夫婦雖覲
 面不敢交言否則謂不遵天令城北幽僻之地尚有民衆潛
 居者賊以搜物至男子盡驚逸賊怒其避己因驅婦女赴旱
 西門即石城門悉付洪流焉賊將分股竄鎮江揚州逼壯者數萬
 登舟欲使為前鋒城中知之鼎沸或自盡或竊逃賊懼一時
 不能制有偽丞相鍾芳禮偽巡查周才太者性稍平和乃請
 逆酋設機匠館牌尾館機匠館處工役織紉人牌尾館處殘
 廢老弱人二者皆不調戰陣人館之家凡遇賊搜括告偽丞
 相輒杖責追還殘廢者得安食室中老病者使掃街道於是

入館伏處者幾四萬人旋又設雜行菜圃雜行亦工匠之流
菜圃者賊使人於隙地種植蔬菜兩處亦不下二萬數千人
無何賊傳僞命凡讀書識字者悉赴僞詔書館否則斬匿不
報者同罪因得數百人使爲僞誥文檄示合賊式者分入各
酋館爲僞書吏又捏造天主書教人不能背讀者杖之出僞
示謂人死爲昇天不許哭不用棺木不設香火違則爲妖邪
黃烟之禁與洋烟同嚴有犯輒斬各巨酋僞府多毀民居拓
益之封土木匠爲僞將軍僞總制俾率隊課工以總督衙署
爲僞天王府用鑼鼓數百人前導後護迎洪秀全入居之僞

王額數十人悉以黃絹蒙頭跣足乘馬入自是遂不復出矣

欽差大臣向榮奉 旨自武昌率左翼長總兵和春右翼

長總兵馬龍迫踪來援師行極速都司張國樑領頭隊正月

十二日即抵九江無舟不得濟咨江西巡撫由省撥回空漕

船載之東渡至太平府取陸路經小丹陽鎮元山殷巷一帶

於二月二十日達金陵暫駐淳化鎮

俗稱雄黃鎮

賊以重隊扼守

城外壁壘嚴固志在持久向大臣乃急簡精兵連破朝陽門

外賊營二十餘所即其壘建立大營號江南大營於是距城

較遠各鄉得恃以無恐卸任廣東學政內閣學士許乃釗奉

命幫辦江南軍務亦自江西馳至時賊中凡攻戰守禦黜陟調遣諸偽政悉出自偽東王楊秀清洪逆與東賊計欲分賊守江南而自統賊衆由淮安長驅北犯楚賊中有老舟子後封偽航王唐正財者言北路無水乏糧遇困莫解今有長江之險舟師萬千宜就南京爲都東賊違其言遂遣偽丞相林鳳祥李開芳羅大綱及曾立昌等率衆以往而以金陵爲偽都號曰天京此時此事實爲天下全局一大樞紐非偶然也北趨賊連陷鎮江揚州分據浦口瓜州各要隘徧立營壘以阻南北之師二十五二十七等日向大臣分路進兵攻擊

賊開城出撲勢頗銳張國樑等一戰覆之三月初六日破通

濟門外賊壘十一日張國樑奮力襲取七瓮橋俗稱七橋將鍾

山及報恩寺一帶賊壘隔斷卽建營於七瓮橋以其地距城

最近張國樑自守之十三日進奪鍾山十七日夜戰復大捷

向大臣遂分十八營紮孝陵衛一帶賊始懼不敢南向而後

蘇常以下獲保全其觀音門賊船千數百隻以計焚燬賊之

水營亦稍斂戢賊圖竄上下游分官兵力慮已分力亦弱復

謀脅新虜之人見館中機匠甚夥乃傳僞令每館選壯健者

數人詭言出城運木石旣出齎迫之上船使犯皖楚先是機

匠多有中人資以重賄賂賊目乃得入繼爲賊酋悉其隱匿狀命搜緝並括及他物因而逸去者極多至是僅存四五千

人四月北竄賊襲浦口犯六合署六合縣事溫紹原督民團攻賊於龍池地方傾火藥燒賊營賊被燔灼及鎗礮轟斃者數千餘賊遁回金陵爲之酋者朱錫錕黃益芸也六月計賊中裹脅人數男館廣西約千五百人廣東約二千五百人湖南約萬人湖北約三萬人安徽約三千人各省總約二千人金陵約五萬人鎮江揚州約五千人女館廣東西約二千人湖南約四百人湖北約二萬五千人安徽約三千人鎮揚約

萬人金陵約十萬人賊逐一設門牌凡男子十六歲至五十歲謂之牌面餘爲牌尾立館長分統之女館則有元女妖女之別元女卽處女妖女謂婦人及被污之女子統以僞女軍帥等官禁賊衆不得犯僞令甚嚴惟洪逆及東西南北翼五賊得不時選逼元女充媵妾各館按月送冊核其數男館遠調及逸出均註明賊初入發糧無限來取卽與自名籍可稽每館發米有定額於是米價陡貴百斤需六金尙無購處又用北賊僞印票交賊官及館長出城者以此爲信十一月賊船由蕪湖進泊相近高淳縣之石臼湖圍犯東壩以解鎮江

之圍向大臣遣鄧提督紹良等守東壩迎擊之斬獲甚眾時
城賊待被虜之眾若犬馬少壯者紛紛逃亡不足於用乃取
老而健者使登陴擊柝猶不足則雖老病者亦預役伺便逃
逸者益眾婦女亦日供奔走操作憊不得息賊於湖北安徽
掠得鹽米各船皆泊儀鳳門旱西門外令僞女官執旗悉驅
出城首戴肩負運入倉中沿途命童子持鞭驅策行稍緩則
箠扑交下並使女館削竹籤置城外濠溝跋涉委頓泥塗顛
仆自尋死與受矢石鞭箠死者無算至十二月統計男館廣
西千餘人廣東二千人湖南五六千人湖北萬餘人各省總

約千餘人安慶二千人金陵約二萬人鎮揚約三千人女館
廣東西約二千四百人湖南約三百人湖北二萬三千人安
慶二千七百人金陵不及九萬人此外陸續新虜者統計男
館興國州黃州約萬人廬州約萬人江西五六千人揚州儀
徵約四千人女館自鎮揚虜至者共一萬二千人賊逼男女
拜上帝以黃紙作誓語拜畢焚之謂之悔罪其讚美語南賊
所撰各館長率眾朝夕誦之每日睡起飲食必默念小子某
同眾小子跪在地下敬謝天父上主皇上帝老親爺爺等語
謂天父七日造成天地山海人物每閱七日爲一讚期謂之

禮拜先一日街設大旗寫明日禮拜各宜虔敬字樣三鼓具
果品糕餌羣誦讚美各偽府金鏡爆竹聲不絕耳其讚美語
曰讚美上帝爲天聖父讚美耶穌爲救世主讚美聖神風爲
神靈讚美三位合一眞神眞通豈與世道相同能救人靈享
福無窮知者踴躍卽之爲福愚者省悟天堂路通天父洪恩
廣大無邊不惜太子遺降凡間捐命代贖吾儕罪孽人知悔
改天子萬年視張獻忠祭梓潼祝文曰你姓張俺老子也姓
張俺老子與你連了宗罷尤爲格格不吐洪逆更善掉弄文
字不可以意測如聖改勝上改尙耶改耳華改花國改郭一

作国火改亮清改菁秀改莠亥改開卯改榮丑改好辛亥之
歲爲洪逆在大黃江僭號之始癸丑洪逆踞金陵則稱辛開
元年癸好三年又稱歷代帝王均爲相有所謂改定四書曰
孟子見梁惠相相曰不遠千里而來亦將有以利吾郭乎諸
曰此類不勝枚舉又有隱語火藥曰紅粉礮彈曰元馬巨礮
曰洋莊掘地道曰開壠口斂費曰科炭百姓曰外小遺矢曰
調化溺曰潤泉社稷宗廟寺觀俱曰妖悉令燬除書籍字紙
亦曰妖必殘踐而後快官兵曰妖兵官曰妖頭自賊中逸出
曰變妖別刊時憲書謂爲頒歷單月三十一日雙月三十日

每年以三百六十六日爲率初不許用日月二字旋仍用之
謂由天父改遷又捏造天兄昇天等節凡六其稱呼洪逆稱
萬歲東賊稱九千歲西賊稱八千歲南賊稱七千歲北賊稱
六千歲翼賊稱五千歲其餘僞王稱千歲妻俱稱王娘子稱
嗣君僞官丞相以下俱稱大人妻稱貞人子稱公子陷永安
以前附賊者稱功勳加一等僞王昆弟叔姪俱稱王宗亦設
女官其在僞府者有女丞相女檢點在外統帶女館者有女
軍帥女百長其服色尙黃次紅紫次青藍黑白僞王繡龍餘
各有等差僞王居爲府官居曰衙闔城千數百處僞府則有

轅門二大門三高可數丈門牆壁彩畫龍虎甬道中築亭一兩旁懸金鑼數十有事則鳴鑼以達門以內不許男子入以侍女傳遞肴饌酒漿皆僞典廚官自外傳進後皆有堂室園囿多者數百間少亦六七十間若僞衙則擇民居之高大者加以粉繪或用紅箋作聯或以黃紙寫硃字徧貼大門爲美觀門外多建瞭臺高十數丈以備望遠東賊僞府在將軍署北賊在中正街李宅翼賊在大中橋劉宅賊相見下一等者跪不揖拜愛跣足雖袍服乘輿馬亦然嗜着朱履厚其底高者幾半尺許每乘馬出攜洋人所製八音盒鏗鏘作聲以爲

樂將與官軍角拒發僞令必先吹角以集人至北賊僞府聽令以賊目執尖角令旗率衆立俟指揮戰必驅被脅者在前列積賊隨其後敗則跪祈天父官軍或謂其有妖術往往竟疑懾不進僞撰之書則有天理要論天情道理書千字詔原道救世歌舊遺詔新遺詔天父天兄下凡詔書行軍總要士階條例制度則例天道詔書眞聖主詔武畧醒世文三國史三字經天朝田畝制度太平軍書太平營規天條書改定四書等類逼人誦讀僞律一百七十七條點天燈者三五馬分屍者三斬者四十一杖者五十二鞭者七十八婦女有罪入僞

宮重治僞宮之刑曰天燈分屍剝皮鐵杵頂車皆死刑反弓
跪火杖脅鞭背木架皆生刑僞天條十事一拜邪神二殺人
害人三不孝四姦淫五竊掠六欺詐七私藏財貨八變草九
三更十吸烟變草投効官軍之稱三更逃亡之稱違者立斬
違者未嘗有斬斬者必言其違此賊之所以爲賊也是年英
吉利國駐劄香港使臣波能乘輪船至金陵使其繙譯官密
陀士持書入城告以英人守局外之義且詰難教事以賊剿
襲其教惑眾也洪逆得書命東賊西賊作覆謂我天父上主
皇上帝六日造成天地山海人物天兄耶穌代世人贖罪天

下本一家四海皆兄弟、不料我天國爲滿洲奪取徧地立土、木偶像敬拜邪神、大失真道、耶穌初顯聖外國傳下聖書、英國信之近又顯聖天國遣使迎我主昇天封爲天王、令將三十三天邪神驅入地獄、自戊申年三月天父降凡、九月天兄降凡、助我天王成萬國真主、以來六年於茲矣、爾遠人願爲藩屬、天王歡樂、天父天兄亦歡樂、旣忠心歸順、是以降旨、爾頭人及衆弟兄、可隨意來天京、或効力、或通商、出入城門、均不禁阻、以順天意、另給聖書數種、欲求真道、可誦習之、癸好三月二十五日、波使得書、知其不足、與言尤怒、其稱英爲其

藩屬遂致書告絕云來書語言無狀不能理會總之中國既
準五口通商則無論何人有損我商務者我國惟以兵戈從
事波使所以致書告守局外義者蓋聞賊既陷金陵卽欲南
下蘇松慮礙上海商務也洪逆是書亦非偶然使不激怒波
使更探其意而厚結之則爲患尙可言哉八月大營右翼馬
總兵以憂憤卒於軍謚剛愍左翼和總兵旋調援皖北

附記

當賊竄湖南時賽大臣師久無功奉 旨逮問 命兩
廣總督徐廣縉爲 欽差大臣督辦軍務長沙解圍後

遠問

向提督為

欽差大臣

玲前大學士

為欽差大

臣防賊北竄

始抵省城而賊已直竄武昌徐大臣尙駐岳州亦遠問

授提督向榮為 欽差大臣復 命前大學士琦善

為 欽差大臣選直隸陝西黑龍江馬步兵由河南進

剿以防北竄賊陷武昌後向大臣日夜擊之賊不能久

踞欲由襄樊北趨偵知河南有重兵扼守遂於三年正

月初二日下竄向大臣收復湖北省城招集地方官辦

理善後事宜卽追賊東下時江西巡撫張芾駐防瑞昌

縣扼賊入境陸路而九江未設防賊遂陷之十七日陷

安徽省城巡撫蔣文慶死之諡忠 江甯失陷後二月二

欽定四庫全書

三

十一日陷鎮江府二十三日陷揚州府賊酋林鳳祥等
留僞丞相羅大綱踞鎮江僞指揮曾立昌踞揚州而驅
婦女資財運回金陵徑率賊二十一軍北竄每軍多者
數千人少亦不下千餘金陵之賊復分股西竄江西湖
北四月漕運總督楊殿邦由淮安馳防揚州結營邵伯
鎮琦大臣率直隸提督陳金綬內閣學士勝保先後抵
揚州號江北大營北竄賊自江浦六合擾安徽滁州占
臨淮關二十一日陷鳳陽府勝學士分兵進剿五月初
七日陷河南歸德府犯河南省城是月兩江總督慧成

署漕督查文經漕督福濟先後會兵圍揚州左副都御史雷以誠奉命巡視黃河溢口亦請旨剿賊捐資募勇自成一軍紮營揚州萬福橋屏蔽裏下河各州縣禮部侍郎曾國藩以親喪在湖南湘鄉籍有詔使治鄉兵因募勇仿明戚繼光編東隊伍法創爲湘勇營其制每營五百人擇官紳誠樸者率之又創設水師礮船均厚其資糧嚴以軍法日事訓練爲諸路之倡署湖北按察使江忠源奉旨飭赴江南大營旋以賊犯江西省城率軍往援遂不果上以河南爲瀕河要隘逆氛

詠總督爲
欽差大臣所
河

湘勇出境則
敬

行學
法

未靖 命直隸山東山西各省合力防河事權一統於
欽差大臣直隸總督訥爾經額六月訥大臣勝學士
將軍托明阿等會剿懷慶府之賊七月曾侍郎駱巡撫
派勇馳援江西湖南湘鄉諸生羅澤南率其弟子鄉人
自成一軍與劉長佑解吉安之圍爲湘勇出境剿賊之
始時各路統兵大臣頻以戰功入告而逆黨尙縱橫出
沒分陷江南北各省郡邑未克翦除重城亦未有克復
者 上洞知其弊降 旨仿嘉慶閒堅壁清野法或築
壘浚濠或練丁團勇守望相助一隅有警附鄰畢至使

賊進無所掠退無所歸不能乘便空軼自軍興迄蕩平此爲首策又各路軍餉浩繁大軍四集帑項不支揚州雷侍郎以誠自成之軍尤無取資處因江都之仙女廟鎮各會館舊有抽收釐金章程遂於是月仿行以濟軍需坐賈則按月收捐爲板釐行商則設卡抽收爲活釐按貨值之厚薄約取百分之二三商賈不病累而軍餉以充後各省循行之裨益非淺是策實建自其幕客錢江侍郎特取以用之耳江才大傲物侍郎深忌之卒於杯酒閒一語不遜被惡名以死天下寃之江字東川浙江

勝學士爲
欽差大臣
納大臣逮問

惠親王爲奉
命大將軍併
部王爲參贊
大臣
都城設巡防

山陰諸生八月懷慶賊竄山西陷平陽府直抵洪洞縣
山西巡撫哈芬逮問勝學士追賊先至收復平陽訥大
臣請回師直隸之正定府備堵禦得 旨令上 欽差
大臣關防卽授勝保爲 欽差大臣 賜神雀刀副將
以下先斬以聞訥總督旋逮問賊復由山西竄直隸境
上厯念畿輔重地尤宜速彰 天討 命惠親王爲
奉命大將軍科爾沁郡王僧格林沁爲參贊大臣總統
四將軍督旗營察哈爾精兵會勝大臣進剿並於都城
設巡防所時江西省城解圍湖北黃州漢陽二府復陷

十月賊擾直隸天津府踞靜海縣又陷安徽桐城舒城
 二縣犯廬州府廬州安徽文武大吏所僑寓以為省治
 者也十一月曾侍郎軍發衡州夾湘江水陸而下十二
 月僞豫王胡以晄以十數萬賊圍廬州援兵不得近十
 六日城陷安徽巡撫江忠源手劍自刎不死有健兒負
 之走巡撫力嚙其項得脫身投古塘正命焉諡忠烈
 鄞陳康祺郎潛二筆曰金陵失守中外輿論咸歸咎制
 府陸建瀛之僨事蓋萬口一詞矣時祁文端公弟文節
 公皇朝證法考未列幼幼章方伯以守城悲憤歐血
 章方伯此言文節疑誤

殞命文端哭弟詩云巖巖制府公抵掌運才智提兵扼

九江庫藏悉羅致神礮五百餘盡數充武備原注上海購礮六百

尊僅以四十京帑六十萬併取毋遺置原注部議三十萬給軍三十萬

守城督帥遺之以危城置之於死地又云疆帥控上游

初議豈不壯舳艫互千里江皖賴保障前茅甫遇賊一

戰總戎喪翩然乃退飛踉蹌棄兵仗匿迹歸白門吾民

復奚望城中十萬戶湍決各奔放大府方閉閣猜嫌仍

未忘又云追思僨事繇後懦而前亢若使謀乃進據險

審所當縱退時猶紆援軍勢可仰原注時向軍門自湖北統兵追賊已及九

江巖城民氣固內外力足抗

原注弟借帑各關儲糧練勇布置周密民不驚徙若

前軍徐退小孤東西梁山重險不

此錯竟誰鑄此災實

無妄讀公此詩可見制府之貽誤大局實軍興第一罪

魁嗣以薜茈黃巾身膏亂刃 顯皇帝憫其一死即亦

不復追咎封疆此正 聖朝體卹之深心包涵之大量

康祺竊謂鄭祖琛何桂清輩本以試帖楷書進身駸昧

空疏游膺節鉞猝罹禍變顛蹶何奇沔陽制府平日賓

禮賢士罕究儒書迹所施為尙不肯自居庸懦不意臨

變失措頓喪生平以致東南門戶江皖藩籬盡壞於九

江之一著較張浚符離之敗房瑁陳陶之潰殆有過之
士大夫與人家國謀人軍師顧可不自審量貿然一出
與

郎潛二筆又曰軍興以州縣殉節者不可枚數而上元
縣劉公同纓烈聲最著公初權吳縣善捕盜移治上元
兩年尤得士民心咸豐二年聞武昌警嘗上防江策於
總督不能用自九江師潰總督喪氣歸布政祁公憂憤
疾篤公羅掘得五千金穀二千石爲民倡儲粟運石修
火械召義民登陴力捍三年正月至二月守十餘晝夜

不稍懈地雷陷城突入賊數百人公揮衆戮之城復完
賊緣梯而上如蟻集衆寡遠不敵守者驚散公還署殺
二妾朝服坐堂皇賊望見顏色慄然皆嘆曰若好官吾
儕勿相害也公大罵躍入署後潭中以死後潭旁每夜
見神鎧旗旒賊甚怖之相傳公知深勇沈志節遠大罵
賊而賊不忍害賊且知公好官矣而奈何防江策之不
見用也

時有獨秀峯題壁七律詩三十首紀賊起粵西至徐大
臣接辦軍務止事甚詳海內傳誦有壬子仲冬自序玩

末首其人嘗出仕聞尙有眉鼻隨聞錄及金陵陷後事
要皆不免譏刺然自是實錄

四年甲寅二月廩生張繼庚內應事洩死之繼庚字炳垣上
元人賊圍長沙隨湖南布政使潘鐸在城守禦因稔賊情狀
長沙解圍回金陵金陵當事耳其名屬籌城防時賊已犯九
江東下迨城破繼庚遂陷賊中變姓名爲葉子法隸僞北王
府課諸賊將子弟讀而陰結識豪傑士欲以奇功復金陵新
附賊多楚北江皖人繼庚爲陳說大義皆涕泣受教旣而楚
南兩粵人亦有附者更屬金陵人轉相糾約至七八月閒同

志者已不下五千人繼庚上書向大臣請爲內應書七上許之而與約師期則疑慮不進乃請以賊裝閒道詣大營面陳機宜向大臣韙之約期正月初七日爲賊中元旦乘賊不備進兵神策門先是繼庚與守城賊將陳桂堂約若官軍來則塞城上礮眼不發火桂堂且許斬關應俄桂堂他徒後來者驟難糾結初十日官兵至城下見無應者遽返繼庚所部署皆一時意氣相矜許至是不能無疑繼庚見事且敗亟詣大營重約師期議令同志者於某日至儀鳳門外買賣街與官兵相見官兵五百人佯爲鬻物者如期果至把持城門接應

官兵入城而以大隊隨其後是日值雨軍營馬甲洶洶有聲未及買賣街賊已覺城頭發礮同志者至城已閉兵退城啓始入賊由是大疑因於城門內爲窄巷兩頭增置大木柵守以悍賊繼庚急與大營計招六品軍功四川酉陽人田玉梅等九人入城並約先募之勇士張丫頭於次日昧爽斬守門守礮諸賊柵破而賊大隊至遂他匿賊知有內應搜各僞館得二百人殺之田玉梅伏僞將軍孫知禮館爲其持扇小童首於賊賊方密緝而田玉梅已先逸賊收孫知禮殺之繼庚舉事半年餘三詣大營賊固偵知有內應事但聞張炳垣爲

之魁而不知其何如人雖極物色不可得有張沛澤者亦嘗與繼庚其事以索繼庚財物不遂二月十二日遇於途使巡邏賊縛之賊猶謂爲葉子法也張沛澤證以前後事賊始以毒刑拷掠窮究黨羽繼庚曰吾衆不可以數計汝以名冊來賊與名冊繼庚指兩粵楚南人之剽黠號善戰者賊怒甚隨指隨殺之已三十餘人賊乃悟迫令指楚北金陵人則瞑目不語任其拷毒卒不及同志一人賊遂輟其屍時三月初六日也繼庚臨刑作絕命詞有云拔不去眼中釘嘔不盡心頭血吁嗟窮途窮空抱烈士烈殺賊苦無權罵賊猶有舌張了

頭者素無賴城陷後能以智容於賊中周一歲未爲賊得繼
庚聞其名與約許之事旣洩賊未知殺儀鳳門守賊者卽張
了頭嗣爲其同居人沈姓漏洩遂被獲詰所主使亦至死無
一言沈姓業獸醫亦金陵人旋自城走出爲大營所誅繼庚
同謀金和賈鍾麟李鈞祥何師孟皆諸生韋布亦嘗引官兵
入伏城中夜起殺賊以有備不得逞先後脫去嗚呼繼庚志
足尙惜猶未熟慮也此何等事乃延踰半年約衆至數千烏
得不洩矧向大臣左右少正人無謀士乎雖然繼庚不死矣
江南春夢庵筆記曰歷觀僞示織營總制吳長松句結外兵

朱九妹私藏紅粉欲害東王周錫能謀反外攻內應陳先進
張丙等七十餘人通妖作怪此皆蓄志殺賊事洩被戕者不
識官兵曾知之否倘褻揚未及忠魂不瞑云是記湖北江夏
縣沈懋良難中作張丙殆卽炳垣歟吳長松等殆炳垣同志
歟是時洪逆僞府日漸開拓僭縱工役日必千人已興造年
餘府前有牌樓一上橫四大字曰天堂路通大門額曰榮光
門二門曰聖天門皆冠以眞神兩字兩旁有柵柵內橫額數
方皆僞僚屬所贊頌左右有亭高出牆外覆琉璃瓦二門內
僞朝房東西各數十間西有一井以五色石爲闌上鏤雙龍

石質人工俱堅緻非近時物僞殿前牌坊一上下雕龍文飾
金彩僞殿尤高廣梁棟塗赤金文以龍鳳四壁彩畫龍虎獅
象僞殿東有牆一圍鑿池於中池中以青石砌一船長十數
丈廣六七丈備極工巧內室多至千數百間僞王娘以下備
媵妾者一千二百餘人而侍女不與焉逆旣荒於色深居簡
出一切不聞問於是東賊漸跋扈不可制東賊僞府自將軍
署遷於旱西門長蘆蕩使何宅榜曰正九重天府規模服御
幾與洪逆埒性尤淫縱逼取民女未盈十七歲者三十六人
爲王娘好殺人奇酷之刑多爲所定出必前後擁護數千人

金鼓旌旗之屬凡數十事轟雷耀日繼以綢紮五色巨龍音樂從其後號曰東龍樂已大輿至輿夫五十六人輿內左右立一童執蠅拂捧茗碗曰僕射輿後僞屬百餘人又繼以龍乃畢顧僅至洪逆處或登城他弗往也見洪逆不跪稱曰二兄自稱曰弟此惟東賊得稱餘皆不可嘗造大牀四面玻璃中貯水蓄金魚荇藻枕長四尺二寸此可見淫亂之一端北賊僞儀制半於東翼賊又半於北賊中初以演戲爲邪歌繼於池州得戲班衣服器具數十箱回金陵乃招優伶裝演築臺清涼山大樹下東賊觀之喜於是皆尙演劇作樂歌唱各

偽府朝夕敬拜天父男樂在外女樂在內徧搜城內曾爲樂妓者充之每逢各賊生日饋物者不絕於道而女館此風尤盛以糯米製成各色饊餅列於方几令人肩之前行導以金鑷黃傘女官乘馬隨之送入偽府至日往賀陪誦贊美酬謝天父洪逆父子生日俱賜宴畀以金牌皆先期逼人入貢院考試洪逆爲正試東賊則東試餘仿此所取偽狀元榜眼探花傳臚各一偽翰林數十偽進士倍之一日東試逼多士賦詩題曰四海之內皆東王有諸生夏家銑者作詩起句云四海皆清土安容鼠輩狂人皆思北闕世忽有東王賊大怒支

解之又有某生者賊脅就試終卷有罵賊語亦被磔又恆逼民女百人送總理女營偽贊王蒙得恩處再選約得十五人以進洪逆東賊各六人北賊二人翼賊一人謂天父賜美女以償其勞當賊大治偽府掘取全城階石及運土石加築城雉時得古碑數十有梁司馬散騎常侍蕭誕碑夏侯隨碑荆王府長史司馬景德合葬碑檢校侍郎左庶子魯公諒碑又有二白石碑一則中列漢隸十二曰四輔登四將口重譯至八方甯四闢作波浪文上一巨印弗能辨一曰四輔登四將生重譯至萬年青字外有界畫界外東列東口二字西列西

平二字南列南豐二字北列北星二字字外有波浪文界畫一道其外則東北列渤海二字東南列口海二字西北列史相二字西南列大府二字皆小篆字旁又各列一卦成八方形又有一碑特奇高丈餘闊三四尺質黑如漆上鐫一女子支頤閉目頸拖長帛下有古篆數字人不能識扣之若空其中者賊疑中有寶物擊之不少損又得一石狀如猪尾大耳小長約三尺高二尺石質極良賊碎之腹中五臟咸備質重若此初非供玩之物不知何所用也碑石後皆毀失賊偶獲逃人見其翦髮酷刑迫問以通大營對賊遂吹角傳集城人驗髮有

經刀翦者驅入貢院並令男女館查有翦髮者速自送至隱
匿者罪不赦於是男館得二千餘人女館數畧同蓋其時陷
賊中男女髮際多生蟻虱久而叢結愈甚不得已翦短之賊
不問悉指爲通外旋有東賊妾母鳴其子寃者乃令館長加
保得釋僅戮百餘人越日有踰城逸出者爲賊所獲卽前翦
髮之人賊怒施以火烙火錐逼認作內應凡前之取保得釋
者仍拘至禁男子於十八房禁婦女於兩旁矮屋中每日僞
指揮僞侍衛等訊以非刑受之者無不肌肉糜爛死而復甦
若吊指跪練猶其輕者婦女之被逼自盡者無算死於刑者

數百人賊患糧不足令僞女官傳諭欲盡驅之出城有夫及子在城者方得留僞諭一出闔城譁然或躍身於清流或棄兒於道路一時踵趾錯雜號泣聲震地土木工匠停役奔視勢洶洶將內變賊懼乃言僞女官傳令訛誤枷杖安衆心乃稍定次日命婦女齊赴小營聽講道理凡有夫與子在城者立黃旗下夫與子出外者立紅旗下孀婦處女立白旗下夫與子逸去者立黑旗下賊搭高臺張燈設樂推老賊一人登臺高坐講說天條並言天父天兄天王東王莫大功德以惑衆聽賊中凡有舉動必講之曰講道理自是男子每日給米

僅半斤婦女六兩不足則令食粥男館因之逃亡者更衆計
廣西不滿千人廣東千餘人湖南三千人湖北萬餘人安徽
萬餘人江西三千人金陵僅萬人揚鎮三千人女館廣東西
二千人湖南不滿三百人湖北二萬人安徽二千人揚鎮萬
人金陵八萬人此六月數也嗣有僞典金官率衆出城守者
疑之搜其身各懷巨金白東賊閉城徧搜各僞衙有金者寘
諸獄乃得女爲男裝者數十人男爲女裝者亦數十人戮於
市東賊多疑因積賊日少乃使廣東西婦女登陴守城又使
運糠隨大隊賊中用以填塞濠溝適賊爲官兵所敗婦女竄

全陽上之三
卷一
避不及在前列者悉被擒誅其倖脫者匿淺水中以浮萍覆面仰露其鼻鄉人過而見之撲殺稱快焉七月二十五日官軍克復高瀆縣城初幫辦軍務許閣學接江蘇巡撫印後仍駐大營迨上海小刀會事起由大營抽兵督往剿辦以久未攻克削職吉爾杭阿接蘇撫任駐上海辦理金陵復抽兵助之城賊偵知大營兵力稍薄令皖南賊專力圖東壩高瀆遂失守至是向大臣遣副將傅振邦等克之城賊復分股撲七瓮橋大營經將軍蘇勒通阿參將張國樑蔡應龍等剿退數日間以少擊眾每戰必捷並以艇船絕江道賊艘不得徑下

城內米芻日匱賊於閏七月二十五等日驅婦女出城割稻縱令逃逸因之脫網羅者甚夥然死於饑斃於水及爲強暴所掠不從自殉者尤不知凡幾其女館之移於上新河者仍爲賊朝夕所驅嗣後凡女館並無米可給卽粥糜亦不得一飽於是賊酋有指配之議矣十月向大臣擊賊雨花臺大捷逼近聚寶門其通濟門之賊亦不敢復出更會揚州軍攻賊於浦口平其壘江南北通呼吸先於孝陵衛之雙拜崗地方范銅爲巨礮擬實藥轟城迨工竣試放礮身炸裂地爲之震賊無所傷遂棄置選材不精歟抑不計利害實藥未得其平

全明上三卷四十一
歟良可惜也

附記

是年正月署湖廣張總督亮基調撫山東接任者爲吳

文鎔奉

旨出省督師黃州賊驟至兵勇大潰吳總督

死之

諡文節

二月賊陷安徽太平府前學政孫銘恩殉難

諡文節

三月皖賊擾山東臨清州勝大臣奉 命迎剿迨

城陷奉

旨革職張巡撫以奏報不實遣戍以崇恩爲

山東巡撫克復州城湖北自吳總督歿後賊直陷岳州

進陷德安府及隨棗諸城署總督台將軍湧駐隨州學

使青侍郎麟自德安晉省疏陳軍事 上謂其知兵也
令與崇巡撫綸共籌防堵崇巡撫丁憂青侍郎遂爲巡
撫一無籌畫惟統標兵千餘人固守而已四月楚南曾
侍郎水師大捷湘潭焚賊舟殆盡參將塔齊布克復縣
城湖北隨棗之賊連陷陸安府荆門州以長江爲大道
荊州一府當四路之衝扼塞七省爲賊窺伺由荆至省
路被割斷其一切軍務 特詔荊州將軍官文統之五
月安徽福巡撫濟與和提督春克復六安州六月初二
日湖北省城陷布政使岳興阿謚剛按察使曹懋堅糧

道李卿毅

諡愍肅

死之青巡撫爲眾擁出欲赴荆襄路久

阻乃與副都統魁玉都司楊昌泗南走長沙繞赴荆郡

奉旨正法魁玉楊昌泗革職留效當省城失陷台總

督尙在德安亦奉旨革職以楊霈爲湖廣總督陶恩

培爲湖北巡撫七月曾侍郎水師道員褚汝航知縣彭

玉麟都司楊載福等克復岳州府塔提督齊布陣斬僞

丞相曾天養閏七月向大臣遣副將傅振邦參將張國

樑攻皖南太平府城外各賊壘張參將首先衝入直逼

城下所向輒靡遂克府城揚州琦大臣薨於軍

諡文勤

上以江甯將軍托明阿爲 欽差大臣接辦揚州軍務
八月留湖北軍營之四川按察使胡林翼爲湖南駱巡
撫奏調赴岳州辦賊旋授爲湖北按察使十月賊酋陳
玉成自蕪州竄廣濟聯合僞燕王秦曰綱僞丞相羅大
綱分黨死守九江對岸之小池口各要隘以扼水師湖
北賊畧平官將軍以保荆襄功居第一維時淮北一帶
擒匪亦粗定擒匪者捏匪也不逞之徒聚捏成隊肆劫
掠俗謂擒子各聚其處江蘇則淮海徐安徽則穎亳壽
河南則南汝光山東則兗沂曹濟湖北則襄棗鍾隨以

各省論皆屬邊界以大勢論則居天下之中譬若鷄卵
中黃獨堅故此數十府州縣之民類多慄悍承平之際
僅與攘奪竊盜等兵與後則與粵賊聯爲一氣或令分
擾以掣官兵或令前驅以彰其燄何慮千百股與粵賊
相始終袁京堂甲三奉 旨剿辦駐兵臨淮關號臨淮
軍十一月曾侍郎督水陸血戰大破賊於九江湖口及
孔壠驛小池口諸處進逼九江府城疏稱湖北按察使
胡林翼識畧冠時調令來潯助剿副將王國才都司畢
金科請歸其調遣得 旨報可時皖軍和提督福巡撫

久攻廬州不下欲斷其接濟而東南一路通巢湖賊運糧不絕計惟有以偏師先取含山制其死命以地遠勢險難其人翰林院編修李鴻章合肥人有膽識嫻韜畧先爲呂侍郎賢基奏帶赴皖時在廬州戎幕慷慨請行福巡撫壯之令帶練勇會吉林馬隊繞道趨含山三戰三捷不十日克縣城

金陵兵事彙畧卷二

江甯李圭小池

咸豐五年乙卯正月東賊忽頒僞諭大小酋目得娶婦此令
一下諸女館之被逼有不堪言者矣先是僞天官丞相曾水
源以往蕪湖誤期削僞職其弟怨悔逸去東賊怒疑水源使
其弟通官軍而於中爲主謀以五馬分其屍因謂賊衆曰新
附者屢叛固無足怪何與我同起粵西者亦復潛逃豈我待
水源恩不厚歟衆曰昔在金田永安時天父曾許至金陵小
天堂男女團聚乃至已三年衆仍無家咸謂天父誑人故皆

思去恐將來益不可遏耳東賊曰汝輩真不測天父之高深矣日愈久則配愈多今汝輩欲速職之尊者一人僅得十餘人下則以次遞減得毋又謙不足乎俄而東賊佯作天父下凡狀謂蒙天父恩許男女得配偶設僞媒官男一女一凡積賊爲僞丞相者得配女十二人僞國宗得配女八人他僞官以次遞減無職者亦配一人原有婦者許歸其室令僞巡查查女館自十五歲以上至五十歲者開列年貌註冊以候選擇凡男賊求配報名媒所令僞媒官掣簽係某女子在某館某僞軍某百長名下持簽至館索出挾置之轎間有老夫得

少妻童子獲鳩母者均弗之易有不願配之女子尋死弗獲
東賊令斫其手足示衆以懾逼配之婦女於是飲泣含冤者
不可殫述其潔白自矢者或在館自裁或半途投水或已入
轎而以刀翦自戕尤不可以計數女館遂爲之一空其在外
之賊亦得掠配或竟逼娶從此諸賊無不暱少婦擁多資爲
賊酋盡死力然凶悍之氣亦以此而漸殺焉其男館之人逸
出甚夥餘則或被驅出當矢石死或受折磨死其尙留賊中
者非身被拘束思出無由卽無賴之徒甘心從賊故後此人
數莫可稽攷方女館之未配也東賊慮其閒居爲不善工作

而外時傳僞令以勞苦之時而令每女館各覓井闌一時而
索小鼠數枚時而索蟹蟲數對限日送僞府違則治罪賊中
詫爲神奇羣揣度其作用實則送之卽棄之其智計陰鷲乃
爾賊初設買賣街於城外繼見藉此逃亡甚多乃立五市於
北門橋然物價踊貴賊又以爲不便旋罷賊閒於井中或花
臺啟得金銀於是令於各處搜掘又徧搜廢銅鑄錢其文一
面爲太平天國一面爲聖寶或重寶字樣狂悖可哂而輪廓
肉好亦頗整齊至今或見之蓋銷毀未盡者也二月賊分股
竄高資夾江而陳圖牽制官兵並擾及句容十九日向大臣

遣官軍毀其土壘三月向大臣會揚州軍敗賊於江浦賊蓋
以上年官軍逼賊於聚寶通濟等門城賊危促乃糾合瓜鎮
之賊約期進犯也復會軍踏平沿江賊壘焚毀賊解三山營
一帶江面肅清四月賊竄至江甯鎮亦爲官軍擊退十一月
十六日龍膊子等處賊大股出竄意圖往援瓜鎮經張總兵
國樑等由仙鶴門甘家巷一帶進攻賊以二三千人來撲張
總兵從後路兜至縱橫抄擊斃賊無算生擒二百餘人另股
自東陽竄棲霞街焚掠張總兵繞至牌頭庵與總兵德安等
衝擊斃乘騎賊首一名僞丞相周少魁等四十名追至石埠

橋江邊十九日復會秦總兵如虎敗之於觀音門又斃賊二千餘人餘賊逃歸城中同時六合防軍攻破九洑洲賊壘此處爲金陵援蔽在下關對江賊踞爲老巢堅築石壘列巨礮三層環浚深濠與下關賊營相犄角悉銳守之以扼泝擊之路爲竄江北進步屢攻未克此次經升用府留署六合縣溫紹原派都司秦懷揚千總王家幹攻之乘大霧疾進越濠數重緣壘而入賊覺死守並分賊抄襲賊衆兵寡事急王家幹取賊礮置膝上實藥轟之羣賊駭潰遂克其壘以孤懸外江未能堅守復爲賊踞嗣僅於十年正月爲張總統攻克旋亦

失守至同治二年始克焉

附記

是年正月江蘇吉巡撫克復上海縣先是三年次另股土匪劉麗川等倡亂上海戕官踞城號小刀會與粵賊通縣爲洋商總埠百貨盈仞賦稅所出官軍攻剿無功四年十二月二十九日江甯府知府劉有厚剗地道成實火藥轟塌城垣二十餘丈正月初一日虎總兵嵩林等奮進擒謝安邦陳芝等追殺劉賊於虹橋此股悉平僧郡王破賊於連鎮擒賊酋林鳳祥檻送京師處死河

胡巡撫駐軍
上游

擒李開芳

北軍告蕞

北肅清三月賊陷湖北省城巡撫陶恩培諡文節死之胡

布政林翼奉 命署湖北巡撫駐軍上游圖進取曾侍

郎軍克復江西廣信府浙江何巡撫桂清亦派兵克復

徽州府江西陳巡撫啟邁派兵克復饒州府四月渡黃

河賊衆悉爲僧郡王俘獲於馮官屯生擒賊酋李開芳

檻送京師處死北軍告蕞於五月十五日行凱撤禮大

將軍及參贊大臣恭繳印信關防京城巡防裁撤在事

文武 賞賚有差西安將軍扎拉芬奉 命會剿湖北

隨州賊失利陣亡諡武介楊總督由棗陽走襄陽奉 旨

革職以官將軍爲湖廣總督六月 特授察哈爾都統
西凌阿爲 欽差大臣至楚會攻德安府江南向大臣
遣張總兵國樑敗賊蕪湖再克太平府七月湖南提督
塔齊布卒於九江軍次楚軍驍勇之將塔提督爲最都
司畢金科次之皆能身負數器匹馬穿出敵陣之背羣
賊熟視而不敢逼者九月西大臣以久攻德安未克革
職 詔授官總督爲 欽差大臣馳赴德安督剿十月
皖軍和提督福巡撫克復廬州府官大臣克復德安府
十一月楚軍水師破賊於金口沙口胡巡撫商之官大

上游大局定

臣令楊提督載福率都司鮑超等駐水師金口慎江防
 綿將軍洵等領馬隊駐蔡店等處扼北竄羅澤南偏師
 出嘉魚會胡巡撫攻武昌官大臣督李孟羣攻漢陽仍
 互為應援期在必克於是上游大局定矣初賊陷鎮江
 時有捐職都司劉廷鏌販商也帶勇從上海來勇而足
 智敗賊於鎮江南門逼城為壘賊不敢南向者二年迨
 廷鏌戰死賊乃猖獗附鎮城江中水營二一為周總兵
 士法所部浙艇泊焦山一為陳總兵國泰所部粵艇泊
 金山而瓜州賊結連鎮賊往來金焦間晏如揚州託大

臣虞瓜鎮賊北犯築濠於瓜州之北以扼之

六年丙辰正月城賊糾合上游賊數萬由陸路嘯聚於倉頭鎮勢頗銳余提督萬清虎總兵嵩林等不能止遏張總兵國樑奮銳摧其中堅截殺賊不能首尾顧俘斬數千始遁去三月江北賊闖入江浦浦口攻及六合德大臣派兵往擊張總兵渡江往援駐六合之龍池會溫紹原兵擊敗之十八日克浦口二十三日克江浦賊圖取道六合渡江而南張總兵自率驍健邀擊之不使一賊得越賊不得已仍從金山絕流而渡徑攻高資初吉巡撫既克上海移師駐鎮江營城南九華

恩陷江浦

克復江浦

賊攻高資

山余提督萬清一軍另營城東京峴山等處掘地道轟城不
果克時吉巡撫已受幫辦軍務任慨然謂攻堅不如斷糧野
戰不如扼要高資乃賊運糧要道因於四月飭候補道劉存
厚結三營於高資煙燉山以扼之金陵賊大恐出賊數萬由
旬容與北來賊會合盡力來犯劉道被圍知縣松壽鹽知事
張翊國戰死諸將各固壘圖自保吉巡撫所統不及萬人親
往救之衝入高資營賊衆四合吉巡撫登高瞭望中擡礮死
諡勇劉道欲翼其屍出不克血戰死諡剛向大臣得信遣張
烈愍總兵自六合馳至則已不及五月十五等日戰於丁卯橋勝

之又勝於五峯口磨箕山賊回走九華山張總兵復乘夜往襲其營破之賊皆棄壘竄回金陵議夾攻以撼我大營當高資搏戰時皖南賊突於五月十一日竄至溧水陷之大營派張玉良往十三日駐大仁山十四日抵溧水北門旋以大營喫緊撤兵回護甫至而鎮江之賊已趨金陵從東而西金陵之賊從西而東溧水大小金柱關黃麻渡等處之賊旁出衝擾向大臣因分剿甯國溧水屢經抽撥兵力過單遂難止遏城賊復出通濟門會龍膊子羣賊直撲七岔橋大營官軍併力截殺賊來益衆紛紛潰散十八日夜大營火起張總兵始

向大臣退保丹陽
賊陷句容

張總兵總統南北
諸軍

突圍保向大臣衝鋒出收聚散卒於十九日由涪化鎮至句容旋退保丹陽句容亦陷賊衆南趨分途進逼重營叠壘以百計和定橋鳳皇岡五里牌黃莊橋皆賊巡徼之所及向大臣憂憤成疾軍心渙散因奏請以張總兵國樑總統南北諸軍以一事權張總統密商諸將曰賊以吾主帥病甚衆必驕怠諸君若舍生努力擊之必大克衆皆唯命乃遣參將虎坤元游擊張玉良督馬步先攻五里牌焚賊營柵渡河至黃莊橋破其礮臺副將秦如虎由定埠南渡截賊衝明安太虎嵩林旁出伺剿張總統遂偕福將軍興整大隊撲賊巢縱火鑿

戰奪和定橋鳳皇岡之賊亦不戰而退追至黃土橋斬級數
 千丹陽城外賊壘悉平捷聞 詔以提督銜福建漳州鎮總
 兵張國樑幫辦大營軍務七月向大臣病篤以軍事付張總
 統曰汝才足辦賊吾死何憾復踊身疾呼曰終負 朝廷恩
 一慟而絕奉 旨優卹 武 諡忠 江左紳民以數載勤勞為東南
 保障實能禦災捍患呈請入祀江蘇名宦祠張總統既擊走
 丹陽諸賊賊竄金壇復偕諸將赴金壇督精銳渡河大破之
 尋奉 旨命江南提督和春為 欽差大臣馳赴丹陽接統
 軍務時和 大臣尚在廬州未至之前權其篆者為兩江怡總

克復商瀆

張總統移營句容

督良也傳總兵振邦克復東壩後直抵高涇縣界立營率大軍會高涇文武進剿縣瀆湖蘆葦苞蘖塞港蔽州賊潛伏以狙害官軍先遣參將李定泰等帶練勇為鄉道燒賊船數十賊敗潰於八月二十三日克復縣城乘勝進攻溧水張總統亦攻克寶堰一帶賊巢進逼黃茅莊拔之遂由白兔鎮移營句容時城內各逆首以向大臣薨羣相慶賀東賊素以洪逆為贅疣自是以向帥之亡為己功將謀篡偽位先集偽丞相尚書等告之曰天父昨下凡謂余等至天京受困於向榮備歷艱難乃得長享天福今向兵退秀清功大當稱萬歲僉曰

有天王在恐不能東賊怒殺之召僞承宣僞指揮入告之僉
曰必有以稱天王乃可東賊怒囚之乃召僞參護等入告亦
如之咸踴躍舞蹈謂東王功德巍巍宜稱萬歲東賊悅入告
洪逆稱天父下凡及羣意僉同宜稱萬歲洪逆曰三弟功大
輕酬勲勞懋著萬歲之稱久宜順天應人願將何以處我曰
二哥當稱萬萬歲洪逆佯喜許之期以八月東賊生日爲始
東賊復慮洪逆之不能容潛欲作難其信任之左右私往白
洪逆乃密下僞詔召北賊翼賊令回兵共誅東賊北賊在皖
得書夤夜疾馳八月初六日回金陵東賊不許入城再三懇

請乃許以輕騎入隨從毋得過十人北賊入請見洪逆佯不許謂遣爾往援廬州何得擅回罪當誅其亟詣東府請命倘赦爾罪尙速赴援毋緩而陰授意謂如此則彼不疑爾可於見時圖之北賊卽往東賊府請謁求赦東賊立時延見曰弟事當代爲之請乃告以洪逆許稱萬歲弟知之否北賊曰三兄勲望無比久當明正位號特弟等不敢請耳因膝前賀東賊大喜賜宴酒酣北賊從者環侍左右東賊問曰若輩何人也北賊以麾下立功之衆對東賊遍賜以酒羣前叩謝北賊以目示意咸拔刀斫東賊殊其首北賊探僞詔出言天王有

詔秀清謀逆希僭大號衆共殛之旣爲東孽以五馬分其屍
子女侍媵悉駢戮火其僞府投其屍於鐵鑊煮之成糜呼羣
賊啖之立盡傳僞諭凡東孽官屬悉於翌日辰刻至天王府
聽令明日東僞官至盡驅入僞朝房鍵閉竟日內有攜火藥
者因縱火屋高不及燃北賊覺傳洪逆僞詔曰閉汝等於室
中俾自知悔當卽赦罪復官今猶懷憤縱火謀叛之迹顯然
赦必爲患因盡坑之並殲其妻孥無一免者餘黨洵懼欲集
衆攻僞天王府城中於是分二黨旱西門爲東賊黨花牌樓
爲北賊黨日相鬪殺屍積如邱內外城悉下鍵街衢閒寂無

人其未盡之黨洪逆妻復詭言於衆曰韋誅極太甚辜罪當笞四百若前在東孽部屬者咸來觀無阻北認罪越日來觀者如市洪妻宣僞天王詔命撻如數佐而突以甲圍觀者東賊黨五六千人齊被執意謂死皆就縛洪逆命盡戮之自是無日不搜殺雖孩提役也死者不下三萬人當翼賊得洪逆書方在湖北路遠發遲未及卽至迨抵金陵而北賊已殺東賊正黨城中大擾其戚亦在戮中翼賊以告北賊曰東孽其下何罪何得盡戮毋乃自戕手足倘外兵知之乘

將何以禦北賊曰汝將亦黨東孽共圖報仇以殺我乎翼賊懼乘夜縋城遁北賊知之盡誅其家屬翼賊憤甚上書洪逆請得韋首否將攻城洪逆謂北賊曰汝不聽達開言斯已矣戮其妻孥不亦虐哉北賊自謂有功於洪漸增德色今洪逆忽微詰之負氣不相下反戈圍洪逆僞府洪逆黨不服因與東賊敗黨同攻北賊數日北賊敗遁洪逆亦令誅其全家北賊雖得出城其黨從之者僅三四百人渡江至江浦適遇前使竄擾在外之東賊黨一戰擒之解回金陵獻洪逆令卽斬首時聞翼賊糾合上游賊黨將至金陵修怨乃函北賊首至

其軍前止其行遇之於甯國翼賊令將北賊首示衆出偽諭
貶爲北孽北賊僞官在外者亦盡殺之嗣翼賊率其衆至金
陵黨羽如林洪逆所統各衆皆與交歡願舉之輔僞政而洪
逆以前釁深加猜忌其長兄僞安王洪仁發次兄僞福王洪
仁達尤蹈其隙於是僞屬皆不悅翼賊亦遂出竄安慶思獨
樹一幟不與洪逆通而城中一切僞政悉歸安福矣聚寶門
外有佛壇在報恩寺爲明永樂年建高十三層自地至頂二
十餘丈覆以琉璃瓦爲海內諸壇冠先三年賊舉火焚之空
而不圯本年復深掘壇基埋火藥轟之霹靂一聲化爲烏有

一時有拆寶塢自相殺之謠今果應九月初八日張總統奪句容之近關橋十四五等日敗賊於吉利村擒斬極衆復會傅總兵虎參將等直抵溧水城下賊從小道襲官軍後官軍已踰濠附城奮勇回殺賊不得前溺死殲死者千計城賊自夏秋以來與句溧兩城相犄角爲大營患經此次懲創始氣沮大營獲安十月和大臣自皖北抵句容

附記

是年二月鎮江賊渡江糾瓜州賊北犯金陵復撥大股助之三月初一日揚州陷知府世焜等巷戰死托大臣

托大臣革職

德都統爲
欽差大臣

兵潰退保北路副都統德興阿邊賊進竄賊復撲萬福
橋圖竄裏下河經總辦糧臺江甯布政使文煜擊退

詔革托大臣及幫辦軍務提督陳金綬前侍郎雷以誠
職加德興阿都統銜爲 欽差大臣以在營之少詹事

翁同書幫辦軍務德大臣隨於十三日收復府城是月
布政使銜浙江甯紹台道羅澤南力攻湖北省城因傷

殞命諡忠節 胡巡撫派其弟子記名道李續賓統其衆四

月至七月曾侍郎軍克復江西郡縣自長沙至南昌文
報無道梗憂江西全局始振八月和大臣攻克三河鎮

賊壘皖軍殺賊之功克廬州後以此爲最江西邊錢會
匪勾結粵賊竄撲建昌一帶圍廣信府署府事沈葆楨
籌餉在外聞信單騎馳回徒步守陴妻林氏爲文忠公
女同在危城中當沈署府未回之前警報日數十至林
氏懷印以死自誓刺血作書乞援於總兵饒廷選饒總
兵得書星夜奔赴而沈署府亦回城虛無人媪婢盡去
供億胥缺林氏躬汲爨具壺漿以饒士出衣飾分獎之
卒能擊斃賊衆斬其渠帥郡境肅清邊錢會者不逞之
流滋亂以錢塗硃描金爲號屢禁不戢者也九月和太

臣南行福巡撫主皖北軍務與李編修鴻章督軍克無
爲州復大捷於巢縣復其城十月官大臣督李按察孟
羣等斷武漢援賊制其死命十一月二十二日官大臣
胡巡撫同日克復湖北省城漢陽府城議息兵整旅分
堵諸邊飛咨河南英巡撫桂分剿餘匪先清北路嗣又
克武昌縣黃州府及興國大冶蘄水蘄州等城遂水陸
並下十二月曾侍郎至九江勞軍初江西自饒廣告陷
賊悉衆聚湖口致外江內湖水師隔絕省城危甚侍郎
勒水陸進援調餉轉糧人心以安今自克南康湖南援

師得至瑞州築壘扼賊自克武漢楊提督載福乃自蘄
州會李道續賓合圍九江章省亦疆圉堅固侍郎始無
西顧憂乃親至九江統水陸壹志攻取且以聯絡內外
沈知府妻林氏刺血乞援書曰將軍漳江戰績嘖嘖人
口里曲婦孺莫不知海內有饒公矣此將軍以援師得
名於天下者也此問太守聞吉安失守之信豫備城守
偕廉侍郎往河口籌餉招募但爲勢已迫招募恐無及
縱倉卒得募而返驅市人而戰之尤所難也頃來探報
知昨日貴溪失守人心皇皇吏民鋪戶遷徙一空署中

僮僕紛紛告去死守之義不足以責此輩只得聽之民則倚劍與并爲命而已太守明早歸郡夫婦二人荷國厚恩不得藉手以報徒死負咎將軍聞之能無心慟乎將軍以浙軍駐玉山固浙防也廣信爲玉山屏蔽賊得廣信乘勝以抵玉山孫吳不能爲謀賁育不能爲守衢嚴一帶恐不可問全廣信卽以保玉山不待智者辨之浙大吏不能以越境咎將軍也先宮保文忠公奉詔出師中道齎志至今以爲心痛今得死此爲厲殺賊在天之靈實式憑之鄉間士民不喻其心以輿來迎赴

封禁山避賊指劍與井示之皆泣而去太守明晨得餉
歸後當再專牘奉迓得拔隊確音當執爨以犒前部敢
對使幾拜爲七邑生靈請命昔睢陽嬰城許遠亦以不
朽太守忠肝鐵石固將軍所不容與同傳者也不則賀
蘭之師千秋同恨惟將軍擇利而行之刺血陳書願聞
明命

七年丁巳正月旬容賊仍屢出窺伺大營二十六七日復
糾大股至張總統調集各營四路合攻親率精兵開道抵城
下焚賊壘斬黃衣賊酋斃賊千餘生擒七名賊始不敢再出

時溧水賊勢亦正在危蹙金陵忽出大隊至烏山築壘爲援
二月初七日和大臣飭副將魯占鼇及傅總兵振邦等分路
進擊賊奔潰自相踐踏屍橫遍野副將米興朝復敗其出城
之衆各路共平賊壘二十餘座殲賊三千餘孽賊目僞靠天
侯以下十餘名雖大受懲創旋復糾死黨蜂擁至烏山一帶
又築壘數十座五月傅總兵督營官周天培節攻環擊令賊
首尾不暇顧外壘以次削平十四日會集城下噴火入城大
燒房屋賊內亂副將虎坤元率衆突饒登西北二門斬守城
賊酋官軍齊入殲盪六千餘名生擒三百遂克溧水縣城閏

五月二十一日張總統會傅總兵圍攻句容賊出大股死拒
總統率親兵衝入立刺執旗黃衣悍目數名始奔潰和大臣
麾軍越濠殺賊無算二十四日銜枚急進樹雲梯張總統首
先登城賊屍山積於二十五日夜克之踞賊偽地官丞相屠
姓遁至湖熟鎮傅總兵等率衆取捷徑猝至賊失措引頸受
戮無一生者九月張總統偵鎮江賊欲西竄接應金陵密於
高資增營扼要而親率精兵渡河奮擊於東北門外削堅壘
二座十一月十二日揚州軍克復瓜州同日張總統攻克鎮
江府先是十月二十九日總統大捷於瓜州南岸陣斬偽王

奪壘十七座遂合城圍金陵四次出賊來援經虎總兵坤元等追剿匹馬片帆無返者城賊猶死拒是日總統會虎總兵嵩林等四門驟攻潰垣入亥刻克之踞酋吳如孝突圍逸回金陵是年洪逆昆弟行仁玕潛入金陵洪逆大喜逾望立昇偽爵爲干天福旋封爲偽干王兼稱偽軍師掌文衡正總裁偽政半出其手特創偽府大興土木自書其兩壁云干戈底定王道蕩平適城中開偽科考選甄別悉委干賊干賊亦妄以收攬人才爲己任所有偽主考偽總裁者無不奔走其門下洪逆出一偽詔裁定節日干賊手筆也詔曰朕詔某某等

知之天父天兄太平天太平天國萬萬年茲據玕胞懇裁定
節氣平勻義更全朕今詔明甥等朕乃太平天子自戊申年
天父天兄下凡帶朕作主創開天國天京天朝天堂永無窮
盡朕今再詔天厯首重孝順那七日禮拜福祿加二月初二
謝爺爺謝爺差朕斬妖蛇三月初三爺降節從此萬國歸爺
媽正月十三哥捨命普天銘感福山河二月廿一哥登極亦
朕登極人間和九月初九哥降節亦朕降世記當初七月廿
七哥捐命天朝代代莫忘過每年六節註明頂頭永遠如是
自辛開年一直傳去千年萬年萬萬年永無窮盡甥們遵詔

爺哥帶朕坐江山天厯流傳如循環辛開起頭傳永遠永不
改元詔再頒玕胞卽干賊甥們指幼東賊楊有和幼西賊蕭
全福皆洪逆妹宣嬌所出也聞者罔不絕倒又改賊中讚美
語中天子萬年一句爲魂得升天尤怪極姑無論其升天入
地要皆死耳殆讖語也

附記

是年正月都司畢金科戰死於江西景德鎮

諡剛毅

二月

曾侍郎以父憂給假歸里兵勇暫交其弟同知曾國華

管帶 上恐職分較卑須大員統理 詔提督銜湖北

鄭陽鎮總兵楊載福就近統領而以廣東惠潮嘉道彭玉麟協同調度擊敗撫州之賊景德鎮賊竄陷安徽婺源縣圖犯浙江浙江晏巡撫端書飭周總兵天受等進攻收復縣城三月賊肆意衝突皖北鄭總兵魁士潰於桐城文武大吏俱獲譴上厯念廬州重地密邇桐城備豫宜嚴命湖北協堵官大臣奏稱按察使李孟羣謀勇素優最利行陣令督兵裹糧赴皖五月九江軍濬長濠困賊水師副將李成謀以深入失利楊提督自武穴駛回救之閏五月皖賊悉衆犯湖北仍踞蘄州胡巡

撫親赴下游察驗情形申明軍法指示方畧力固危疆
以是黃州上下烽火雖驚而武漢商賈懋遷耕耨不變
七月大創皖賊於黃岡蘄水界楊提督彭道曾同知克
復瑞州府八月小池口賊壘悉平此處與九江隔江對
峙爲江皖入楚咽喉賊壘石爲城浚濠外衛內加重垣
堅固無比胡巡撫親督水陸環薄施火箭入壘乘賊亂
克之自是全楚肅清九月楊提督彭道李按察續賓克
復河口水師傷亡極多事平彭道商之曾侍郎請於
朝立楚軍昭忠祠於石鐘山頂

平江李元度與僞翼王石達開書曰統領平江水陸全軍李元度謹寓書與石君達開足下蓋聞神器不可冒假大業不可力爭昧順逆者受誅戮識事務者爲俊傑自洪秀全楊秀清蕭朝貴韋昌輝馮雲山與足下稱亂以來計八九載矣荼毒生靈不下數百萬矣順逆之理姑置弗論足下亦將得失禍福成敗存亡之故猛然省悟運畫而熟計之乎足下已成騎虎之勢雖有悔悟之心無由自達此足下苦衷也然有絕好機會轉禍爲福不特救生靈保九族兼可垂名竹帛成反正之奇功機

不可失時不再來足下其亦知之否今且不以空言勸
足下先將爾等所以取敗之由與我 聖朝超越前古
萬萬無可抗逆之處一一詳陳如足下祖宗有靈卽願
聽敝言毋忽從古草竊倡亂如漢末黃巾唐末黃巢元
末徐壽輝張士誠陳友諒明末李自成張獻忠輩皆稱
主昏國亂天命已去人心已離乃故乘機起事然且不
旋踵而殄滅之其故何也天道好生惡殺凡爲賊首理
必先亡至若重熙累洽之世朝不失政民不離心從未
有平空發難妄肆殺戮如爾等者以爾等之氣燄視黃

陳張李百不逮一又蕭楊洪韋之現報其在足下尙儼
然得意乎其謬一也自古布衣得天下惟漢高祖明太
祖後世之亂賊皆欲妄擬二君不知彼值秦元運終之
候爲天生之眞主而又有陳項張陳輩爲之先驅且皆
五六載卽成帝業爾等倡亂已九載發難端於聖明之
朝身置禍罟所踞之郡縣又日敗日蹙黨羽絕滅過半
豈今尙在夢中乎其謬二也爾等僞示每以夷夏界之
毋論舜生東夷文王西夷古有明訓且爾等所奉乃喫
夷天主教不相矛盾乎喫夷之俗生女爲重生男反於

人舉國皆雜種無一世眞血脈爾等甘從其教肯相率
爲雜種乎且天主教有兄弟而無父子君臣以妻爲妹
母爲大妹敗滅倫常眞無人理中國能行其道乎爾等
竊發之由或因前次喫夷背叛時中國有給還洋銀之
事遂疑官軍不振相率作逆豈知喫夷志在貿易原無
窺竊之意故 朝廷以大度容之迨後求進城卽嚴拒
之矣去年在粵滋事卽盡殺而痛懲之且燒盡洋行十
三家勒賠國稅二十萬矣眞夷鬼尙不能猖獗假夷鬼
獨能成大事耶其謬三也治厯明時閩餘成歲始自羨

皇舜帝載在尙書月望則圓月晦則昃昭然共見爾等
妄欲更之弦望朔晦一概顛倒是昭逆天道所改干支
子好寅榮戌開等字所說天父下凡及六日造成山河
等語皆醜怪荒誕從古未有其謬四也孔孟之道與天
地無終極今欲耶穌之教厯孔孟而捲其席此乃古今
未有之奇變旣爲天地所不容卽爲人心所不服以此
愚天下而新其耳目黃巾等賊作何結局乎其謬五也
先聖爲萬世師卽各處祠廟亦皆有功德於民載在
祀典尤聖帝明王所重爾等皆一律毀滅無識者反以

神無顯報疑爾等有自來也不知天正厚其惡而降之
罰耳羣惡之貫盈未極鬼神亦有蒙垢之時俟其力盡
而斃之將報愈遲而禍愈酷爾等如此猖狂荼毒生靈
毀滅神像不知紀極富貴渺不可得冤孽積不能解蕭
楊洪章旣伏天誅足下能安枕而臥乎其謬六也凡此
皆彰明昭著然猶以事或有之請再以勢言之天下十
八省合奉天十有九省而又有蒙古四十八部西藏回
疆皆隸我朝版圖爾等所踞在江南惟江甯一城在
安徽惟安慶一城在江西吉安撫州建昌三城外卽非

爾等所有此皆九年之首尾僞示動稱萬國來同豈不可醜此廣狹之萬不敵也自官軍克揚州鎮江瓜州而金陵之賊困克袁州瑞臨而吉安之賊困現在金陵安慶九江吉安皆合長圍糧盡援絕如鳥之在籠不能飛出爾等所恃者堅守耳我軍以長圍圍之糧縱多圍至一年半載勢必淨盡請觀武漢鎮江及瑞臨守城之賊皆痛剿殆盡人豈爲爾等守乎此強弱之萬不敵也爾等北犯之衆渡黃河有十餘萬竟致隻輪不返且起事以來踞武漢而不能取荆襄踞揚州而不能得淮徐踞

岳州而不能圖巴蜀踞常澧而不能窺雲貴已破湘潭
矣不能溯江而通兩廣之屯巢而爲塔軍門三千二百
人所敗已破邵武矣不能乘勢窺閩浙之要郡而爲圍
丁數千人所殲此事機之多梗也自克金陵卽志得意
滿淫縱驕奢兼以猜嫌忌刻楊逆謀殺洪逆反爲韋逆
誅其全家足下爲楊逆復仇而絕韋逆洪逆更深恨之
幾至禍起蕭牆自相魚肉此種奇變足下自思當亦寒
心然非足下所自主也惡貫旣盈天必假手以正其罪
也爾等如此猜忌黨羽豈肯信乎現在裹脅之衆愁怨

日甚思逃者十之七八獨足下夢夢乎此根本之先撥也爾等起事之初以假仁假義愚天下禁擄掠禁姦淫禁殺戮人亦頗多爲所愚故所過郡縣迎附者有之犒獻者有之願先鄉導者有之此不過掩耳盜鈴其勢必不能行也不擄掠則衣食無所得衣食無所得則一切皆無所得天下有甘受饑寒之賊乎裏脅者皆無賴之徒能保其不姦淫乎旣擄掠復姦淫能不殺戮乎爾等知其如此假取一二尤甚者殺之以愚黔首而仍陰恣其所爲百姓皆已看破而恨之矣從前百姓畏賊數十

人可以橫行鄉閭今則處處團練人人怨憤一縣可得數十萬人步步皆荆棘矣爾等亦人也非有三頭六臂可以嚇人百姓窺見爾等伎倆而屢遭荼毒財物被擄房屋被燬妻女被淫童穉被掠其權充鄉官者苦於誅求無厭刑辱難堪有不傷心切齒羣起而攻之乎是今日之民情與前大不同也爾等在廣西時所取亡命靡不畏死其時承平日久官軍多未經戰陳是以當之輒靡遂肆然謂天下無人今則歷練既久精銳過前百倍矣我湖南兵尤稱義勇援江援鄂隸會部堂麾下水陸

數百萬身經數百戰餉足固戰餉不足亦戰此乃 國
家恩德所爲非可強而致也卽如僕所部之平江營五
載以來殺賊不下二萬足下所深知也足下前在廣西
精銳聚於一處今散於數處勢分則力薄日久則氣衰
後來遠不如初又見死傷過多曾夫然羅大光被戮莫
不灰心解體各路官軍又復蒸蒸日上久戰不疲是今
日之軍情又與前大不同也以事若彼以勢若此足下
試平心察之可有一語不確否凡舉大事在識時勢足
下若起事於漢唐元明之末造或尙有冀今值我 聖

明全盛之日妄發此難則萬非其時矣且足下亦知

聖朝超越前古者固大有在乎自古得天下者三代以下漢明爲正然亭長寺僧於前朝究有君臣之義 國

朝則龍興東土與明爲敵國迨明運告終中原無主吳三桂苦請入關定鼎葬明帝以殊禮褒忠節諸臣唐虞以來未有若斯之盛得統之正此其一我 朝疆域中

國旣大一統又合以東三省及內外蒙古西藏回疆縱橫五萬餘里黔滇楚粵川陝改土歸流之郡縣以百餘計外此如噶囉斯琉球日本朝鮮安南呂宋諸國莫不

奉正朔獻寶琛遺子入侍爲開闢以來所未有幅員之
廣此其一 聖祖仁皇帝臨御六十一年 高宗純皇
帝臨御六十年禪授之後更三載而後升遐享年之永
一朝可越五代而更過之自殷中宗後無能比者享國
之長此其一自古宦官至漢唐明而極漢之十常侍唐
之門生天子明之九千歲及呂武諸后外此不可以枚
舉我 朝宮闈肅穆內官不過六品如斜封墨勅廷杖
諸弊政一掃而空之家法之善此其一康熙初吳耿尙
三逆作亂天下幾失其半 聖祖不動聲色以次削平

此外平張噶爾平青海平大小金川平斬鎮平臺灣平
西藏回疆平川楚教匪天戈所指皆不勞而定武功之
盛此其一前代人主多耽安樂明時至廿餘歲不見大
臣我朝列聖相承無日不視朝文官知縣以上武
官守備以上一一過目輦轂之下纖悉必聞萬里而遙
威顏咫尺所謂禮樂征伐自天子出也政治之隆此其
一康熙雍正乾隆普免天下全租七次分別蠲免者不
勝數今皇上聖聰淵穆芟夷大難雖用兵八載而田
不增賦戶不抽丁恩澤之入人至深且久以故賊踞

城池城池外卽非賊有賊去立刻反正被擄之處糧卽完納賊雖狂肆以威之不能也人心之固此其一以如是深仁厚澤而以悖理失勢違時之舉執金鼓而抗戎行是自取滅亡也至死不悟豈不哀哉雖然足下騎虎之勢則亦有不能中止之苦聞足下係貴平富戶爲楊逆迫脅出於萬不得已且性慈不好殺戮去年十月內猶放出老穉二千餘人卽此一端必當轉禍爲福僕是以不惜苦口抉摘根由願足下急急回頭如果以鄙言爲是祈卽速覆一信目下瑞臨已復九江吉安不啻釜

魚奔獸足下能將撫建之地納土投誠傳知吉安亦早
投降免遭屠戮僕當會同官欽差暨督撫立即奏聞加
足下二三品之官足下得力將士亦從升賞倘有假意
雷殛天誅僕平生忠信待人斷不屑爲欺詐之事且足
下獨不聞江南提督張副帥卽當日之張嘉祥乎彼自
廣西投誠今已官至一品名滿天下矣又不聞福建世
襲海澄公黃梧靖海侯施琅乃海寇鄭成功部將乎識
時反正公侯茅土二百餘年矣孰得孰失何去何從足
下自擇之耳旣以洪逆爲讎此刻金陵受困不日可破

若足下解散江西羽黨復著精銳赴
報 聖朝下洗夙憤封侯直指顧間
眷戀窮城卽撫建非可割據之區江
將欲竄回西粵而贛甯不可飛越兼
亦紛紛解體彼時麾下之士必有獻
者言念及此毛髮悚然夫定大計在
多年一事無成苟一失勢卽匹夫耳
西得湖南援兵已克平柳思潯各府
路吾見足下之束手受縛豈俟贅陳

蓋世之雄被漢軍圍逼尙有烏江之刎此無他失勢故也僕爲足下再四思維進退殊無善策惟有獻城投順一著立地見效不但保宗族兼可建奇功足下能猛然省悟否耶聞足下頗有爲善之資而恰值千載一時之會是以推誠相告諺云苦口是良藥惟足下裁奪卽賜回音是幸次青李元度再拜聞翼賊得書遲之又久乃以大幅紙書一難字覆之又按嘗見瀛寰瑣記載李少珊爲曾統帥招降僞天王書與此正同第語句稍有改易以洪石兩逆事固不同也用存疑以俟考

八年戊午二月李總兵若珠及戴文英等攻克秣陵關是關
爲金陵南面外蔽賊築壘若城守之甚固是月初二日和大
臣派李總兵等移營節節進逼渡河先將黃泥庵等處賊壘
蹋平於十四日夜斬關而入賊紛竄經預伏近關之葛塘寺
等處副將劉季三游擊馬德昭等截剿共斃賊五千餘人先
是七年虎總兵坤元統兵自溧水烏山至與關賊相持六十
日未下十二月虎總兵建議曰當賊初至其謀未定不難一
鼓克之今賊守備堅固浪戰無益不若移營逼近賊巢竭力
環攻破之尙易不然春水方生溝渠皆滿賊引以自固限隔

我軍更難爲力議既上虎總兵於關外東北隅察視形勢遇賊與戰手搴大旗獨追十數賊冒險深入僅游擊劉萬海與一卒從竟爲賊伏鎗所中腦出而死諡忠壯萬海與卒奪其屍歸軍民咸太息不置此次之克秣陵關戴文英功稱最文英虎總兵偏將也三月和大臣張總統率戴文英周天培李若珠等進攻金陵初二日擊賊七倉橋斃賊數千直抵外濠毀其更樓數座李若珠從間道撲賊巢設伏誘戰城內遣悍賊出水西門聚寶門張總統督隊與李若珠合兵圍其二門戴文英亦會攻雨花臺印子山鎗斃黃衣騎馬賊目總統復派

王浚蔡啟榮分道搜賊共斃賊二十餘賊仍屢伺官兵之懈
悉衆突犯冀一勝以解圍而雨花臺形勝尤絕勢所必爭和
大臣偵知賊情先遣李若珠伏兵慈湖銅井二路並飭師船
嚴爲防備親與張總統更休疊巡四月賊果由雨花臺撲營
乃大敗之五月江浦克復皖賊竄踞來安圖爲金陵聲勢和
大臣派官兵往剿立復縣城更思翦其羽翼密派水師總兵
李德麟吳全美遊擊郭定猷等分剿上游繁昌縣屬之賊沿
江亦漸靖金陵賊憤甚出太平神策兩門竭力犯大營經副
將張玉良馮子材等踴躍陷陣斬其驍健數名賊大潰自龍

建長歌

勝子至莫愁湖屍積如橐相遂進攻金川門悉毀東北城外
之壘城賊愈窮蹙乃令竄外之賊騷及皖南迄浙閩邊界冀
大營分援延旦夕喘浙東於是大震和大臣派副將陳開選
一軍以往七月和大臣與張總統定議在金陵城外建長濠
以困賊鑿山越水屹若長城周百餘里俗稱萬里長濠諸營
互相聯絡度圍形之險夷定攻具之厚薄復於開牖口處連
舢板爲水營城賊亦增防各門潛築柵壘賊忽於壽德洲悉
衆出撲張總統令遊擊賴鎮海等駛艇師擊之並令南北軍
分攻太平金川兩門東西軍各擣雨花臺親自督率勇氣百

倍水陸皆捷八月賊酋陳玉成自上游率大股會九洲羣賊越江浦猛撲浦口德大臣派兵迎擊大挫和大臣派馮子材等先後往援賊分股綴之仍力撲浦口二十日揚營陷德大臣登江口師船繞赴揚州定議守邵伯防北竄陳賊遂疊陷江浦天長儀徵揚州而自率精悍往攻六合邵伯一帶危在旦夕警報日達江南張總統渡江馳援九月十五日克復揚城移師攻儀徵十六日亦克之十八日六合縣失守縣居金陵北以浦口爲咽喉形勢鞏固粵賊入鄂之歲湖北江夏人溫紹原權縣事卽募鄉勇爲守禦計長江東下重城皆望

風瓦解六合以彈丸獨存大小百戰屢殲賊衆歷六年之久
賊以全力始破之當賊大股圍城之日紹原激勵諸同志涕
泣誓以死守割衫嚙指草血書告勝大臣乞援不至張總統
自揚州亟提兵往救十七日至陳板橋遇大股賊接仗不得
驟進陳賊知張軍且至急穴地道十八日寅刻火發轟塌城
垣十餘丈蟻附而上紹原見事不可爲猶率衆巷戰力竭始
被戕害諡壯勇妻王氏次子候選知縣溫輔材長媳陳氏投水
以殉從事者多不屈死紹原以積功擢道員加運使銜充江
南大營翼長仍留防六合代其職者爲李守誠江西舉人城

陷亦自縊堂上總兵羅玉斌自來安奉檄守六合城入城亦
手刃數賊而死謚壯勇其餘文武多巷戰陣亡同日皖南賊來

援金陵復陷溧水署縣事周觀銘督戰陣亡賊遂分衆築壘
紅藍埠等處爲扼要持久計大營遣張總兵王良由祿口進
攻乘勝渡河追擊盡平其壘合圍縣城和大臣以城小且暮
必能克而銅井六郎橋龍磨山高古山皆要隘援賊所必爭
逃賊所必趨飭李若珠劉季三等往來巡徼張總統則親駐
高古山備侵軼城賊果不支張玉良馮子材陳朝宗等裹創
力戰樹梯登城殺守陴而入十月初七日克復縣城賊西竄

伏兵節節兜剿斃四五千餘衆果會援賊夾攻高古山張
總統親率數十騎怒馬陷陣萬衆披靡刺死黃衣賊酋李若
珠等各處兜剿生擒偽銅天侯偽國宗洪姓因合兵窮追直
抵江甯鎮又毀賊壘數十座小丹陽以至采石磯老巢悉平

附記

是年三月西安將軍福興督江西東路軍務駐弋陽持
重太甚賊遂由廣豐竄浙江陷江山開化諸縣 上以
福興遷延貽咎切責之飭浙江巡撫晏端書撥兵會剿
四月楊提督載福會集李布政續賓彭按察玉麟統水

陸軍十六營進攻九江府初七日寅刻地道火發崩城垣百餘丈兵勇痛此處死傷最慘飲泣奮登掩殺約兩時久斃賊一萬六七千遂克府城賊首僞貞天侯林啟容等據各賊於亂屍中指出寸磔之九江旣克官大臣胡巡撫會籌東征之策江楚各留兵五千防潯陽以陸師渡江先皖北而後江南水師先安慶而後金陵於九江設轉運糧臺由皖撫派員赴都將軍李布政行營支應並奏李續賓忠勇誠篤可獨當大任今越境遠征請加巡撫銜准專摺奏事得旨報可時皖南竄浙賊勢

頗猖獗浙省在京大員合詞奏請 飭令李續賓赴浙
江布政使新任藉資悍禦已邀 俞允官大臣以楚皖
安危大局所繫遂上言賊犯麻黃數道戒嚴我軍僅六
千當賊五倍之衆所恃者續賓威望素著爲賊所憚耳
浙江兵力雖單江南大營已派兵往援疆圉可固楚北
少有蹉跌後患至深 上從之皖北獲安五月湖南援
江西軍之道員蕭啟江知府劉坤一道員張運蘭王開
成同知曾國荃等克復江西諸郡縣漸就肅清始議分
兵援浙奏請 飭蕭啟江等酌量抽兵由祁門甯國馳

保杭州 詔起復曾侍郎前往浙江辦理軍務曾侍郎
丁憂得假回籍假滿固請終制 上鑒允之至是以浙
江危急 諭旨敦促起程六月十二日抵長沙出水路
至九江登陸赴河口大營星馳入浙旋以賊入閩境浙
遂解嚴復奉 命以援浙之師自鉛山淮軍援閩七月
踞三河鎮之賊衆窺伺廬州福巡撫以師老無功 召
入京以勝都統保爲 欽差大臣自河南赴皖調揚防
之翁侍郎同書巡撫安徽幫辦勝大臣軍務未至之先
李布政孟羣署巡撫事駐店埠賊乘虛於十五日攻陷

廬城總兵蕭開甲

諡忠壯

知府武成功死之曾侍郎既奉

旨改道援閩未至而閩賊於八月間復分股回竄鐵

牛關等處侍郎遂親率所部移營弋陽派兵攻剿九月

踞天長賊圖北竄分股二萬人撲三河集集在清江浦

蔣壩之南濱洪澤湖向設仁義禮智信五壩以時啟閉

官軍留三河關口不堵存天險賊至勝大臣撥兵奮擊

賊盡南遁清江以安乃進攻天長縣先有擒首李昭壽

歸誠效順勝大臣奏請 賞給三品頂戴花翎至是爲

內應率衆殺出克復縣城復將踞賊搜殺盡淨事聞奉

旨李昭壽更名世忠以參將卽補時李布政績賓旣克桐城舒城皖賊待救攻廬州益急三河鎮地濱巢湖爲水陸衝途米商所萃賊以輒石築堅大之壘九座憑河扼險欲攻廬州非先拔三河不可馬隊已隨攻廬州復留兵防守潛太桐舒一帶李布政所統僅四五百人連戰皆捷而賊首陳玉成李秀成李世賢等由和州江浦六合廬江分道合援連營數十里賊衆兵寡十月初九日布政親督官兵盪決直前諸將力竭死七營均陷布政血戰陣亡

諡忠武

同知曾國華

諡愍烈

等數十員皆從

死官大臣奏上得 旨照總督陣亡例優卹並奉 硃批詳覽奏牘不覺隕涕惜我良將不克令終尙冀其忠靈不昧他年生申甫以佐予也李總督湖南湘鄉人爲羅布政澤南弟子二年間在籍奉父命與羅布政倡辦團練者十一月皖南賊股分陷婺源勢張甚其時督辦皖南軍務爲前江西巡撫三品京堂張芾也

九年己未正月江浦守賊薛三元遣心腹羅華清等謁見張總統願獻城剿賊贖罪和大臣遣參將李世忠詣城受降獻出江浦城二十七日遂進攻浦口亦克之當世忠之未至也

羣賊知三元有變率隊急攻江浦三元已下令皆薙髮協力死拒潛乞援於水師營會世忠至圍遂解三元改名成良次年復叛浦口既克勝大臣檄世忠赴高旺剿賊賊復糾合小店諸賊驟撲浦口遂復失守世忠急回剿再克其城而皖北各路悍賊及黃池灣址諸潰賊不下七八萬合踞烏衣鎮汜河口日圖伺奪兩浦爲六合之援二月初九至三月二十五等日張總統遣總兵李若珠周天培副將馮子材遊擊薛成良等奮擊大敗之七月揚州德大臣以師久無功爲和大臣奏參江北軍務改歸和大臣統轄遂派提督李若珠往攻六

合總兵張玉良往攻天長十月李提督失利總兵馮子材往
 援復因大礮震裂兵勇潰散李提督被圍糧盡援絕統帶忠
 勇詹啟綸營南門外密探得賊壘口號呼嘯而出李提督從
 之遂突圍駐揚州西路和大臣又派提督周天培扼浦口結
 營為江浦聲援復失利周提督力竭死壯 謚武營壘皆陷官軍
 退保江浦賊於是東伺儀揚西逼江浦南規溧水凶箠復熾
 十一月張總統渡江躬親督剿疊破江浦一帶賊壘二十餘
 座揚州邊界肅清聲威大震乃部勒各軍期大舉

附記

是年二月皖賊逼廬州大營前署安徽巡撫布政使李孟羣紮長城地方營潰被執爲賊擁至廬郡閱四日不屈從容賦絕命詞死

諡武愍

李巡撫河南進士湖北殉難

按察使李卿穀子也三月翼賊石達開入湖南翼賊自出金陵竄安慶久與洪逆斷絕陸續誘脅擁衆至十餘萬欲因便據險自雄乃竄由江西南安府取道入湖南陷桂陽與甯宜章諸縣湖南駱巡撫秉章與紳士左宗棠等星檄諸郡一月內成軍四萬人擇要扼守官大臣胡巡撫飛調水陸往援賊已開道撲郴桂窺衡州竄永

州六月圍寶慶府復派荆宜施道李績宜爲總統率湘營往援奮擊敗之翼賊氣奪不敢復萌言湘圖鄂之志初曾侍郎駐軍江西建昌府居中調度江西恃以保障至是翼賊竄湖南蔓千數百里獲謀稱欲入蜀官大臣胡巡撫以蜀之安危關係大局奏請以曾侍郎率兵入川得旨允行八月二十五日侍郎由湖口抵鄂而翼賊已屢經敗挫川中亦有備乃復會奏暫緩入川會籌剿皖紮營上巴河九月翼賊全股犯廣西廣西自洪逆下竄近十年頗安謐翼賊在寶慶永明道州叠受懲創

知無可竊據旁皇道路老賊之籍廣西者懲洎歸竄遂
由新甯趨小路直犯廣西省城巡撫曹澍鍾率文武固
守官大臣駱巡撫遣道員蕭啟江劉長佑馳援前廣西
布政使蔣益澧自柳州聞警至水陸兜擊賊解圍去遂
陷慶遠府十二月駱巡撫請於長沙省城建表忠祠又
建求忠書院令陣亡後嗣入院讀書經費由官紳捐辦
得 旨允行

金陵兵事彙畧卷三

江甯李圭小池

咸豐十年庚申正月初九日張總統水陸進薄浦口沿隄賊壘九淤洲出悍賊三面來援總統躬率敢死士直前撻鋒再接再再厲縱橫出入所向皆靡張玉良踵至亦分頭痛掃援賊大潰乘銳蹙之擣其壘沿江戰艇礮聲不絕賊首尾不相顧副將陶茂森等鼓勇先登共平賊壘八座卡十餘斬首千餘初十日遂合兵攻九淤洲老巢洶湧潮進越重濠縱火焚其穴燭燄蔽天賊死者數千計二月克復上下關

上關卽龍江關在上河下

關在儀鳳門外瀕江盡焚賊壘金陵上關濱江有壽德洲下關濱江有七里洲久爲賊踞既破九洑洲老巢和大臣張總統定議招降令賊黨去逆就順壽德七里二洲守賊秦禮國謝茂庭相率投誠願約期攻二關爲內應初三日總統會諸路軍進剿總兵熊天喜由七里洲寶塔橋平毀賊壘收復下關秦禮國亦從壽德洲轟礮內擊總兵劉季三率軍直進斬馘無算上關亦復痛掃沿河賊壘賊連夜退守江東門是役也克復重關平賊壘數十獲大礮百餘戰船六十撫定脅從約五千人時江浦賊結連瓜子山賊黨突出數千紛撲江北營張玉良

分兵左右夾擊張總統聞警卽至從中路衝殺賊始大敗奪路回江浦先是正月二十五六等日皖南賊陷涇縣旌德縣督辦皖南軍務張京堂芾退守徽郡二月初三日廣德州失守賊闖入浙江之安吉縣距浙江省城僅百數十里羅巡撫遵殿乞援於曾侍郎國藩時湘營勁旅方派攻安慶由徽赴浙固不遠於江南大營乃以緩不濟急合詞請 旨命和大臣兼辦浙江軍務提督張玉良總統援浙諸軍撥兵馳往當羅巡撫之甫蒞浙任也甯國告警石埭踞賊竄入粽子店藍山嶺副將石玉龍諡剛等陣亡提督周天受又以黃池兵潰

飛書請援羅巡撫知其不足禦賊而鄭魁士尙軍於高渚乃
奏請令與甯國防軍爲犄角又函商兩江何總督桂清以徽
防兼總於甯防議未定值張總統克九洑洲等處賊巢金陵
賊大窘又被圍日久僞王以下食粥糜且不繼危在旦夕僞
忠王李秀成僞侍王李世賢僞輔王楊輔清等大股賊由六
合江浦一帶渡江集蕪湖謀擾浙以分官軍力而紓金陵圍
忠賊乃率衆由南陵疾趨周提督遣將往禦兵少不戰而潰
遂連陷涇旌德太平甯國四縣至是廣德又陷浙省門戶盡
失二月初八日侍賊由東湖亭陷安吉縣十三日由泗安陷

長興縣時惟李定泰一軍二千餘人在杭倚之甚重警初聞
或謂宜令此軍徑出獨松關分扼泗安東湖並屯兵百丈關
以固邊圉因調定泰由水程往援將弁多畏縮待船一日夜
又逗留湖州一宿始進援泗安改援安吉皆不及十五日侍
賊率悍黨進圍湖州紳士趙景賢會地方官倉卒練勇籌守
禦值曾秉忠以礮船至內外夾擊三日而圍解侍賊回竄建
平與忠賊遇遂令其往攻溧陽忠賊則徑趨杭州十七日陷
武康十八日走狗葬焚良渚聞者尙以爲土匪也十九日黎
明至武林門已入數十騎人猶未覺統帶寶勝勇候選道陳

炳元登城望知爲賊始傳令閉城擾攘間賊之闖入者竟不可踪跡蓋忠賊知是日爲大士誕辰大吏必至天竺欲邀賤之湖上乘勢搶城而未知以聞警自巡撫以下故皆不往遂分圍武林錢塘湧金清波等門城中除滿營外僅有撫標二千餘人團勇千餘城外有金陵大營新募江西勇二千人過境未去雖大營援軍未至巡撫將軍能慷慨誓師許以爵賞就撫標兵江西勇選將率之出擊何嘗不可勝蓋賊來實不及萬且無後繼者一勝之後勇氣自倍援軍一至省城可保奈何任其攻擊束手待斃至二十七日賊由清波門穴地道

轟塌城垣遂失陷三月初三日張提督援軍自湖州抵武林門城外無賊營故莫之阻隨令勇士由艮山門民房置梯攀城賊見張字大旗驚謂總統實來又以滿營未下患在肘腋所過城邑均未置守子女玉帛既飽其掠懼爲喪也且揣知金陵大營必空虛謀還襲之卽於是日開湧金清波兩門告去張提督率兵尾追不及而返總之此次浙省賊來賊去官軍胥未與接仗亦可謂怪事賊出獨松關破孝豐縣竄回甯國廣德大合死黨蟻聚於建平一帶而忠賊爲之首其下如劉官芳賴文鴻古隆賢陳坤書皆百戰勁賊併力圍建平陷

之此為金陵大營致潰之由故紀之特詳是月二十一日等日
 輔賊遂陷高瀆東壩溧水直趨秣陵關侍賊陷溧陽句容圍
 金壇甚急且分股犯常州與溧水句容遙相聯絡乃各親率
 大股與忠賊之眾會於溧化鎮偽英王陳玉成復由西梁山
 渡江順流至江甯鎮屯聚善橋閏三月初七日起忠賊進鍾
 山陳坤書進高橋門輔賊進雨花臺侍賊進北門洪山
 山支洪山幕府紛撲大營大營勢孤所有選鋒精騎多撥隸張提督援
 杭其撥往江北者又難猝至張提督聞信急回至常州為何
 總督邀留大營連發令箭往調已行至奔牛鎮仍為何總督

促回不令來救兼以師勞餉乏霖雨浹旬張總統晝夜苦戰
斬賊無算而賊來若潮湧勢漸不支十四日大雷雨酷寒下
有離心士無鬪志一夜之間各營紛紛火起總統乃於十五
日與和大臣等均退守丹陽收集潰軍以圖後舉於是金陵
城外遍地皆賊向之距城較遠處所從未見賊踪者亦咸及
於難其預先挈眷南奔蘇松北及江北裏下河得免於難者
百纔五六餘則以賊氛四面猝至欲逃無路全家盡節者不
知凡幾蹂躪之慘殆逾於癸丑城陷之日焉各僞王皆入城
謁見洪逆侈然謂六解京圍洪逆曰乘勝全收江浙正在斯

張總統死

時忠賊等遂進圍丹陽初猶憚總統聲威不敢逼近遍築土壘為步步結營計令黠賊潛入營中伺總統出戰自後狙擊之受創甚猶血戰刃數賊躍馬尹公橋下河中死諡忠武提督

王浚總兵熊天喜諡勤勇俱陣亡丹陽遂陷和大臣突圍先率

數十騎退自常州倉皇至滸墅關入滄浪亭江督行轅方住

足越宿自縊死諡忠壯羣賊進圍常州何總督遽率司道退保

和大臣自縊
何總督遁走

蘇州徐巡撫有壬不納乃以照料糧臺為言退往常熟嗣由常熟浮海至通州欲投其門人在籍辦團紳士王藻藻復不納復浮海至上海常州既陷蘇州藩籬盡撤城兵不滿四千

脆弱不習戰徐巡撫強爲支柱令張提督王良守無錫之高
橋扼賊衝三戰皆捷賊分股繞出九龍山壓高橋背師潰張
提督率敗卒入城賊追踪至號稱數十萬亦忠賊爲之首城
中流寓粵人先已作亂及是有嘉應州人道員李紹熙者率
何信義等開門應之遂失陷嗣此東南財賦之區盡爲賊有
取精用宏復以強大幾至不可收拾溯其喪敗之由蓋一悞
於屍居餘氣之皖南督師張京堂不能扼堵皖南門戶再悞
於爭留浙藩司李續賓之官大臣使不得赴浙籌堵禦三悞
於好大妒功之和大臣奏參揚州德帥兼轄其軍務致分兵

力四悞於浙撫乞援於曾侍郎不暇急援更合詞請以和大臣兼辦浙江軍務再分兵力五悞於形同木偶苟圖全身之江督何桂清留張玉良於常州不使其馳援大營嗚呼成敗之機雖有天焉亦人事有以致之也賊自入江浙洪逆妄詔天下爲一統其所設僞官與夫服色稱謂早已荒誕出人意料茲復更定僞制於是牛鬼蛇神益爭奇競怪矣僞王有六等一曰聖神天師王如勤慰師聖神風禾乃師贖病主霜師東王是也二曰天師王如雲師南王是也三曰軍師王如精忠軍師于王是也四曰義王如忠勇英王是也五曰勲王如

經文緯武贊王是也六曰列王如安王福王是也上三等謂之三師下三等位視一二三品又有七等王王字上加三點作王偽勳爵六等曰某天義曰某天安階四品曰某天福曰某天燕階五品曰某天豫曰某天侯階六品偽朝官文職九品一掌率二統管三尙書四令史五僕射六丞相七檢點八指揮九承宣每一職各有正副又正又副等名武職九品一天將二神將三朝將四都尉五都護六都揮七常侍八侍衛九護衛皆分左右外官曰文將帥主將佐將將軍總制監軍視偽朝官四品至九品鄉官曰軍帥師帥旅帥卒長兩司馬

守城者有僞巡狩將軍驛遞者有僞疏附總制關隘有提關
指揮洪逆僞府有六部僞尙書有侍衛有左右史有侍臣朝
儀詔書詔命他若管理賊物者俱爲典官有典聖糧典旗典
鐵等三十六名目僞九門御林宿衛軍之制左輔右弼前導
後護各一軍每年以僞一等二等王各一人僞三等四等王
各四人僞五等六等王各十六人僞義安各三十二人僞福
燕各六十四人僞豫侯各一百二十八人分領僞京有神策
軍四亦分其名曰左輔右弼前導後護又各有五軍分其名
曰金木水火土凡一百二十四軍一百五十五萬人謂之戰

卒每縣各前後左右中軍一每軍以僞軍帥一人轄僞師帥
五人僞旅帥二十五人僞卒長一百二十五人僞兩司馬二
百五十人僞伍長一千二百五十人僞卒五千人謂之鄉軍
僞服色尙黃次紅紫尊者繡龍鳳青藍黑再次之白最下帽
上繡以龍鳳麟獅虎彪分等差而鄉官僞職最卑者則繡以
鶴其式僞王金冠僞官紗帽鄉官方巾平時有僞職者頭紮
黃巾餘用紅巾女官皆以黃帕蒙首上寫僞銜若稱呼則大
可哂矣各僞王俱稱千歲其妻稱僞王娘子稱嗣君女稱金
六僞爵以至軍帥僭稱大人子稱公子女稱玉師帥至兩馬

馬稱善人子稱將子女稱雪六僞爵妻稱瑞人僞丞相至軍帥妻稱貞人師帥至兩司馬妻稱夫人其僞王之稱千歲也另有字以別大小如安賊稱顯福賊稱倫千賊稱福翼賊稱喜英賊稱祿忠賊稱榮贊賊稱耀侍賊稱雄輔賊稱威章賊稱壽皆冠於千歲之上尤令人噴飯

附記

北路捻匪自四年閒爲袁京堂甲三在臨淮關痛剿後仍復四路竄擾以蒙城霍邱宿州壽州爲老巢出沒江皖東豫四省與賊互爲應援勝大臣濮城挫後軍威不

勝大臣赴何
南
袁京堂爲
欽差大臣

振致廬州定遠久淪於賊是年正月奉 旨飭赴河南
督辦剿匪事宜皖省軍務 特派袁京堂爲 欽差大

臣責令速殲醜類皖賊將犯蘇杭又結捻首張落刑龔
瞎子等使內擾淮清分江皖兵力二月二十七日浙江

省城失陷巡撫羅遵殿諡壯布政使王友端諡貞署鹽

運使繆梓杭嘉湖道葉莖杭州知府馬昂霄仁和知縣

李福謙均殉難在籍辦團兵部右侍郎戴熙城陷後從

容盡節諡文三月初三日張提督玉良克復浙江省城

四月初六日賊陷江蘇常州府十三日陷蘇州省城巡

欽定四庫全書

撫徐有壬遇害

諡莊愍

妾施氏次子候選郎中徐震翼族

弟徐曾庾幕友候選布理問鮑鄂銜家丁楊安等從死
署按察使朱鈞投井殉蘇府教授張鏡溇死之布政使
薛煥先由常州派駐上海署布政使蔡映斗長洲知縣
李瀚文元和知縣馮樹勳吳縣知縣沈偉田城陷後逃
出均奉 旨逮問署蘇州知府吳雲先期奉撫札委赴
上海商借援師獲免於難忠賊等衆蟻聚城內外恣意
擄掠鄉民相約團練爲自保計以永昌徐氏最著十六
日賊陷浙江嘉興府張提督玉良自蘇衝出率潰卒赴

杭至是王巡撫有齡商令馳往嘉境以剿爲防作省城
屏蔽是月何總督桂清褫職逮問 命江蘇巡撫薛煥
權督篆旋以曾侍郎國藩署理兩江總督時侍郎駐軍
安慶乃悉以圍攻安慶之師命弟道員國荃任之疏請
飭湖北胡巡撫林翼駐皖督師又稱圍攻安慶爲克復
金陵張本此軍斷不可撤乃商調總兵鮑超霆字營七
千人朱品隆所部三千人並令左京堂宗棠添募湘勇
四營訓練成軍以資進剿五月十五日曾總督自宿松
渡江進發祁門時忠賊欲自蘇犯滬慮觸洋人怒以書

曾總督抵祁門督授江督為欽差大臣張副都御史入都督大臣督辦南軍

都將軍赴揚州督江北軍

召英使約各國赴蘇與議英使不許六月十一日曾總督師抵祁門奉 特旨實授兩江總督並授為 欽差大臣督辦江南軍務其時張副都御史帶駐軍徽州久無成效奉 詔入都皖南軍務統歸曾大臣督辦七月督辦江北軍務李提督若珠忽患痺疾不能軍奉 旨以荊州將軍都興阿督帶馬隊迅赴揚州六合擇要駐紮督辦江北軍務都將軍於八月十九日自鄂起程取道英霍六壽赴揚途次聞洋人犯 闕官大臣請以都將軍馬步改道赴僧王大營備攻剿並與曾大臣胡巡

撫各請提兵入衛以和局就緒不果行都將軍仍赴江

北九月賊陷安徽甯國府周提督天受諡忠壯道員福咸

等巷戰死周提督之弟天培上年在河北堵賊死本年

七月金壇之陷其弟天孚亦與城亡諡威毅兄弟三人先

後殉節 詔於原籍四川省城及本縣建祠祀三人另

於甯國建提督專祠以殉難文武從祀時洪逆圖併北

方出偽詔令忠賊往竄上游適徽甯豫楚各鄉有亂匪

揭竿起潛結爲內應忠賊以爲有間可乘得信卽行至

黟縣阻於鮑超軍大潰狼狽遁回旋改道由徽州竄江

西

寶山蔣敦復張忠愍公行畧曰咸豐十年春閏三月

欽差幫辦軍務總統南北諸軍提督軍門張公國樑力
戰死事聞 天子追念盡臣 綸音褒悼 贈卹有加

越二年今 上登極改元同治 兩聖聽政大申黜陟

羣盜次第就戮海宇指日蕩平而公之行狀及銘幽表
隧之文未有作者草莽臣蔣敦復伏讀 先皇帝聖諭
有云東南半壁倚爲長城尙冀該提督不死出爲國家
宣勞又云若張國樑尙在蘇常一帶何至糜爛若此等

語感激涕零撫膺浩歎爰詢公之舊部曲將校及粵人之能道公遺事者綴拾成行畧一篇身非史官不敢作傳謹以俟當事者采而上之於朝公姓張氏初名嘉祥廣東高要人生而長身壘立材武絕人年十五之粵西貴縣從其叔父賈顧心弗喜也喜任俠結客鬪雞走狗跳刀拍張與羣少年遊輒以氣懾服儕輩咸兄事之會其黨有爲土豪所困者公怒率衆往劫破其質庫土豪訟名捕弗能得而公之義聲已震爲羣盜所推有衆萬人不妄殺掠人爲之語曰拯弱鋤強張嘉祥前廣西

巡撫今制府勞公聞而義之遣大將招撫道光二十九年公單騎受撫於左江鎮尋奉檄剿土匪顏品瑤潘七大李樹青等境內肅清入謁幕府撫部深器重之使執贄從弟子列乃改今名曰國樑字殿臣公由是感激思立奇功答知己逆匪洪秀全事起撫部檄公募勇往剿以二百人破賊數千於新甯州咸豐二年二月克永安州三月調赴湖南破賊於道州蛇皮嶺追賊至長沙省城南路新開鋪賊竄湖北復追剿至武昌省城攻破洪山寺賊壘自新甯之捷奉 旨賞戴花翎補授守備至

是升都司 賞給霍羅琦巴圖魯勇號時洪逆已從九
江順流下竊據金陵矣公之立功自力保桂林始復逐
賊楚南北直抵江甯省城均與提督向公俱相倚如左
右手賊聚太平向帥問諸將孰敢往取賊巢無應者公
慨然上馬行所部五百人從之賊衆聞公至大驚棄城
走公徐按轡入城市不改肆事畢歸報往返僅七日軍
中唱凱歌曰張國樑走馬取太平前後奏捷晉階洊升
至福建漳州鎮總兵官率師渡江取浦口及江浦縣城
往返亦不及二旬晉提督銜六年五月九華山之師潰

他帥死諸將擁兵觀望大勢幾不支於是向帥奏請以公總統南北諸軍旬日閒招集流亡立解金壇之圍朝廷嘉之始拜 欽差幫辦軍務之命嗣此乘勝克復句容鎮江進擣秣陵關馳往江北復揚郡儀徵復渡江圍江甯城外賊壘築長濠以困之經營數年破賊形勢已在掌握而九洑洲正當賊衝亦爲我軍所據先是公平鍾山賊壘被礮擊傷中指蒙 恩賞給御用藥散復句容 賞穿黃馬褂復鎮江升授湖南提督世襲騎都尉復秣陵關 賞換雙眼花翎調補江南提督復揚儀

蒙 恩世襲二等輕車都尉復九洲蒙 恩世襲二
等輕車都尉中間 尙方珍玩 恩賜絡繹異數頻頒
温綸叠至日者 先帝聖訓勇猛中加以慎重公自
念遠方武官受任非常雜誦感泣日夜圖報當是時向
帥已積勞薨於軍 欽差大臣某故貴人不諳軍旅餉
不時給公功名既盛忌者益多方阻撓先後屢失事機
度賊未易滅誓以身殉抉一齒畀家人歸報示無還期
江甯賊受圍久勢憊甚城垂破者屢矣爲出柙計乃集
各路劇賊思併力一決勝負亡何官兵缺餉已五閱月

士卒洶洶脫巾一呼慮在旦夕以公故猶未忍公不得已躬詣某帥所長跪告急繼之以泣卒弗許退而念此饑軍終不支亟檄召副統帥某兵冀相與戮力一鼓下省城擒賊首出萬死不顧一身事或濟副帥將行留守常郡某制府尼之羽書七往返不至賊聞之急攻官軍官軍譟於營某帥遁師大潰公聞變搏膺而呼墜馬幾絕立馳自鎮江至丹陽城下與賊戰傷重知不免探懷中印授材官某令走報下馬向闕再拜曰臣力盡矣復上馬大呼望賊營而馳亂流渡河人馬俱沒於水時

十年閏三月二十九日也嗚呼公在而東南大局支持
入載公歿甫逾月常蘇二郡相繼淪失江南數十州縣
十陷入九然則公之一身存亡安危所繫豈淺鮮哉

先帝初得奏報以屍骸未獲數月未忍議卹八月十七
日奉 上諭着照提督陣亡例從優議卹晉贈太子太
保入祀昭忠祠其死事及原籍地方並立專祠子孫俟
服闋後送部引見頃之禮官議諡忠愍 制曰可洪維
我 國家勸忠之典逾格優加凡在臣子宜如何報如
公之忘身殉義 先帝重惜其死彼全軀保妻子者失

其本心奚以戴皇天而履后土也公年十八作盜魁二十八折節從軍爲國虎臣三十八而致命遂志平生大小數百十戰無不以身爲士卒先其用兵也善以少擊衆每出己意作進止率與古法暗合自偏裨擢至大帥所得祿俸悉予戰士未嘗名一錢置一產爲子孫計子一蔭清時年甫九齡奔喪至粵一無就緒時公友王錫侯司馬適在制府勞公墓府偕見於制府且商同厚賻之始克如制成禮嗚呼難矣公之走丹陽也男女老穉遮道乞留與俱守丹陽城小而陋無險可扼公策馬

圍視太息曰事不可爲矣汝曹速去我暫留各泣拜去
公植立城上賊望見之不敢進良久度民盡去城空乃
下流離顛沛中猶不忍於民若此求之古名將中不數
數觀其他軼事多傳聞不具書懼誣也

公諡忠武
作忠愍誤

忠賊李秀成致上海英人書曰天朝九門御林忠義宿
衛軍忠王李致書大英欽差全權大臣青覽蓋聞通使
議和自古國家常有而修盟會好從來中外聯情緣念
我主天王本奉天父上帝天兄耶穌之命下凡復興漢
家舊業自粵西起義而建都金陵於今十載伏思貴國

自古在昔開創之主卽是耶穌下凡御食萬方自我先
主東西兩漢以來曾經執盟牛耳結爲兄弟之國迨後
雖經疊更國主究皆漢家苗裔素未絕其盟誼迄自明
末清朝入接大寶二百餘載今我主恭奉天命復漢誠
爲中興之主非特媲美於前人抑亦爭光於貴國耳自
金陵定鼎以來其時清朝方當強盛江北江南恃全軍
之力更有向榮猖獗萬狀一經我國天戈所指將其追
敗丹陽自行隕滅及後復命張國梁和春張玉良等統
帶官兵無數築造長濠連營數十里圍我王城兩載有

餘復經本藩提一旅之師抄襲廣德武康杭州各省郡縣聲東擊西四分兵勢而復回軍克取建平溧陽東壩句容高淳溧水諸縣進紮溧化立將張國梁等數十里連營十數萬生力兵將一鼓而破張國梁敗死丹陽利春自縊蘇郡張玉良倫生逃竄本藩復承簡命統師進剿卽取丹陽無錫常州而師克蘇州其時忽有兩廣兩湖三江義士在清朝爲官者數百員統帶兵勇兩三萬前來投誠當卽留營效用此皆仰賴天恩主福並貴國庇蔭之所致也現在附近崑山新陽太倉常熟江陰嘉

興等處盡入我國而松江爲我軍取糧之處不能不分
兵往取惟上海一縣爲姑蘇唇齒相依通洋門戶其勢
又萬不能不前收復但該處上海雖止一縣地方爲諸
貴國通商之所洋物堆貯之地各國欽差大臣均在於
彼一旦興師動衆我國原爲打仗而去並不與貴國爲
難第恐我軍多衆間有不守紀律者迨至兩下角勝之
時或有誤犯貴國官民或致騷擾貴國貨物雖非出自
我國本心總屬有乖今日隣邦之好昔年兄弟之情豈
不大傷和氣貽笑先人爲此特字奉佈務望貴大臣上

體上帝耶穌一脈之傳前盟不遠世好相傳仍祈結爲
兄弟之國敢煩貴國各大臣勞步下降一同各國來蘇
面商國事雖結今日之新盟實聯昔日之舊誼從此開
疆拓土我國收先人之業而推心置腹貴國無意外之
虞豈不美哉望切望切謹此佈達書不盡言幸卽如約
卽賜降臨是所切禱並問近佳不一太平天國庚申十
年五月日維時中外值換約齟齬忠賊思結歡洋人合
力犯順書中謂面商進犯上海仍飾辭也聞是書諜者
至滬弗敢露面就虹口美國官署圍牆擲入洋人傳觀

殆遍謂其中皆若藝語置不理

十一年辛酉

附記

是年正月楚軍以全力圖皖候選道曾國荃統軍萬餘
攻安徽省城李巡撫續宜副都統多隆阿等軍亦四集
扼要駐劄胡巡撫駐太湖縣英賊陳玉成圖援安慶糾
合捻首龔瞎子帶衆撲松子關經駐關之副將成大吉
擊敗陣斬龔瞎子英賊勢蹙洪逆復遣六僞王以往六
僞三者僞安王僞福王僞干王僞輔王及僞璋王林紹

瑋僞顧王吳如孝也旋於夏秋間陸續敗歸時皖南諸賊大股撲祁門環攻不已賴諸路將弁奮擊大營危而復安曾大臣生平艱危之境靖港鄱陽湖而外以此爲最三月江西廬陵縣知縣丁日昌克復吉安府左京堂奉命幫辦曾大臣軍務大破侍賊之衆於樂平縣四月江北賊爭撲揚州分黨襲鎮江爲都將軍及總兵馮子材等軍擊退五月忠賊黨自江西竄浙東又分股竄湖北六月官大臣軍及廣東按察使彭玉麟水師先後克湖北南岸諸州縣忠賊敗竄江西時曾大臣旣復徽

郡以婺源爲江皖浙三省之衝咨左太常寺卿宗棠分兵移駐左京卿留王開琳守景德鎮而自率各營移駐婺源七月官大臣克復德安府胡巡撫多副都統諸軍痛擊安慶之大股賊力解太湖之圍桐城之圍復合安慶城外賊壘亦剝削畧盡惟北門外三石壘最固經營官程學啟督勇從礮眼躍入連破之八月初一日卽用道曾國荃克復安徽省城距失陷九年矣二十六日胡巡撫薨於軍九月記名按察使曾國荃督軍克復無爲州攻拔運漕鎮鎮在無爲含山間外瀕大江內通巢湖

曾大臣兼轄
浙江軍
左京卿督辦
浙江軍

上海官紳乞
師

賊屯糧上濟安慶廬州下輸金陵爲南北鎖鑰嗣此賊
大失所恃十月 上以浙江賊勢猖獗全省糜爛 命
曾大臣兼轄浙江軍務又以左京卿督辦浙江軍務許
其自行奏事仍受曾大臣節制是時上海一隅自蘇常
不守避難者四集賊氛日惡薛巡撫尙有兵而不能
與督辦江南團練龐侍郎鍾澂咸委蛇而已署布政使
吳煦勸互市英法各國會剿雖有斬獲終不能支適湖
北鹽法道顧文彬自楚歸以曾大臣軍已克安慶將遵
江東畧軍威甚盛因倡乞援之議預備輪船濟師吳布

政願任餉事薛巡撫龐侍郎從之遂遣戶部主事錢鼎
 銘候補知縣勵學潮候選訓導張瑛如皖乞師會 上
 厘念東南博求將帥曾大臣疏舉福建延建邵遺缺道
 李鴻章率軍進援先是浙江按察使曾國荃屢建奇功
 威望大著 朝議欲其由滬圖蘇曾大臣商之國荃國
 荃謂金陵為賊根本急攻金陵賊必全力以援護而後
 蘇常可圖曾大臣壯其謀遂以圍攻金陵屬之國荃而
 以蘇事屬李鴻章浙事屬左宗棠已則駐安慶居中調
 度於是東南肅清之局定矣十一月二十八日浙江省

東南肅清之局定矣

城再陷巡撫王有齡自經於署諡壯愍越四日駐防滿營

亦陷將軍瑞昌殉難諡忠壯先後殉節者張學使錫庚諡文

貞傑副都統純諡果毅文總兵瑞諡果毅署布政使麟趾諡壯

介接察使甯曾綸諡義烈糧道暹福道員胡元博彭斯舉

朱琦署仁和縣吳保豐其先在城外中礮死者張提督

玉良諡忠壯賊入城見王巡撫張學政屍相戒不敢犯忠

賊令以禮殮之旋送二櫬至上海初杭城被困無糧彭

斯舉詳度形勢議自望江門築甬道若夾巷直達江干

通糧餉為饒提督廷選所誤廷選實禍浙者觀於王巡

撫索潰弁書可知書曰省中庫無餉倉無米出陣之兵
不見一賊而潰新置鑼鼓帳篷盡棄度日如年度夜比
年更長咨查首先潰退之人廷選乃殺其不悅者二人
以解十二月 詔授太常寺卿左宗棠爲浙江巡撫時
曾按察將窺金陵議由天長縣進兵江南提督李世忠
隸袁大臣臨淮軍勇銳激發力圖肅清江北知天長六
合有隙督勁旅猛攻遂於十二月二十一日克六合二
十五日克天長三日內連克二堅城李提督奉 旨嘉
獎是月上海官紳以浦東廳縣復陷上海縣知縣劉郁

膏往援失利乃集議請立中外會防局結英法兵剿賊
在籍刑部郎中潘曾瑋航海入都謁議政王軍機大臣
議准與英法會剿自是深得協助之力而泰西火器因
之盛行

同治元年壬戌正月李提督世忠以攻克天長六合之師進
攻江浦約守賊劉元成單玉功等爲內應初四日揮隊直前
賊衆驚潰元成等率衆還戈僞報王僞王宗操天福等七
十餘名立復縣城次日至浦口城下九洲洲援賊麇至李提
督率隊痛殲之亦奪其城三月江蘇布政使曾國荃自湘募

勇回皖會水陸各軍克復巢縣含山和州三城攻奪銅城隔
雍家鎮裕溪口西梁山四要隘賊之據金陵也以全力扼東
西梁山東爲古之博望西爲天門俗呼東西梁山兩山對峙
大江至此一束水急流洄較小孤山尤形險曾布政以此處
爲金陵鎖鑰統全勝之師上逼西梁山賊壘克之四月復會
彭侍郎玉麟水師克復太平府城及金柱關東梁山要隘並
蕪湖縣城賊固以兩山爲鎖鑰亦以蕪湖太平爲屏障而尤
以金柱關爲關鍵自是上下各城隘悉爲我有二十八日再
率所部各營乘勝衝破周村一卡遂進駐江甯鎮之板橋熟

察形勢必從大勝關之三汭河下手陸師乃有運糧之路水師乃有立營之所然縱橫三十里外尙有一秣陵關環水巍峙大勝關之右輔也偵知賊備未嚴五月初一日布政引軍馳抵關下守關賊目汪伍登尙彪周蘭璧等舉衆降初二日奪取大勝關三汭河二壘時彭侍郎駐師金柱關聞布政懸軍深入急約提督王明山率水師由烈山駛近大勝頭關策應適布政於初三日昧爽整旅而來遂拔頭關過此以往則爲江心洲堅大石壘倚洲雙聳侍郎會王提督親督舟師挾火具登岸延燒草廬官軍於火光中躍入賊牆羣賊奔潰復

進奪蒲包洲遂泊金陵之護城河口曾布政卽由陸路倚護
水師驅軍逼紫雨花臺距聚寶門五里許賊數來窺犯輒被
擊却六月初六初十等日有悍賊自蘇州來援互有損傷十
六日城中出賊四五萬人分撲各營道員劉連捷見黃衣騎
馬賊指揮督陣猛鷲無匹潛然巨礮一發而殪乘賊亂併力
擊之立解重圍二十四日甯國餘賊復合城賊來襲經知州
易良虎擊退閏八月忠賊李秀成在蘇大會羣酋計議以輔
賊楊輔清及黃文金胡鼎文等衆數萬擾甯國以偽護王陳
坤書等衆數萬由太平擾金柱關忠賊自率十三僞王號稱

六十萬專注金陵甯國之賊爲鮑提督超奮力擊敗其趨金
柱關一股者蓋冀橫格甯國金陵兵氣經彭侍郎督禦於花
津五戰皆捷俄報小丹陽賊由東壩拖過戰船數百隻分布
固城南漪各湖意圖出江逼南路彭侍郎親駕飛划迎擊楊
提督載福聞警踵至賊乃退去時忠賊圍援金陵之衆已腐
至志在必逞東自天印山一名方山西至板橋鎮旗幟如林層層
排列甯國敗衆嘯聚於潛化鎮者亦約二萬人是月二十日
各賊直逼官軍營壘尤趨重於東西兩隅曾貞幹彭毓橘劉
連捷等縱軍兜擊二十一日賊衆統分二十餘枝同時並進

城賊大出應之曾布政飭各營俟賊逼近擊以排礮賊踣伏礮聲甫絕殺聲又起日夜環伺不少休息二十二日賊由東西兩路進攻分黨二萬徑趨洲上抄出猛字諸營之後左傳貴衝入賊陣馬蹶戰歿二十三日始稍稍擊退而賊之圍逼西路已歷六晝夜彭毓楠等營料賊疲乏越濠擊之破其四壘二十六至二十八日賊悉向東路逼營而陣洋鎗洋礮驟若飛蝗潛穴地道百計環攻劉連捷朱洪章等率衆憑牆而拒維時適大江以南疫氣盛行曾布政以病卒太多弗耐久戰派李臣典調防護守二十九日賊負板蛇行直薄營牆填

濠欲上前賊雖斃後賊踐屍而進戰將倪桂中礮死曾布政左頰爲鎗子所傷仍裹創上濠以安軍心九月初一日侍賊李世賢率大股復自浙東來援急攻吉後營礮臺王光勝等六員相繼傷亡曾布政恐有蹉跌商令各營增築內牆內濠以自固乃我備愈嚴賊計愈狡以箱櫃棺柩實土排砌濠邊明防礮子而暗鑿地道於下用火箭攢射之始少挫初五日分三路出擊毀西路賊壘十二座殲斃近三千人官軍惟李臣典吳國宗負重傷李正升等三員殉焉自此西南一路賊不敢復犯初六日以後東路賊仍環逼不懈朱洪章劉連捷

武明良蕭開印等且戰且堵賊傷斃七百餘人營中亦折文喜才等五員幸揚州都將軍興阿派來五營曾大臣由安慶調來四百人蕪湖派來數營先後赴援兵力稍增無如主客相搏不數十武節短勢險仍不能出大隊痛剿而賊之畚鍤負土者已及牆濠之下矣十二日西南隅賊衆悉併東路潛伏雨花臺後曾布政知地道將轟令各營謹備不轉瞬而嘉字吉後兩營外地道果發營牆各崩十餘丈賊爭先擁入呼聲動地兩營各入賊數千官軍咸寂然不動俟烟障一開分路驟出忍死決戰一面於亂亦交錯中併力搶險將場口內

之賊屠戮靡遺濠外賊仍舉旗督戰各營再出奮擊賊之精銳摧折無算將官之死者陳得月等十二員其同時地道迸裂者尙有副後一營經劉連捷麾軍剿退侯永清等七員死之其同被賊圍者仍有信字等七營經李臣典等從內擊出曾貞幹等從外擊入賊亦敗走是役也殺賊近萬誅僞德王及僞主將等曾自後賊餒少衰而設謀圖逞仍百出不窮十三日於東路別開地道又於西路決江水以淹運道西路賴曾貞幹等築營高堦竭力保護其東路當經武明良毀賊一壘一穴十六夜蕭開甲等破一壘一穴十七二十一二等夜

劉連捷共焚賊二壘二穴而賊仍開掘不已曾布政令各營審賊所向隧而迎之二十四日劉連捷營洞穿一穴與賊遇見遂聚而殲之二十五日蕭開印復穿一穴熏以毒烟灌以穢水賊亦無一生者二十六夜風雨交作劉連捷揮軍出濠襲破潛掘地道之三壘越三日劉連捷營中發土丈許豁然開朗賊不得遁盡瘞地道中十月初一日又鑿開一處初二日曾布政中軍又鑿開一處並經各營出擊賊技乃窮蹙初三四等日乘賊懼伏進拔十數卡初四夜破東路四壘西南諸壘聞風驚潰初五日各軍追賊由善橋至板橋周村並南

路牛首山一帶搜剿至方山之西而南門外雨花臺兩旁留守之賊約城賊大出截官軍歸路賴劉連捷等營左右蕩擊其東路者向南門繞城而遁其在西南者向秣陵關一路而遁共閱四十六日重圍乃解官軍以病疫之餘當非常之饑猶目髡面皮肉幾盡軍興以來未有若是之苦戰尤爲出力之將七十四員劉連捷曾貞幹居首其力戰陣亡將弁則有副將倪貴等二百七人賊退後忠賊仍在秣陵關六郎橋等處多築堅壘俟侍賊由東壩擡船過壩卽分向金陵金柱關以圖再逞而密令其子及僞對王洪春元等自蘇糾衆渡江

至九洲力攻李提督世忠營圖北犯李提督親赴前敵防
剿十七十八十九等日賊分兩枝突至浦口遣悍賊數千人
繞過前營負土填濠勢極凶猛李提督突陣馳逐馬中礮彈
驟復步戰搏賊奮斬多名賊始遁去二十一等日又攻南岸
石埠橋營並結筏渡江復由九洲分股竄至江浦之北圖
牽制各營經官軍分隊夾擊賊始向和州逸去遂連陷和州
含山巢縣三城李提督卽駐江浦督剿十一月初六等日南
岸官軍毀石埠橋各壘賊仍無退志經李提督督飭各軍夾
攻賊始撤圍遠遁是月二十七日鮑提督軍大擊賊於馬頭

鎮楊柳鋪一帶斃賊約八千人

附記

是年正月忠賊等衆撲浙江衢州府經閩浙慶總督端派兵援剿解圍輔賊復糾股竄開化之張村等鎮竊衢州左巡撫宗棠率練勇由婺源入浙疊獲大勝開化肅清江蘇賊自竄奉賢後直撲吳淞口進擾上海經法國輪船施礮擊退遁入青浦其浦東大股踞高橋欲斷我要隘美國人華爾約英國水師提督何伯法國水師提督卜羅德各帶隊伍礮船列海濱華爾與美國人白齊

常勝軍

李道遷上

文撲進賊巢掃蕩無遺類各外國自天津議和後極敦和好華爾白齊文願更服色爲中國臣民薛巡撫以聞得旨嘉獎並賞給四品頂戴花翎薛巡撫卽飭於松江教兵勇習洋鎗協同剿賊稱其洋鎗隊爲常勝軍而上海賊氛仍日夕相逼吳署布政籌借餉銀二十餘萬兩由會防局僱備輪船仍遣勵學潮錢鼎銘先後赴安慶迎師曾大臣檄李道鴻章與記名提督淮揚鎮總兵黃翼升統湘淮水陸東征李道遂率程學啟等陸師十一營於三月初七日乘輪船先下初十日抵上海紮營

城南壁壘爲之一新四月初十日李道奉 旨署理江蘇巡撫接統上海舊有諸軍以劉郁膏署江蘇按察使十五日李巡撫鴻章受事是日荊州將軍多隆阿會皖軍總兵張得勝等克復廬州府城英賊陳玉成率餘黨於十七日竄至壽州城外中津渡地方先經勝大臣密飭已革川北道苗沛霖設計誘之得將英賊縛獲並擒僞導王陳士榮僞從王陳德等擒首張落刑聞信糾大股七八萬於二十六日突至江口集圖半途劫奪經各營與苗練併力攻剿始退去解英賊等至勝大臣營訊

供奏奉 諭旨卽將陳玉成在軍前凌遲處死陳仕榮等一併正法苗沛霖前此作亂壽州獲罪極重至是免其治罪嗣又以生擒張落刑有功仍未蒙開復原官怨望復叛次年冬伏誅上海常勝軍克復青浦縣英國何提督法國卜提督奉 詔嘉獎華爾授副將李巡撫令參將程學啟勝嗣武都司劉銘傳同知潘鼎新通判韓正國以四千人進南匯縣周浦鎮爲北路英法兵自松江進金山衛爲南路四月十九至二十三等日南北會攻痛剿賊於南奉交界處之南橋鎮平其壘收復奉賢

縣及柘林鎮卜提督勇往直前揮軍衝入高橋時中鎗陣亡李巡撫徇其國駐京參贊哥士耆之請先爲奏聞由輪船齎投總理各國事務衙門上之詔以卜羅德遠涉重洋協同剿賊臨陣捐軀洵屬無忝使命勇烈可嘉令李巡撫遣道府大員致祭一壇並賞貂皮百張彩絨四端由議政王傳給其家屬祇領前浙江甯紹台道張景渠亦招集廣艇借助英國兵疊克甯波府鎮海縣二城英國何提督請李巡撫分上海常勝軍前往助守是月英賊羽黨僞扶王陳得才等四僞王先由河南

邊界竄陝西嗣聞廬州被困復竄回河南南陽一帶時
有川匪藍大順藍二順者先於咸豐九年在雲南昭通
府倡亂蹂躪川中分竄陝西河南至是與陳得才等互
相應援五月初三日浙江湖州府陷在籍總辦團防布
政使銜福建糧道趙景賢被執不屈知府瑞春等死之
景賢前刑部侍郎炳言子由舉人議叙知府洊升今職
杭州再陷忠賊等以全力困之糧援並絕是日千總熊
得勝開門延賊城遂陷景賢被執至蘇州拘繫經年卒
以罵賊中鎗而殞

諡忠節

奉

旨照巡撫例優卹熊得勝

旋潛至上海經李巡撫訪獲梟示六月初八日淮揚鎮黃總兵親統水師四營抵上海以曾大臣奏請署江南提督十五日鮑提督軍痛洗輔賊之衆於甯國府克復府城及甯國縣城僞保王洪容海降卽用其衆襲取廣德州城時竄擾四川之翼賊石達開分股入貴州陝西湖北諸邊境陝西藍二順等賊亦竄河南湖北邊境將軍多隆阿克廬州後奉旨督辦陝西軍務已抵商南忽報賊匪糾合豫捻由浙川襲紫荊關因督兵回剿大破之八月上海常勝軍克復浙江慈谿縣副將華爾陣

亡得 旨於甯波松江兩府建華爾專祠仍從優議卹
旋有法國人充中國總兵勒伯勒東及充中國稅務司
日意格等會張景渠攻克上虞縣進剿紹興府勒伯勒
東以親燃巨礮炸傷頭骨殞命亦得 旨嘉獎優卹之

九月奉 上諭通飭各統兵大臣選派都司以下員弁
赴上海甯波等處學習外國兵法偽扶王陳得才等由
湖北分竄河南復入陝西十月皖南官軍續克績溪祁
門二縣十一月李巡撫進窺蘇州浙江知府魏喻義攻
克浙江嚴州府是月浙江諸暨縣包村民團失守初賊

踞紹興有諸邑西北鄉包村農民包立生者就其村倡義集團拒賊各以素帛紮首號白頭軍約四千人恃地勢險僻每戰必勝賊被俘斬無算遐邇挈妻孥財帛往依附者日眾聲勢益盛賊銜之切骨至是賊糾股十餘萬併力攻陷屠其村無噍類或謂立生精奇門遁甲術故咸驚爲神不知實僞也蓋立生特假是以固結人心恐怖賊膽欲遂其殺賊志耳十二月忠賊自金陵回蘇州

二年癸亥二月僞懷王周賊糾衆竄至句容城外會合丹陽

偽效天義陳賊圖由九湫洲北渡經馮提督子材派軍分路
 迎擊陣斬陳賊陳英賊叔也時李提督世忠督兵分迎浦口
 窺九湫洲被賊二萬餘衆圍攻斷絕糧道各將弁堵禦兩晝
 夜軍火不繼遂撤回江浦賊復繞城困之水洩不通糧藥俱
 罄將弁冒死潰圍出李提督具呈自請革職撤去勇號由曾
 大臣代奏得 旨失守各營實因糧盡援絕衆寡不敵尙非
 有心貽誤上年攻克六合等城頗著戰功著加恩撤去幫辦
 軍務免其革職以示薄懲初侍賊李世賢自金陵遁去糾悍
 賊數萬屢犯金柱關各軍苦戰獲勝並克灣址黃池諸要隘

咸陽江浦

羣賊竄往金寶圩溧水小丹陽等處四月鮑提督超及劉連捷蕭慶衍等軍再克巢縣含山和州三城先是忠賊以大股圍六安州戰敗東竄將回救蘇州時曾布政國荃已授爲浙江巡撫得江蘇李巡撫書屬力攻上游以分賊勢母令忠賊得以全力援蘇曾巡撫以忠賊回救蘇州固可慮尤虞其直犯揚州計莫如急爭金陵老巢使無暇他顧乃於是月二十七日令各軍多備攻具乘夜出隊以總兵李臣典等專攻雨花臺僞城副將趙清河等攻聚寶門外南卡石壘總兵晏澧週等攻西卡石壘副將何玉貴等攻東卡石壘三更時軍抵

偽城束草填濠架梯欲上賊驚覺燃礮外擊勇隊幾潰李臣
與攀旗直前諸軍分擲火球火箭悉入偽城天嚮明副將趙
三元等分督各隊肉逼齊登敵樓火發賊勢不支當將偽城
攻克其聚寶門外九石壘亦經趙清河等奮力平毀餘賊竄
入城官軍追過長干橋逼入水者無算城賊出大隊接戰復
經官軍擊回十一載未拔堅壘今乃拔之羽翼旣翦金陵城
在掌握矣官軍旣連克城隘李巡撫軍亦進圖蘇州閩浙左
總督宗棠軍進圖杭州賊衆倉皇失措江北賊紛紛南渡天
長六合來安次第解圍浦口賊棄城遁江浦之賊獻書請鮑

提督劉按察連捷營乞降察知其僞引軍疾攻之亦宵遁遂將浦口江浦一併收復沿途追剿抄過賊前賊竄九淤洲賊不及納被水師截江圍剿死者數萬計五月初十日曾巡撫乘夜至新江口與彭侍郎及楊提督岳斌會勘九淤洲形勢難以猝破擬先攻南岸諸隘撤其藩籬十二日派水師總兵丁泗濱等爲頭隊從下關進總兵喻俊明等爲二隊從草鞋夾進各循南岸飛駛而下賊礮齊發官軍預以枯荻灌油縱火江上焚賊船數百衆勇乘勢逼壘搶險而入平下關草鞋夾八壘十四日分兵襲燕子磯亦殺賊克壘而還楊提督

探知北岸叢莽中有隄埂一道可達九洲賊濠之外商令劉按察等陸師數隊由隄埂缺處鳧水進十五日會合水師大舉進攻人殊死戰鎗礮交轟無片刻息日晡賊防少懈乃於初更時移船潛進賊壘乘西南風焚船數隻延及洲上卡屋各軍大呼升岸躍過重濠前鋒旣殪後者更進二更後越牆撲入聚殲之無一脫者遂奪九洲偽城長江一律肅清賊自踞金陵爲僞都東逆楊秀清布置最密城外如九洲七里洲上關下關雨花臺鍾山秣陵關江東橋上方橋等處類皆築壘如城掘濠如河爲堅不可拔之基自官軍攻克數

處聲威大震賊膽愈寒七月初旬又克印子山賊巢其江東橋爲西南要隘曾巡撫飭道員陳湜圖之上方橋爲東南糧道飭提督蕭慶衍圖之二十日蕭慶衍出印子山之東逼壘下寨二十二日曾巡撫復選精銳數隊滾營而進更紮蕭慶衍新壘之前畀巨礮晝夜環攻賊堅守不出二十九日又選總兵熊登武等繞出上方橋搶紮數營截賊後路蕭慶衍知壘賊計窮令各營於夜半擁至濠邊大呼猛進比賊驚覺軍士半已入壘立將上方橋賊壘攻毀其江東橋賊壘旣堅且高隔水二道逾月未下八月十一日夜風霾蔽月咫尺莫辨

陳湜選銳卒數百涉流而渡競擲噴筒賊方驚眩官軍已衝過浮橋陳湜督隊繼進或援梯入或從礮眼蛇行入遂拔石壘並將附近之壘一鼓下之城中出援之賊適遇總兵蕭孚泗自賽虹橋突出亦受創而遁此外尙有城東數隘未下近城者曰中和橋曰雙橋門曰七瓮橋稍遠者曰方山土山曰上方門高橋門迤南則爲秣陵關以至於博望鎮曾巡撫以東路未平不能制賊死命令蕭慶衍等東渡立營而賊已先築數壘以拒九月二十日蕭慶衍揮軍從上下游過河破五壘始將東岸營壘築成二十一日賊諸道並出經各營奮力

競進賊反竄遂克上方門高橋門雙橋門諸賊壘右路方山
土山之賊亦各聞風棄壘奔於是七登橋踞賊惶遽欲遁正
謀一鼓並下忽城中出大股來援蕭孚泗等督各軍併力擊
却之二十四日夜遣死士潛往縱火賊衆冒火突出乃將七
登橋堅壘攻克其博望一鎮總兵朱南桂已先五日襲取之
曾巡撫謂博望旣得則秣陵關之勢孤七登橋旣得則中和
橋之勢孤二十五日派總兵伍維壽等南畧秣陵關陳澍等
出七登橋之西與熊登武等會師於中和橋一戰克之秣陵
關之賊見馬步馳至卽棄釜奔潰自是鍾山西南無一賊巢

欽定四庫全書

恢復高瀋

恢復溧水

維時甯國太平以東各處尙爲賊藪彭侍郎率喻俊明等約道員吳坤修等陸師從事水陽楊提督亦親統戰船來會連克水陽新河莊各賊壘方議合攻高瀋而賊目楊友清涕泣乞撫乃受其降十月初二日入城安撫是夜畧取固城鎮初三日再克甯國縣守東壩之賊黎立新等上書請爲內應建平守賊張勝祿亦請獻城降時鮑提督已克東夏四壘與彭侍郎合趨東壩奮擊之輔賊楊輔清從亂軍中逸去守將立獻僞城遂於初七日克復東壩踞溧水之楊英清亦願繳軍械各散回籍十二日遂收復溧水縣城十一月二十四日忠

賊敗衆勾結句容悍賊二三萬分道撲鎮江經馮提督子材擊敗之陣斬僞岡天義黃賊餘賊退回句容丹陽忠賊先於十一日帶馬隊數百人潛入金陵倉皇入見洪逆曰事急矣此城恐不能守方今內糧旣匱外援不來曾軍氣盛不如棄而他圖洪逆侈然登座盛怒切責忠賊復曰所恃以守城者在城外各隘道耳今失雨花臺則南門之道絕失江東橋則西門之道絕失七簷橋則東門之道絕曾軍結營城外作長濠又於下關嚴屯重兵制我出入糧道已斷人心不固京中朝官半皆文弱老邁居民亦多婦孺倉卒有變豈能驅之臨

今附錄其言 卷三
三
陣洪逆猶僞爲大言曰朕奉天父天兄聖旨命我下凡作天下萬國獨一真主何懼之有汝欲在京在外惟任汝意汝不扶助有人扶助我有天兵百萬千萬妖兵豈能飛入汝其勿慮嗣仍留忠賊在城不使出外藉以保衛

附記

是年正月浙江蔣布政益澧高總兵連升劉按察典等克復湯溪龍游蘭谿三縣及金華府城續克永康武義二縣收復浦江縣道員張景渠統兵會英國總兵呿樂德及權授江蘇副將達爾第福之軍進攻紹興府達爾

第福陣亡江蘇李巡撫以洋將德克碑統其軍攻克府城並諸暨蕭山等縣浙東肅清二月僧王在蒙亳一帶剿辦捻匪適首惡張落刑等屬聚尹家溝意圖竄突經翼長舒通額侍衛陳國瑞統馬隊破其雉河集老巢其下李勤邦等赴宿州知州英翰行營投誠領計將張落刑並其子張濬義子王碗兒誘獲解送僧王大營奉旨處以極刑張濬王碗兒正法偽輔王楊輔清糾合各偽王衆十數萬聚皖南西河紅楊樹一帶圖鮑提督霆字老營經總兵宋國永奮擊大破之三月江蘇李巡撫

檄總兵程學啟洋將戈登攻克太倉州城續復崑山新
陽縣城江西沈巡撫葆楨會左總督各軍克復安徽黟
縣進破賊於祁門陣斃偽孝王胡鼎文四月擾四川之
翼賊石達開率大股由雲南米糧壩渡金沙江經駱總
督秉章派總兵唐友耕知府蔡步鍾調集漢土各兵痛
剿死者萬計翼賊率餘黨七八千人奔至老雅鑿地方
復經土兵截殺進退無路爲參將楊應剛等擒獲解省
訊明極刑處死七月曾大臣湖口各軍攻毀湖口文橋
諸賊壘江西全境肅清其敗賊偽堵王黃文金等七悍

酋擁衆十餘萬東犯池州直逼青陽環築百數十壘總
兵朱品隆苦守三十八日援兵至內外夾擊賊始潰走
九月石埭太平旌德踞賊僞奉王古隆賢遣人至朱品
隆處通款曾大臣許之遂復三城十月李巡撫親督各
軍攻逼蘇州忠賊率死黨萬餘宵遁專交老賊僞慕王
譚紹洸拚死固守是月二十四日慕賊正在城抵拒對
衆指揮僞納王郃永寬等令僞天將汪有爲出其不意
將慕賊刺死開門迎降遂克蘇州省城李巡撫署其衆
爲二十營仍屯閩胥盤齊四門郃永寬等不肯薙髮程

學啟慮莫能制白李巡撫必誅之二十六日出城請謁
巡撫察其狀誠叵測乃將郃永寬及僞比王伍貴文僞
康王汪安均僞甯王周文佳僞天將范啟發張大洲汪
懷伍汪有爲等駢戮之得 旨曾大臣優叙李巡撫加
太子少保銜賞穿黃馬褂提督黃翼升等給賞有差權
授江蘇省總兵戈登賞給頭等金功牌並銀一萬兩以
示嘉獎十一月知府李鶴章等克無錫金匱各軍遂進
攻常州又收復浙江平湖海鹽諸縣隘及攻克江浙兩
省三府交界之平望鎮要隘

金陵兵事彙畧卷四

江甯李圭小池

同治三年甲子正月曾巡撫國荃督陸師攻克鍾山賊壘扼斷太平神策二門遂合城圍金陵一城縣互百餘里東西南三面各要隘已悉爲我有惟東北鍾山賊壘未克城北兩門未合圍終難制其死命曾巡撫商之楊提督岳斌派師船絕江面接濟飭總兵朱洪章等繞過鍾山之後扼陸路接濟復調駐守金柱關之總兵朱南桂來助圍是月二十日夜忠賊之子僞二殿下率黨數千自句容護糧進太平門經朱洪章

等截擊斬七百餘級執二百餘人棄糧狼藉道左二十一日

曾巡撫親督各軍至洪山北固山

北固山在幕府山西南卽白石山

神策太

平等門詳勘形勢適忠賊糾大股先由城內猛撲嘉字營濠牆朱洪章等見賊抵死來犯率隊出濠夾擊賊返走上山鍾山之巔有大石壘僞名天保城羅雨春等率將弁攀援直上火球火箭從壘後擲入賊多冒火突出弁勇從礮眼肉薄而入立克僞城二十四日派蕭孚泗等營列隊太平門外護修二壘派湘後左右營守之維時總兵梁美材紮洪山朱南桂紮北固山堵神策門大路僅餘元武湖一段無兵而隔於湖

水自此援賊不得入城賊不得出勢甚危迫束手待斃矣先是元年曾軍直搗金陵時洪逆屢促忠賊回援忠賊曰曾軍由上而下利在水師我勞彼逸且以常勝之軍臨我屢挫之衆不可與爭宜作速多備糧食軍火爲固守計伺其懈而擊之當無不濟是忠賊頗有作賊才而洪逆惑於僞安福二王語不從迨城內乏食有欲通官軍爲獻城計者捕獲之下其事使安福治安福竟得賄數千金置不問洪逆以其兄爲可任而不知其愚一至於此也賊衆以乏食請於洪逆洪逆曰何不食甜露甜露者取百草之根所製謂天生萬物皆可養

大朕在宮中所食亦卽此物汝衆宜仿行之蓋洪逆曾有僞
詔令衆收藏甜露貯倉廩備緩急賊中有從者有不從者自
謂其言已驗深荷天父天兄默示之恩因曰此困當必不久
自有天兵來援其恃妄誕謾至死不變有若此者三月曾大
臣檄鮑提督進取旬容踞賊爲僞守王方海宗聞官軍將至
糾踞金壇寶堰等處之僞翰王項大英僞列王方成宗兩大
股同守之初五日鮑軍冒雨疾馳攻破三岔之賊初六日次
旬容所屬之塔岡結營未成賊突出四五萬人來撲分兵三
路奮擊大勝乘勢直抵城下附城四壘亦一鼓破之連夜攻

城四更時見城東隅火光
 由南門衝出將弁分路剿
 內應七人叩馬通報指擒
 法初七日克復縣城方海
 厚合謀抗拒初九日鮑提
 草填濠爭入一壘既破眾
 去時丹陽一路有鎮江揚
 金壇俄得鎮營馮提督來
 剿鮑提督即派總兵龔雲

曾大臣飭令力保東壩之檄十九日飛馬傳知金壇各營盡
行撤回復慮城賊追躡或致疏失遂親率前隊於二十日折
回金屬之西洋村設伏於茅山一帶賊果出大股悉力窮追
伏兵俟其追過茅山呼喊而出賊急退追殺五十餘里逼至
金壇西門賊不得進而城賊亦啓門遁收復縣城四月初八
日鎮營馮提督軍回揚營總兵詹啓綸克復丹陽縣敗賊共
四萬餘衆由天王寺進竄大頭山一帶圖再犯東壩復分股
圖犯高瀆經各軍併力兜擊逐出三十里樊賊近萬中有僞
王十七人餘衆向廣德一帶竄去於時江蘇郡縣皆復惟金

陵未下城賊自入春以來常放婦孺出外爲節食計官軍兩次穿穴地道又用雲梯猛攻均未得手自丹句克復成檻虎勢矣五月初八日曾大臣奉 上諭李鴻章所部兵勇攻城奪隘所向有功礮隊尤爲得力現在金陵功在垂成髮捻蓄意東趨遲恐掣動全局李鴻章豈能坐視着卽調勁旅數千及得力礮隊前赴金陵會同曾國荃相機進取速奏膚功李鴻章如能親督各軍與曾國荃會商機宜剿辦尤爲得力曾國藩身爲統帥全局在胸尤當督同李鴻章曾國荃彭玉麟和衷共濟速竟全功掃穴擒渠同膺懋賞總以大局爲重不

可稍存畛域之見欽此曾大臣疏稱蘇常克復之後臣本擬
咨請李鴻章親來金陵會剿特以該撫係封疆將帥之臣又
值苦戰積勞之際非臣所敢奏調函詢臣弟國荃亦以師久
無功不敢更求助於人近於畏難卸責始勤終怠者之所爲
乃兩月以來百計環攻傷亡至四千餘人所挖地道已被該
逆從內掘出三洞此外諸洞亦難奏效而曾國荃焦勞致疾
飲食漸減餉項奇窘尤爲可慮臣已恭錄 諭旨加函催請
李鴻章親來金陵使僅派將前來其知者以爲憐該撫之過
勞信蘇將之可恃不知者以爲臣弟貪獨得之美名忌同列

之分功尤非臣兄弟平日報國區區之意旋兩次奉旨
催李鴻章助攻金陵復疏稱李鴻章平日任事最勇此次稍
涉遲滯蓋絕無世俗避嫌之意殆有讓功之心臣亦未便再
三瀆催矣奉 上諭據曾國藩奏稱曾國荃焦勞致疾餉項
奇絀尤爲可慮等語前據李鴻章將輪船經費五十萬兩解
赴大營曾國藩何時收到卽行具奏曾國荃積勞致疾聞之
深爲廑念現在大暑嚴蒸該大臣卽傳知該撫善爲調攝金
陵城大而堅賊悍且衆困獸之鬪不可不防該撫務當撫循
士卒嚴防竄突先爲不可勝以待敵之可勝欽此是月三十

日曾巡撫攻克龍脖子山石壘賊所稱地保城也巡撫遂令築礮臺其上發大礮擊賊居高臨下城中形勢在掌握中六月十六日曾巡撫攻克江甯省城大功告成是日亥刻巡撫與楊總督彭侍郎會疏由驛日馳八百里將大概情形先行奏捷十九日曾巡撫咨曾大臣曾大臣得咨以大功不易居讓湖廣總督官大臣居首會同陝甘總督楊岳斌兵部侍郎彭玉麟江蘇巡撫李鴻章浙江巡撫曾國荃於二十三日連銜入 告疏云竊照官軍攻克金陵業經浙江撫臣曾國荃將大概情形於十六日亥刻會同臣等馳奏在案茲據曾國

荃十九日咨稱此次攻城剿洗老巢之難與拚死鏖戰之苦實爲久歷戎行者所未見自得天保城後城中防守益密地保城扼住隘路百計環攻無隙可乘直至五月三十日始經李祥和羅逢元黃潤昌陳孝武熊上珍王仕益等率隊攻克占取龍膊子山陰居高臨下勢在掌握自六月初一日各營輪流苦攻傷亡極多李臣典偵知城內米麥尙足支持數月又見我軍地道三十餘穴都已無成官軍五萬餘人筋力將疲若不乘此攻克事久變生深爲可懼李臣典願率吳宗國等從賊竄極密之處重開地道蕭孚泗黃潤昌熊登武王遠

和願距城十數丈修築礮臺數十座通派各軍隊伍剗割溼
羅蒿草堆網山積上覆沙土左路地勢甚高利於聲攻右路
地勢極低利於潛攻如是者半月未嘗一刻稍休肉薄相逼

損傷精銳不可勝數總兵陳萬勝

諡武烈

王紹羲

諡剛毅

郭鵬程

諡勇烈

等素稱驍將數日之內次第陣亡尤堪憫惻十五夜四

更地道裝藥之時曾國荃與李臣典正在洞口籌商一切忠
酋李秀成突出死黨數百人由太平門傍城根直犯地道大
壘別從朝陽門東角出數百人裝官軍號衣持火蛋延燒各
礮壘及附近溼蘿蒿草官軍久勞之後夜深幾爲所乘賴伍

維壽李臣典黃廷爵張詩日堵佐右路擒斬亦多幸克保全
洞口十六早向明曾國荃將四路隊伍調齊預飭各軍穩站
牆濠嚴防沖突惟將太平門龍膊子一帶自黎明攻至午刻
李臣典將地道封築口門安放引線曾國荃懸不貲之賞嚴
退後之誅劉連捷朱洪章武明良伍維壽熊登武陳壽武李
臣典張詩日各率營官席坐敬聽願具軍令狀誓死報國遂
傳令卽刻發火霹靂一聲揭開城垣二十餘丈煙塵蔽空甑
石滿谷武明良伍維壽朱洪章譚國泰劉連捷張詩日沈鴻
寶羅爾春李臣典等皆身先士卒直從倒口而入各弁勇

附齊進銳不可當左路城頭之賊以火藥傾盆燒我士卒死者甚衆大隊因之稍却經彭毓橋蕭孚泗李祥和蕭慶衍蕭開印等以大刀手刃數人由是弁勇無一退者而武明良伍維壽朱洪章劉連捷譚國泰張詩日等各率隊伍登龍廣山與右路太平門之賊排列轟擊移時賊乃却退李祥和王仕益從太平門月城攻入羣賊知此次地道缺口不復似前次之可以堵禦矣維時官軍分四路剿擊王遠和王仕益朱洪章羅爾春沈鴻賓黃潤昌熊上珍等進擊中路攻僞天王府之北劉連捷張詩日譚國泰崔文田等進擊右路自臺城趨

神策門一帶適朱南桂朱惟堂梁美材等亦率隊從神策門地道之旁梯攻而入相與會合齊進兵力益厚直廕戰至獅子山奪取儀鳳門其中左一路則有彭毓橋率羅朝雲趙河清黃東南與武明良武明善武義山等由內城舊址直擊至通濟門左路則有蕭孚泗熊登武蕭慶衍蕭開印率蕭致祥周恆禮李太山蕭清世蕭恆封朱吉玉趙太和劉長槐蕭上林等分途奪取朝陽洪武二門城上守陴城門守樓之賊及附近一帶賊隊悉被殺戮其抄截疾馳各路同一神速其留兵置守各門同一布置此十六日地道成功城中廕戰及東

北兩路抄截之情形也方我軍大隊之抵龍廣山也西南守
陣之賊猶植立未動迨奪取朝陽門賊始亂次而羅逢元張
定魁彭椿年張光明楊西平何鳴高彭光友熊紹濂羅興祥
葉必信等各率所部從聚寶門之西舊地道缺口仰攻而入
李金洲胡松江朱文光武交清劉湘南易孔昭戴名山張正
榮等率隊從通濟門月城緣梯而上而陳湜易良虎易良豹
龐清垣率吳隆海張叶江晏恭山馮盛德陳汝俊劉定發各
營猛攻旱西水西兩門月城僞忠王李秀成方率死黨狂奔
將向旱西門奪路沖去適爲陳湜大隊所阻遏乃仍轉回清

涼山江南提督黃翼升率許雲發等水師各營攻奪中關攔江礮石壘乘勢猛攻濱江之賊遂與陳湜易良虎等奪取水西旱西兩門將守城賊殲除由是全城各門皆破大勢已定日色將暝陳湜易良虎遙見忠酋賊隊隱匿於西南房屋如林之內益戒所部嚴防賊沖彭毓橘置守聚寶門通濟門李臣典李祥和扼守太平門黃潤昌王遠和朱洪章等星夜收隊結爲圓陣站立龍廣山稍資休息此水陸各軍攻克西南兩城及分守要隘預防賊股沖突之情形也方朱洪章等與賊搏仗於僞天府城北之時沈鴻賓周恆禮袁大升等率

隊從左路捲旗疾趨繞僞城之東設伏出奇爲擒渠掃穴之計迨朱洪章馬帶傷悍賊穩扼石橋我軍隊伍不能飛越城河繞僞城之西當日暮苦戰之後正兵收隊龍廣山而伏兵深入由僞城之東逶迤而南不能收隊時已三更僞忠王傳令羣賊將天王府及各僞王府同時舉火焚燒僞宮殿火藥沖霄煙燄滿城袁大升周恆禮沈鴻賓等見僞殿前南門突出悍賊千餘人執持軍器洋鎗向民房街巷而去知是洪逆竄至民房遂率隊腰截擊之殺賊七百餘人奪玉璽一方金印一方寬廣約七寸卽洪酋僭用之印也其僞宮殿侍女縊

於前苑內者不下數百人死於城河者不下二千餘人其時
僞城火已燎原不可嚮邇街巷要道賊均延燒塞斷官軍以
暮夜路徑生疎不能巷戰遂收隊站城此十六夜攻破僞天
王府內城燹賊極多之情形也是夜四更有賊一股假裝官
軍號衣號補手持軍械洋鎗約千餘人向太平門地道缺口
沖突經崑字湘後左右各營截擊多用火桶火蛋焚燒人馬
死者已多約尙有六七百人騎馬沖出向孝陵衛定休鎮一
路而逃伍維壽楊鉅南陶立忠等急率馬隊跟追曾國荃一
聞騎賊扮官軍逃出之信卽加派張定魁李太山黃萬鵬黃

廷爵等馬隊七百騎追之兼飛咨溧水東壩句容各守隊會
合追剿直至十九日酉刻伍維壽黃萬鵬等同營面稟追至
溧化鎮生擒僞列王李萬材帶領前進追至湖熟鎮見逃賊
在前當經馬隊圍住全數斬刈未留一人又追至溧陽據百
姓言前路並無賊踪經過曾國荃親訊李萬材供稱城破後
僞忠王之兄巨王幼西王幼南王定王崇王璋王乘夜衝出
被官軍馬隊追至湖熟橋邊將各頭目全行殺斃更無餘孽
又據城內各賊供稱首逆洪秀全實係本年五月間官軍猛
攻時服毒而死瘞於僞宮院內立幼主洪福瑱重襲僞號破

城後僞幼主

洪秀全逆屍本

犯城破受傷匪

出並搜擒僞丁

句容南鄉之

之者云福

凡十一人環

黎明復南遁

二軍士亦有

聞鄉人云城

填馬蹶忠賊

河勿避間見

領飲以粥即

日燒探之忠

三

馳報大營忠賊見馬失所在詢嫗嫗曰頃命子騎赴近市沽酒市脯不久當至忠賊雖疑而無如何其子抵營遂巡不敢入適有紅頂花翎乘馬出者料必營官密告以故導之行十九日就其村縛獲焉紅頂花翎者卽蕭軍門也惜嫗子後不知何往故二十日曾國荃親訊供認不諱應否檻送京師姓氏亦遂失

或卽在金陵正法咨請定奪其餘兩廣兩湖江北多年悍賊十七八等日曾左良周克正鄧吉山劉泰財聶福厚譚信高胡克安朱連甲王春華黎冠湘彭維祥陳萬合朱連泗謝三洪李臣榮彭玉堂劉金蘭等分投搜殺三日之間斃賊共十餘萬人秦淮長河屍首如麻凡僞王僞主將天將及大小酋目約有三千餘人死於亂軍之中者居其半死於城河溝渠

及自焚者居其半三日夜火光不息至十九日尙有賊踞高屋之巔以洋鎗狙擊官軍者此馬隊窮追逸出之賊及搜剿逆酋並羣賊之情形也現在派營救火掩埋賊屍安置難民婦女料理善後事宜百緒繁興竊念金陵一軍圍攻二載前後死於疾疫者萬餘人死於戰陣者八九千人令人悲涕不堪回首仰賴 皇上福威迄今乃得收寸效等情由曾國荃咨報前來臣等伏查洪逆倡亂粵西於今十有五年竊據金陵亦十二年流毒海內神人共憤我 朝武功之盛超越前古屢次削平大難焜燿史編如嘉慶川楚之役蹂躪僅及四

省淪陷不過十餘城康熙三藩之役蹂躪尙止十二省淪陷亦第三百餘城粵匪之亂蹂躪竟及十六省淪陷至六百餘城之多而其中凶酋悍黨如李開芳守馮官屯林啓容守九江葉芸來守安慶皆堅忍不屈此次金陵城破十餘萬賊無一降者至聚眾自焚而不悔實爲古今罕見之劇寇然卒能次第蕩平剷除元惡臣等深維其故蓋由我 文宗顯皇帝盛德宏謨早裕戡亂之本 宮禁雖極儉嗇而不惜鉅餉以募戰士名器雖極慎重而不惜破格以獎有功 廟謨雖極精密而不惜屈己以從將師之謀 皇太后 皇上守此三

者悉循舊章而加之去邪彌果求賢彌廣用能誅除僭偽蔚
成中興之業臣等忝竊兵符遭逢際會旣慟我文宗不及
目覩獻馘告成之日又念生靈塗炭爲時過久惟當始終慎
勉掃蕩餘匪以蘇子黎之困而分宵旰之憂此次應獎應
卹人員另繕清單籲懇恩施臣國藩拜摺後卽行馳赴金
陵李秀成洪仁達應否獻俘俟到金陵後察奪具奏等語二
十四日曾大臣由安慶御輪船馳抵金陵慰勞將士先有僞
宮婢爲湖南道州黃姓女子指出洪秀全埋屍處所於二十
七日在僞宮內掘出扛至營次曾大臣與曾巡撫親驗逆屍

遵尙邪教不用棺木以繡龍黃緞包裹袴腳亦用龍緞頭禿
無髮鬚尙全存已斑白左股右膀肉猶未脫驗畢戮屍舉烈
火焚之二十八日曾大臣巡視城垣并議設善後局賑卹難
民七月初一日奉 上諭本日官文曾國藩由六百里加緊
紅旗奏捷克復江甯省城一摺覽奏之餘實與天下臣民同
深嘉悅髮逆洪秀全自道光三十年倡亂以來由廣西竄兩
湖三江並分股擾及直隸山東等省逆踪幾遍天下咸豐三
年占踞江甯省城僭稱偽號東南百姓遭其荼毒慘不忍言
罪惡貫盈神人共憤我 皇考文宗顯皇帝赫然震怒恭行

天討 特命兩湖總督官文爲欽差大臣與前任湖北巡撫
胡林翼肅清楚北上游胡林翼駐紮宿松一帶籌辦東征復
特授曾國藩爲兩江總督並 命爲欽差大臣東征江皖
號令旣專功績日著十一年七月我 皇考龍馭上賓其時
江浙郡縣半就淪陷 遺詔諄切以未能迅殄逆氛爲憾朕
以冲幼寅紹丕基祇承 先烈恭奉 兩宮 皇太后垂簾
聽政 指示機宜授曾國藩協辦大學士節制四省軍務以
一事權該大臣自授任以來卽建議由上游分路剿賊飭彭
玉麟楊岳斌曾國荃等水陸並進疊克沿江城隘百餘處斬

賊外援逆匪十數萬人合圍江甯斷其接濟本年六月十六日曾國荃率諸將克復江甯外城殺賊數萬逆首仍踞內城抵死抗拒三更時僞天府及各僞王府同時火起洪逆衝出僞殿前南門竄至民房四更後賊股千餘人假裝官軍號衣向太平門缺口衝出經曾國荃親訊李萬材供稱城破後僞忠王之兄巨王幼西王幼南王定王崇王璋王乘夜衝出被官軍馬隊追及將各頭目全行殺斃又據城內各賊供稱首逆洪秀全實於本年五月服毒而死瘞於僞宮院內僞幼主洪福瑱重襲僞號李秀成一犯城破受傷匿於山內民房

經蕭孚泗親自搜出並搜擒僞王次兄洪仁達其餘兩廣兩湖等處多年悍賊經各將士於十七八日搜殺淨盡三日之內獎賊十餘萬人僞王僞主將天將及大小酋目三千餘名無一得脫者此皆仰賴 昊蒼眷佑 列聖垂庥 兩宮

皇太后孜孜求治識拔人材用能內外一心將士用命成此大功上慰 皇考在天之靈下孚薄海臣民之望自惟藐躬涼德何以堪此追思 先皇未竟之志不克親見成功悲愴之懷何能自己此次洪逆倡亂粵西於今十有五年竊據江甯亦十二年蹂躪十數省淪陷數百城卒能次第蕩平殄除

元惡該領兵大臣等櫛風沐雨艱苦備嘗允宜特沛殊恩用
酬勲勤欽差大臣協辦大學士兩江總督曾國藩自咸豐三
年在湖南首倡團練創立舟師與塔齊布羅澤南等屢建殊
功保全湖南郡縣克復武漢等城肅清江西全境東征以來
由宿松克潛山太湖進駐祁門叠復徽州郡縣遂拔安慶省
城以爲根本分檄水陸將士規復下游州郡茲幸大功告蒞
逆首誅鋤實由該大臣籌策無遺謀勇兼備知人善任調度
得宜曾國藩着賞加太子太保銜錫封一等侯爵世襲罔替
並賞戴雙眼花翎浙江巡撫曾國荃以諸生從戎隨同曾國

潘剿賊數省功績頗著咸豐十年由湘募勇克復安慶省城
同治元二年連克巢縣含山和州等處率水陸各營進逼金
陵駐紮雨花臺攻拔偽城賊衆圍營苦守數月奮力擊退本
年正月克復鍾山石壘遂合江甯之圍督率將士鏖戰開挖
地道躬冒矢石半月之久未經撤隊克復全城殄除首惡實
屬堅忍耐苦公忠體國會國荃著賞加太子少保銜錫封一
等伯爵並賞戴雙眼花翎記名提督李臣典於鎗礮叢中搶
挖地道誓死滅賊從倒口首先衝入衆軍隨之因而得手實
屬謀勇過人著加恩錫封一等子爵並著賞穿黃馬褂賞戴

雙眼花翎蕭孚泗督辦礮臺首先奪門而入並搜獲李秀成
洪仁達巨逆實屬勳勞卓著著加恩錫封一等男爵並賞戴
雙眼花翎欽此其餘文武一百二十餘員論功進秩有差又
奉 上諭粵逆久踞江甯負嵎抗拒實爲從來未有之悍寇
此次水陸各軍於溽暑炎蒸之際猛力環攻迅克堅城悍黨
悉除渠魁就縛非曾國藩運籌決策督率有方曾國荃躬冒
矢石鼓勇先登未由建此奇功成乃丕績朝廷喜悅之懷實
難盡述曾國藩等已加恩錫封外發去銀牌四百面著曾國
藩曾國荃等擇其功績最著者先行頒給以勵戎行各路賊

匪皆視金陵爲趨向此時巢穴旣覆其餘竄逸之匪自必聞風喪膽逆首李秀成洪仁達等均係內地亂民不必獻俘第該逆等罪惡貫盈自應檻送京師審明後盡法懲治以洩神人之憤欽此又奉 上諭咸豐三年洪逆竄陷江甯省城竊據者十有餘年百姓遭其荼毒或慘殺裹脅而鋒刃頻罹或戰徙他鄉而溝壑難免蚩蚩何辜罹此殘酷著曾國藩李鴻章查明江甯地方應徵錢漕分別應蠲應緩候旨施恩欽此初四日曾大臣親訊逆酋李秀成洪仁達等秀成書親供多至四萬餘字歷述賊中興敗始末冀貸一死曾大臣以該逆

罪大駢誅之因疏陳處治逆酋粗籌善後事宜畧云臣抵金陵周歷各營接見諸將均有憔悴可憐之色蓋自五月三十日攻破地保城後連攻十五晝夜但出行隊未支帳棚晝則日炙宵則露處又出入地洞之中面目黧黑雖與臣最習之將相見幾不相識其論功最首之李臣典冒暑受傷一病不起諸將弁亦傷病山積死亡相屬臣弟國荃前病業已痊愈近因隨眾露處過久又復遍發溼毒臣帶兵多年克城數十年罕見如此次之勞苦者臣宣道 皇仁多方撫慰既獎其可憫可敬之功復勗以忘死忘勞之義至僞天王洪秀全逆屍

將士積憤之餘皆欲得而甘心直至六月二十七日始從僞宮內掘出二十八日扛至營次臣與臣弟國荃驗看所帶委員中有曾任刑部秋審處之勒方琦龐際雲等暨各文武公同相驗該逆屍遵尙邪教不用棺木遍身皆用繡龍黃緞包裹雖纏腳亦係龍緞頭禿無髮鬚尙全存已間白矣左股右膀肉猶未脫驗畢戮屍舉烈火焚之有僞宮婢者係道州黃姓女子卽手埋逆屍者也臣親加訊問據供洪秀全經年不見臣僚五月二十七日官軍攻急服毒身死祕不發喪而城內羣賊城外官兵喧傳已遍十餘日始行宣布等語僞幼主

洪福瑱繞室積薪爲城破自焚之計眾供皆合連日在僞宮
灰燼中反覆搜尋茫無實據觀其金玉二印皆在巷戰時所
奪又似業已逃出僞宮者李秀成之供則稱曾經挾之出城
始行分散然此次逃奔之賊僅十六夜從地道缺口逸出數
百人當經騎兵追至湖熟圍殺淨盡自十七日後曾國荃迅
將缺口封砌關閉各城搜殺三日洪福瑱以十六齡童孩縱
未斃於烈火亦必死於亂軍當無疑義所有僞玉璽二方金
印一方臣當專差齎送軍機處俾修方畧者有所考焉李秀
成之被擒也各營之降卒附近之居民人人皆識觀者如堵

臣甫至金陵親訊一次旋派委員鞠訊累日令寫親供多至數萬字叙髮逆之始末述忠酋之戰事甚爲詳悉臣復詢以江西李世賢湖北馬融和湖州黃文金各股賊情據李秀成供湖州廣德之賊卽可不攻自遁馬融和一股本由陝西調援金陵因長江阻隔久無來信李世賢係李秀成堂弟與之約定八月以前則擄江西之糧以救侍逆之饑等語又力勸官兵不宜專殺兩廣之人恐粵匪愈孤逆黨愈固軍事仍無了日其言頗有可采日來在事文武皆請將李秀成檻送京師卽洋人戈登雅妥瑪等來賀者亦以忠逆解京爲快臣竊

以爲 聖朝天威滅此小醜除僭號之洪秀全外其餘皆可不必獻俘陳玉成石達開既有成例可援且自來元惡解京必須誘以甘言許以不死李秀成自知萬無可遁在途或不食而死或竄奪而逃翻恐逃顯戮而貽巨患臣與臣弟國荃熟商意見相同又李逆權術要結頗得民心城破後竄匿民房鄉民憐而匿之蕭孚泗生擒李逆之後鄉民竟將親兵王三清捉而殺之投諸水中若代李逆發私憤者李成秀旣入囚籠次日又擒僞松王陳德風到營一見李逆長跪請安聞此二端惡其民心之未去黨羽之尚堅卽決計就地正法以

絕後患遂於初六日行刑其洪仁達一犯係洪秀全之胞兄
與其長兄洪仁發皆暴虐恣橫多行不義爲李秀成所深恨
且如醉如癡口稱天父不絕無供可錄因其抱病甚重已於
初四日先行處死矣得 旨所辦甚是著卽將洪李二逆首
級傳示被擾地方以快人心而儆凶頑欽此二十八日曾大
臣暫回安慶八月 朝旨詢問善後事宜甚多曾大臣分條
覆奏其一江甯省城賊踞最久居民流亡殆盡此次官兵克
復羣酋縱火焚燒昔年巨室富家改造僞府微有存者此外
民房極少街市尙未復業臣嘗至貢院履勘一次號舍一萬

六千餘間尙完好惟監臨主考房官及各所片瓦無存現經
委員廣集工匠趕緊興修擬於十一月舉行鄉試庶冀士子
雲集商民亦可漸次來歸矣其一駐防旗營亟宜修理擬俟
貢院工竣次修江甯旗營次修京口旗營工有先後之分庶
籌辦有措手之處昔歲賊陷金陵旗營三萬餘人幾同一燼
被害之慘甚於京口殉節之烈甲於天下十餘年來陸續添
增現在不過八百餘人籌餉甚易爲力至挑間散京旗以實
江甯兵額亦俟修蓋營房規模粗定續奏辦理其一御史陳
廷經條陳疆域畧爲變通臣查蘇皖未分之時跨江淮而爲

省古人經畫疆里具有深意我朝聖君賢相未嘗輕議更章若必畫江而分南北兩省則亦宜畫淮而爲南北兩界淮北如蘇之徐州皖之潁州將割隸何省乎唐之十道宋之十五路其於江南江北皆截然分而爲二與該御史所奏大旨畧同然唐自中興以後號令並不行於江北畫江太明未必果能久安論形勝控扼之道守江南者必須先固淮甸棄淮則江南不可保昔人如吳師道胡安國楊萬里暨趙范葉適輩言之詳矣臣愚以爲疆吏苟賢則雖跨江跨淮而無損於軍事吏事之興疆吏苟不賢則雖畫江分治而無補於軍

餘明孝陵

修前地道缺口

改殮陸總督遺骸

事吏事之廢此等大政似不必輕改成憲奉 旨如議九月
 初一日曾大臣回至金陵二十日曾巡撫遵 旨詣明孝陵
 致祭十月初一日曾巡撫回湘是月修治地道缺口工竣曾
 大臣鑿石記之銘曰窮天下力復此金湯苦哉將士來者勿
 忘十一月初八日曾大臣改殮前總督陸建瀛遺骸親詣祭
 弔昔賊中嘗有謠曰一三三一數已絕重見天日在頃刻歲
 在甲子不利賊至是果驗

附記

是年正月陝西劉巡撫蓉派員克復漢中府二月十八

日李巡撫軍攻克浙江嘉興府程提督學啟內薄先登
受彈傷歸至蘇州卒程提督安徽懷甯人曾巡撫圍皖
時投誠曾大臣派隨李巡撫至上海所向有功及卒巡
撫哭之慟奏請優卹 予諡忠烈二十四日閩浙左總
督克復浙江省城賊出武林門向德清一路竄走得
旨左總督加太子少保銜賞穿黃馬褂布政使蔣益澧
提督高連升均賞穿黃馬褂蔣益澧並給雲騎尉世職
道員楊昌濬等賞賚有差隨又克石門等縣石門踞賊
僞歸王鄧光明就撫三月西安將軍多隆阿以痛剿陝

西諸賊克復盩厔縣受鎗彈傷旋薨諡忠勇將軍平時愛

士卒如骨肉而威令嚴明凡所指揮湯火不敢避薨之

日三軍雨泣天下識與不識皆痛惜之四月李巡撫親

督各軍攻克常州府擒踞賊偽護王陳坤書戮之盡殲

悍賊降眾數萬常州於咸豐十年四月初六日未刻失

陷越四年同日克之並時刻亦符六月十六日江甯克

復後江蘇全省肅清七月初一日 皇上修告成之禮

各廟拈香 天地社稷壇盛京 三陵 東陵、西陵

太廟遣官祭告 諭曰軍興以來各路統帥疆臣公

咸豐十年

忠體國其濟時艱現在紅旗報捷東南軍務卽可從此
底定各路統帥疆臣允宜特加異數以昭恩渥欽此於
是 欽差大臣科爾沁博多勒台親王僧格林沁加賞
一貝勒令其子受封 欽差大臣大學士湖廣總督官
文錫封一等伯爵世襲罔替並將本支內務府旗籍擡
入正白旗滿洲賞戴雙眼花翎江蘇巡撫李鴻章錫封
一等伯爵賞戴雙眼花翎陝甘總督楊岳斌兵部右侍
郎彭玉麟均賞給一等輕車都尉世職太子少保銜四
川總督駱秉章賞給一等輕車都尉世職並賞戴雙眼

花翎浙江提督鮑超賞給一等輕車都尉世職西安將軍都興阿江甯將軍富明阿廣西提督馮子材均賞給騎都尉世職署京口副都統魁玉賞給雲騎尉世職漕運總督吳棠賞給頭品頂戴仍從優議叙從前有功死事之臣分別賜祭獎卹王大臣軍機章京閣部司官並優加獎勵惟閩浙左總督杭州將軍國瑞江西巡撫沈葆楨但奉 優旨褒獎俟浙江江西肅清再行施恩是月二十七日李巡撫左總督各軍攻克湖州府城二十九日收復廣德州城僞昭王黃文英挾僞幼主洪福瑱

遁走甯國山中八月各軍擊賊於昌化淳安之境鎗斃
僞堵王黃文金餘賊僞干王洪仁玕等挾洪福瑱竄入
江西境浙江全省肅清干賊等眾經記名按察使席寶
田督軍晝夜緊追至廣昌縣白水嶺等處殲斃甚眾賊
遁至古嶺堅拒復敗之生擒洪仁玕等酋並陸續搜獲
僞護從百數十名及僞郵王洪仁政僞昭王黃文英二
十五日席按察追洪福瑱於石城縣屬之荒谷中經麾
下遊擊周家良拏獲解省得旨該犯係洪秀全之子
么魔小醜漏網餘生不值檻送京師著在江西省城凌

遲處死以快人心欽此江西巡撫沈葆楨賞一等輕車
都尉世職浙江提督鮑超錫封一等子爵記名按察使
席寶田賞雲騎尉世職賞穿黃馬褂閩浙總督左宗棠
錫封一等伯爵浙江布政使蔣益澧賞騎都尉世職是
月鮑提督大破賊於甯都州偽聽王陳炳文降偽侍王
李世賢偽康王汪海洋賊酋林彩新等竄入福建及廣
東邊境江西全省肅清其竄閩省之賊破武平縣按察
使張運蘭死之諡忠毅賊遂遍擾汀州境陷漳州府踞之
福建徐巡撫宗幹調泉廈各軍分路防剿左總督檄軍

前往並派提督高連升由甯波乘輪船航海赴閩旋於
十月二十八日親自赴閩督辦其時皖南之賊業經曾
大臣左總督各軍剿殺盡淨皖北之賊經僧王官大臣
等擒斬多名降眾十餘萬安徽全省肅清遺孽及豫晉
諸賊悉竄歸捻黨四年三月江蘇李巡撫遣提督郭松
林楊鼎勳等十六營由輪船航海赴福建助剿四月左
總督等軍併力攻克漳州府城侍賊李世賢竄走福建
全省肅清餘賊盡趨入廣東是月中興將帥錫封侯伯
者奉 特旨錫以嘉名曾大臣曰毅勇侯曾巡撫曰威

毅伯官大臣曰果威伯左總督曰恪靖伯李巡撫曰肅
毅伯二十四日 欽差大臣科爾沁博多勒台親王僧

格林沁以攻剿捻匪戰歿於山東曹州

忠諡

詔曾大臣

赴山東督兵剿賊節制直隸山東河南三省軍務李巡

撫署兩江總督布政使劉郁膏護江蘇巡撫八月左總

督鮑提督各軍進克廣東鎮平縣賊踞守嘉應州左總

督督軍圍攻礮斃康賊汪海洋十二月攻克嘉應州及

各城隘擒斬悍酋無算共斃賊萬餘人降衆五萬餘捷

聞左總督賞戴雙眼花翎劉典鮑超高連升黃少春

等獎賞有差先是侍賊李世賢自漳州敗遁後復敗於
永定未知下落六月二十八日潛逃至鎮平汪海洋迎
入侍賊以汪海洋藉詞不救又殺其僞王宗李元茂等
意不平頗形於色汪海洋不自安卽於七月初三日遣
人刺死之迨鎮平克復始得其詳於是賊中僞帥凶酋
除漏網之輔賊楊輔清一人於十三年閒物色於臺灣
始正法外至此已無噍類廣東全省肅清粵賊平

思屺主人金陵問答一篇云密默子薄游金陵有逆旅
主人過而言曰自 昭代龍興我江南沐浴生息晏然

不見兵革者二百有餘載劇寇壓境三辰失序金陵遂
淪爲異域合東南行省甲兵財賦將才物力之盛誓師
城下喪敗相繼蠢爾么麼駸駸坐大煩 兩朝之宵旰
竭生靈之膏血自癸丑迄甲子十有二年而始復其失
也若隕籜之易得也比摧山之艱天不降康民其何罪
吾子積勞兵閒熟悉情狀其能以金陵已事諭予乎密
默子曰不知而言不智知而不言不忠賊萌芽乎金田
咆哮乎永安跳盪乎長沙橫決乎江漢其閒命將出師
兵事連歲不解功罪之迹利鈍之機傳聞異詞請從蓋

闕泊乎棄武昌躡彭澤掠皖城趨采石舳艫千里直指
石頭如飛蝗蔽天莫敢仰視猛獸出柙市廛盡空夫以
江南惰窳偷玩之俗脆薄柔靡之民倉卒遇敵應時崩
摧勝敗之故無待蓍龜矣蓋賊之覬金陵非一朝取之
以積威而據之以全力蹂京口掠廣陵瞰中原窺半壁
天贊 廟算先機謀帥琦文勤邗上之捷向忠武鍾山
之師夾江而陳控扼南北賊自是不敢過蘇常高寶一
步吳越生民驚魂復定者又七八年然金陵依山阻江
城高廣甲天下賊渠楊秀清以梟桀之姿擁百萬之衆

據形勝之地我兵初至士氣單弱 中旨敦迫嚴責師
期堅城在前芒刃久頓賊得以其隙憑陵楚皖橫溢江
淮羽翼四張爪牙森布雖 朝命重臣分路致討而往
來有牽綴之懼彼此無聯屬之權畛域旣分事機屢舛
迨庚申辛酉閒官兵撓敗江浙沈淪賊意驕氣盈酣叅
淫縱無復鬪志猾虜之貫已盈元元之禍應革 沖聖
當陽疇咨方召東南再造悉畀元臣於是乘建瓴之勢
鼓行而東盪滌江滸直擣腹心而金陵始復爲我有傳
曰多難興邦殷憂啟聖又曰非常之功必得非常之人

何其盛哉主人曰寇之顛末旣聞命矣抑吾聞之向公
夔嗜宿將和公亦身負重名手握牙璋龔行 天罰慨
然各以平賊自任而乃百計仰攻俛得俛失卒以囊底
之智受困潢池覆轍相尋其故安在密默子曰向公受
任危難之際奉命顛蹶之餘方其下潯陽趨建業裹創
疾馳倍道追躡始至江南兵不滿萬累戰累捷拔鍾山
而守之未幾賊由浦口分道北犯浦東皖南後先告警
羽書日數至 璽書譙讓趣命濟師良將勁兵分援南
北無虛日丙辰春夏揚鎮兩軍相繼覆敗賊空湧不可

過孤軍中懸肘腋單露不能不左次以避其鋒然且輿疾視師屏蔽南服帳中符印付託得人而公亦從此逝矣兵法云搃瑕則堅者破又曰十則圍之五則攻之和公初克潤城氣吞江表大建旗鼓會於金陵時我師在城下者裁五六萬而沿江數千里賊蹤延蔓幾十倍其數首尾銜貫隱然敵國爲和計者連衡湘楚力爭上游芟薙羣凶迎刃斯解是爲上策重兵扼徽甯奇兵拔采石水陸列戍蹙賊使東是爲中策全軍孤注併力攻堅外撲內衝冀博一當是爲下策且夫古名將之用兵也

淬厲其志氣而勞苦其筋力內形既充百用不頓而乃
開塹築圍星羅碁置連營列柵二百有餘里備多則力
單戍久則師老器窳敝而無用士醉飽而就嬉當事者
且謂擣穴擒渠功在眉睫人人有裂土拜爵之想而不
知李秀成輩方日夜騰聚謀所以覆其局也執偏隅而
昧全圖狃近功而忘遠畧僨車負乘又何責焉主人曰
向公初薨張高要名震天下厥後庚申之蹶論者謂高
要督師必不至此然則和張之優劣可得聞歟密默子
曰和公之初至江南也高要已被總統之命金陵將卒

皆其心膂奉號令惟謹和公深沈而機警知三軍皆爲
彼用且高要方膺 殊寵負中外重望遂一切委任之
推賢讓能歡洽無閒高要忠勇善戰輕財養死士兩軍
相角當幾制勝一時罕有其儔至於長駕遠馭深心大
用審緩急之序而決成敗之幾則兩公皆不能無憾主
人曰吾聞庚申之變和公擁餽數十萬將士饑疲解體
東南半壁遂以不支信乎密默子曰和公天姿刻深自
奉儉約無聲色裘馬之嗜甫拜 命渡江與制府約將
帥主兵事地方籌軍實覈計水陸軍需月五十萬金糧

臺籍其數上之督府督府以授藩司覆核輦金常州依
時散放各營弁目至丹陽關領而行閒實不名一錢以
若所聞督師果擁厚貲則當賊勢披猖饑道中絕懸金
募士何敵不摧又安至徒手叫呼上下坐困而卒爲悍
賊乘哉太史公曰要之死後然後是非乃定夫受鉞登
壇應丈人長子之任喪師失律何所逃罪乃悠悠之口
騰播無稽一倡百和幾成冤獄嗚呼亦可哀也已主人
唯唯遂撫問答之語綴爲是篇

是篇得自
上海傳鈔

終